

欽定全唐詩

第四函  
第六冊



線  
831.4  
8966:2  
v. 30

舊籍







全唐詩目

皎然 七卷

韜光

應物

僧鸞

懷楚

雲表

冷然

淨顯

文益

齊己 一卷五十七卷

廣宣 一卷

知玄

智亮

神穎

耽章 共一卷

歸仁

大愚

修雅

元則

含曦

元孚

良乂

澹交

子蘭 一卷

卿雲

懷濬

元寂

謙光 共一卷

善生

栖白

常達

文秀

可止

隱巖

恒超

若虛

貫休 十二卷









全唐詩

皎然

皎然名畫姓謝氏長城人靈運十世孫也居杼山文章雋麗顏真卿韋應物竝重之與之酬倡貞元中教寫其文集入於祕閣詩七卷

奉酬于中丞使君郡齋臥病見示一首

宿昔祖師教了空無不可枯槁未死身理心寄行坐仁公施春令和風來澤我生成一草木大道無負荷論入空王室明月開心胃性起妙不染心行寂無蹤若非禪中侶君為雷次宗比聞朝端名今貽郡齋作真思疑瑤瑟高情屬雲鶴快得麗龍珠光彩曜掌握若作詩中友君為謝康樂盤薄西山氣貯在君子衿澄澹秋水影用為字人心羣物如鳥驚遊翔愛清深格居第一品高步凌前躅精義究天人四坐聽不足伊昔柳太守曾賞汀洲蘋如何五百年重見江南春公每省往事詠歌懷昔辰以茲得高臥任物化自淳還因訪禪隱知有雪山人

贈李中丞洪一首

深沈閫外畧一作權奕世當榮寄地裂大將封一作軍家傳介珪瑞至今漳河俗猶受仁人賜公初鎮惟邢一作淮決勝無精兵重圍逼大敵六月守孤城政用仁恕立恩繇賞罰明遂令麾下士感德不顧生於時聞王師諸將兵頗黷天子狩南漢煙塵滿函谷純臣獨耿介下士多反覆明公仗忠節一言感萬夫物性如蒺藜化作春蘭敷見說一作說金被爍終期玉有瑜移官萬里道君子情何如伊昔避事心乃是方袍客頓了空王一作心旨仍高致君策安知七十年一朝值宗伯言如及清風醒然開我懷宴息與遊樂一作遊不將衣褐垂海底取明月鯨一作鯨波不可度上有巨鱗吞下有一一作多毒龍護一與吾師言乃於中心悟咄哉冥冥子胡為自塵污一作塵自污

杼山禪居寄贈東溪吳處士馮一首

青雲何潤澤下有賢人隱路入菱湖深跡與黃鶴近野風吹白芷山月搖清軫詩祖吳叔庠致君名一作不盡身當青山秀詩曰家住青山下青山有吳筠放定後改為吳筠山文體多鄴聲澄澈湘水碧汶寥楚山一作青清時人格不同至今罕知名昔賢敦師友此道君獨行既得廬霍趣乃高雷遠情別時春風多掃盡雪山雪為君中夜起孤坐石上月悠然遺塵想邈矣達性說故人不在茲幽桂惜未結



妙喜寺高房期靈澈上人不至重招之一首

晨起峰頂心懷人望空碧掃雪開寺門灑水淨僧席言笑形外阻風儀想中覲馳心驚葉動傾耳聞泉滴豈慮  
咆虎逢乍疑崩端隔前期或不顧知爾隱常格如今誰山下一作秋霖步浙瀝吾亦聊自得行禪荷輕策松聲暢  
幽情山意導遐跡舉目無世人題詩足奇石貧山何所有特此邀來客

奉和薛員外誼贈湯評事衡反招隱之跡一作兼見寄十二韻

喜友稱高儒曠懷美無度近為東田誘遂耽西山趣庭有介隱心得無雲泉誤府公中司責頻貽咫尺素郡佐  
仙省高亦贈瓊瑤句諳茲長往志紆彼獨遊步禪子方外期夢想山中路艱難親稼穡晨夕苦煙霧曷若孟嘗  
門日榮國士遇鏗鏘聆綺瑟攀折通瓊樹幽踐隨鹿麋久期怨蟾兔情同不繫舟有跡道所惡

荅黎士曹黎生前適越後之楚

楚木紛如麻高松自孤直願得苦寒枝與君比顏色故鄉眇天末羈旅滄江隅委質在忠信苦心無變渝何繇  
表名義贈君金轆轤何以美知才投我懸黎珠遠為千里別南風思越絕愛君隨海鷗倚權宿沙月不栖惡木  
上冒蹈巴蛇穴台人表朝逆命故君不踐其上一上蕭然峰擬蹤幽人轍晨興獨西望郢水期泝沿夜到洞庭月秋經雲夢天黎生  
知吾道此地不潸然欲寄楚人住學拏漁子船柰何北風至攪我窗中弦遊子動歸思江離亦綿綿篋中封禪  
書欲獻無絲緣豈乏晨風翼翻飛到日邊

荅豆盧次方

吾愛道交論為高貴世名昔稱柴桑令今聞豆盧生彼生清淮氣獨鍾文中彩近作公讌詩如逢何柳在吾用  
古人耳採君四坐珍賢士勝朝暉溫溫無冬春朝暉爛我肌賢士清我神微爾與雲鵠幽懷何繇申別來秋風  
至獨坐楚山碧高月當清冥禪心正寂歷增波徒相駭人遠情不隔有書遺瓊什以代貂襜褕風教凌越絕聲  
名掩吳趨懸壁安可酬徒倚還踟躕

荅蘇州韋應物郎中

詩教殆淪缺庸音互相傾忽觀風騷韻會我夙昔情蕩漾學海資鬱為詩人英格將寒松高氣與秋江清何必  
鄴中作可為千載程受辭分虎竹萬里臨江城到日掃煩政况今休黷兵應憐禪家子林下寂無營跡躡世上



華心得道中精脫畧文字累免為外物櫻書衣流埃積硯石駁蘇生恨未識君子空傳手中瓊安可誘我性始願愆素誠為無驚驚音繼公雲和笙吟之向禪數反媿幽松聲

荅鄭方回

獨禪外念入中夜不成定顧我顛顛容澤君陽春詠詞貞思且逸瓊彩何暉映如聆雲和音况覩聲名盛琴語掩為去聲聞山心聲宜聽是時寒光澈萬境澄以淨高秋日月清中氣天地正遠情偶茲夕道用增寥復思君處虛空一操不可更時美城北徐家承谷口鄭軒車未有轍蒿蘭且同徑莊生誠近名夫子罕言命是以一作耕楚田曠然殊獨行萎蕤鸞鳳彩特達珪璋性通隱嘉黃綺高儒重荀孟世污平聲我未起道寒吾猶病逸翮思冥冥潛鱗樂游泳宗師許學外恨不逢孔聖說詩述頽靡偶俗傷趨競此道誰共一作誰詮因君情欲罄

荅俞校書冬夜

夜閑一作來禪用精空界亦清迴子真仙曹吏好我如宗炳一宿覲幽勝形清煩慮屏新聲殊激楚麗句同歌郢遺此感子懷沈吟忘夕永月彩散瑤碧示君禪中境真思在杳冥浮念寄形影遙得四明心明何須蹈岑嶺詩情聊作一作用空性惟一作復寂靜若許林下期看君辭簿領

妙喜寺達公禪齋寄李司直公孫房都曹德裕從事方舟顏武康士驄四十二韻

我祖傳六經精義思朝徹莊子曰守之九日而後能外生外生而後能朝徹方舟頗周覽逸書亦備閱墨家傷刻薄墨流刻薄而不仁可以理身不可以濟世儒氏知優劣弱植庶可彫苦心未嘗轍中年慕仙術永願傳其訣歲駐若木景日餐瓊禾屑輝娟羨門子斯語豈徒設天上生白榆葳蕤信好折實可反柔顏花堪養玄髮求之性分外業棄金亦竭藥化成白雲形彫辭素穴素穴一名一閩西天旨初禪已無熱第四禪中有天名無熱無三災之患故以爲名今初禪即得蓋詩人美已證超出常涓子非我宗然公有真訣却尋丘壑趣始與纓紱別野飯敵膏粱山楹代藻梳與君北巖侶遊寓日常映靜對春谷泉晴披陽林雪境清覺神王道勝知機滅詣寂長杳冥忘歸暫采擷物生豈有心麗容俟子別桂子何莫苓琪葩亦皎潔此本生意高亦與眾芳列賞墨識屢換省躬悟彌切微尚若不虧足以全吾節北風吹蕙帶蕭寥聞蜻蛚宿昔廬峰期流芳已再歇不有清屏鑒使我商弦絕願寄千里心月高不可掇優游邦之直遠矣踵前烈立俗忘毀譽遇物遺巧拙真氣獨翛然軒裳詎能繼都曹風韻整綱紀信明決於交必傾寫立行豈矜伐政與清渭同分流自澄澈裴侯資亮直中誠豈徒說古人比明義清



士願交結溫溫躬珪彩終始聲不缺顏生炯介士有志不可越仗義冒險難一作難持操去淄涅世論高二賢即魯公  
賢賢繼前哲四子遭明盛稟然皆秀傑理名雖殊跡悟道寧異轍愛爾竹柏姿為予寒不折續子也

遙酬袁使君高春暮行縣過報德寺見懷

江春行求瘼偶與真境期見說三陵下前朝開佛祠停舟仰麗刹繡組發香墀咫尺空界色天人花落時盛游限  
羸疾悚踴瞻旌旗峰翠羨閑步松聲入遙思素高淮陽理况負東山姿迨此一登覽深情見新詩

冬日遙一作奉和盧使君幼平基母居士遊法華寺高頂臨湖亭一作奉和盧使君幼平遊湖陽山寺臨太湖時在郭不得往

仁坊一作標絕境康守一作明躡高一作靈蹤天曉纔分刹風傳欲盡鐘一作欲到心涼城中歸路遠一作在湖上碧山重水照千花  
界雲開七葉峰寒芳一作空艾綬滿空一作晴翠白綸濃逸韻知難繼佳遊恨不逢仍聞撫禪石為我久從容

秋日遙和盧使君遊何山寺宿敷上人房論涅槃經義

江郡當秋景期將道者同跡高憐竹寺夜靜賞蓮宮古磬清霜下寒山曉月中詩情緣境發法性寄筌空翻譯推  
南本何人繼謝公

酬秦山人系題贈

出齋步杉影手自開禪扉花滿不污地雲多從觸衣思山石蘚淨款客露葵肥果得宗居士論心到極微

奉酬袁使君高寺院新亭對雨其亭即使君所創

茲亭跡素淺勝事併隨公法界飄香雨禪窗灑竹風浮煙披夕景高鶴下秋空冥寂四山久寧期此會同

奉酬顏使君真卿見過郭中寺寺無山水之賞故子述其意以荅焉

州西柳家寺禪舍隱人間證性輕觀水棲心不買山履聲知客貴雲影悟身閑彥會前賢事方今可得攀

酬烏程楊明府華雨後小亭對月見呈

夜涼喜無訟霽色搖閑情暑退不因雨陶家風自清凝弦傳片景發詠靜秋聲何事禪中隱詩題忽記名

自蘇州訪醫迴酬盧士關判官見贈

尋醫初疾理忽憶故山雲遠訪桑公子還依柳使君周旋承惠愛佩服比蘭薰從事因高唱秋風起處聞

題沈一作雷道士新亭



831.4  
8966:2  
V.30

何處好攀躋新亭俯舊溪坐中千里近簷下四山低小浦依林曲迴塘遶郭西桃花春滿地歸路莫相迷

送盧仲舒移家海陵

世故多離散東西不可嗟小秦非本國楚塞復移家海島無鄰里鹽居少物華山中吟夜月相送在天涯

陪盧使君登樓送方巨之還京

萬里汀洲上東樓欲別難春風湖水漫正月柳條寒旅逸逢漁浦清高愛鳥冠雲山寧不起今日向長安

同裴錄事樓上望

退食高樓上湖山向晚晴桐花落萬井月影出重城水竹涼風起簾幃暑氣清蕭蕭獨無事因見淮人情

寓興

天下生白榆白榆直上連天根高枝不知幾萬文世人仰望徒攀援誰能上天採其子種向人間笑桃李因問

老仙求種法老仙咤我愚不答始知此道無所成還如瞽夫學長生

寄常一上人

雁塞五山臨汗漫雲州一路出青冥何因請住嘉祥寺內史新修湖上亭

送秘上人遊京

共君方異路山伴與誰同日冷行人少時清古鎮空煖瓶和雪水鳴錫帶江風撩亂終南色遙應入夢中

賦得

萬里巴江外三聲月峽深何年有此路幾客共霑襟斷壁分垂影流泉入苦吟悽涼離別後

聞此更傷心

南樓望月

夜月家家望亭亭愛此樓纖雲溪上斷疎柳影中秋漸映千峰出遙分萬派流關山誰復見應獨起邊愁

尋陸鴻漸不遇

移家雖帶郭野徑入桑麻近種籬邊菊秋來未著花扣門無犬吠欲去問西家報道山中去歸時每日斜

一作歸來  
日每斜

國家圖書館



003871628

2019581



懷舊山一作滄海詩題云  
留別嘉興知已

一坐西林寺從來未下山不因尋長者無事到人間宿雨愁爲客寒花笑未還空懷舊山月童子念經閑

宿吳匡山破寺

雙峰百戰後真界滿塵埃蔓草緣空壁悲風起故臺野花寒更發山月暝還來何事池中水東流獨不迴

九月十日

愛殺柴桑隱名溪近訟庭掃沙開野步搖舸出閑汀宿簡邀詩伴餘花在酒瓶悠然南望意自有峴山情

秋晚一作晚秋宿破山寺

秋風落葉滿空山古寺一作殿殘燈石壁間昔日經行人去盡寒雲夜夜自飛還

青陽上人院說金陵故事

君說南朝全盛日秣陵才子更多人一作十年秋色古池館誰見齊王西邸春

送僧之京師

綿綿渺渺楚雲繁萬里西歸望國門禪子初心易悽斷秋風莫上少陵原

送許丞還洛陽

剡茗情來亦好斟空門一別宵霑襟悲風不動罷瑤軫忘却洛陽歸客心

題湖上草堂

山居不買剡中山湖上千峰處處閑芳草白雲留我住世人何事得相關

酬李司直縱諸公冬日遊妙喜寺題照昱二上人房寄長城潘丞述

達賢貴貞隱常懼跡不滅遂與永公期遺身坐林樾華軒何鞿鞞爲我到幽絕心境寒草花空門青山月潘生獨不見清景屢盈缺林下常寂寥人間自離別何時解輕佩來稅丘中轍

贈烏程李明府伯宜沈兵曹仲昌

水國苦彫瘵東臯豈遺黍雲陰無盡時日出常帶雨昨夜西溪漲扁舟入簷廡野人同鳥巢暴客若蜂聚歲晏無斗粟寄身欲何所空羨鸞鶴姿翩翩自輕舉



奉酬顏使君真卿王員外圓宿寺兼送員外使迴

魯公邀省客貧寺人過少錦帳惟野花竹屏有窗篠朝行石色淨夜聽泉聲小釋事情已高依禪境無擾超遙長路首悵望空林杪離思從此生還將此心了

杼山上峰和顏使君真卿袁侍御五韻賦得印字仍期明日登開元寺樓之會

道情寄遠岳放曠臨千仞香路延絳騶華泉寫金印日敬諸天近雨過三華潤留客雲外心忘機松中韻靈嘉早晚期為布東山信

同薛員外誼喜雨詩兼上楊使君

積旱忽一作飛澍一作烝民心一作亦傾郊雲不待族雨色飛江城焦稼濯又發敗荷滋更榮時隨霧縠重乍集柳絲輕一宿恐魚飛數朝徵鶴鳴毒暑澄為冷高塵滌還清乃知陰陽數制在造一作化情及此接歡賀臨風聞頌聲

南湖春泛有客自北至說友人岑元和見懷因叙相思之志以寄焉

故人隔楚水日夕望芳洲春草思眇眇征雲暮悠悠心期無形影跡曠成阻修有客江上至知君佐雄州鏗鏘佩蒼玉躑躅驅絳騶伊昔中峰心從來非此流資子長生訣予嘗授以胎息之訣希彼高山儔此情今如何宿昔師吾謀別後

謁禪老更添石室籌深見人間世飄如水上漚蟬號齊王邸月苦隋帝樓聲華盡冥冥麋鹿徒呦呦我有一字教坐然遺此憂何煩脫珪組不用辭王侯祇在名位中空門兼可遊

同薛員外誼久旱感懷寄兼呈上楊使君

皇天鑒不昧恟想何亢極絲雨久愆期綺霞徒相惑陰雲舒又卷濯枝安可得涸井不壘瓶乾溪一憑軾赤地芳草死飈塵驚四塞戎寇夜刺閨民荒歲傷國賴以王猷盛中原無凶慝楊公當此晨省災常旰食獨感下堂

雨自州南諸鄉降甘澤長城頓清平地雨一尺水分流澤數鄉也偏嘉越境域秋郊天根見我疆看稼穡請迴雲漢詩為君歌樂職

兵後早春登故鄣南樓望崑山寺白鶴觀示清道人并沈道士第十九句空一字

新陽故樓上眇眇傷遐睴違世情易忘羈時得無倦春歸華柳發世故陵谷變擾擾陌上心悠悠夢中見蒼林有靈境杳映遙可羨春日倚東峰華泉落西甸鐘聲在空碧幡影搖蔥蒨緬想山中人神期如會面別離芳月積岐路浮雲徧正入空門仙君依苦縣隳形捨簪紱烹玉思精鍊事外宜我心人間豈予戀身遺世自薄道



勝名必賤耳目何所娛白雲與黃卷

酬烏程楊明府華將赴渭北對月見懷

釋印及秋夜身閑境亦清風襟自瀟灑月意何高明聞說武安君萬里驅妖精開府集秀士先招士林英晉家用元凱亦是魯諸生北望撫長劍感君知己行邊塵昏玉帳殺氣凝金鐙大敵折齊俎一書下聊城翻飛青雲路宿昔滄洲情答來詩云悠然頗山侶之句

酬邢端公濟春日蘇臺有呈袁州李使君兼書并寄辛陽王三侍御

大賢當佐世堯時難退身如何丹霄侶却在滄江濱柳色變又徧鶯聲聞亦一作頻賴逢宜春守共賞南湖春營道知止足飾躬無緇磷家將詩流近跡與禪僧親放曠臨海門翱翔望雲津雖高一作空王說不久山中人上句答端公舉無為之句

奉和裴使君清春夜南堂聽陳山人彈白雪

春宵凝麗思閑坐開南園郢客彈白雪紛綸發金徽散從天上至集向瓊臺飛弦上疑颯颯虛中想霏霏通幽鬼神駭合道精鑿稀變態風更入含情月初歸方知阮太守一聽識其微

答孟秀才

羸疾依小院空閑趣自深躡苔憐靜色掃樹共芳陰物外好風至意中佳客尋虛名誰欲累世事我無心投贈荷君芝馨香滿幽襟

酬崔侍御見贈

買得東山後逢君小隱時五湖遊不厭一作未足柏署跡如遺市隱一作儒服何妨道禪棲一作心不廢詩與君為此說一作士說長破小

贈柳喜得嵩山法門自號嵩山老一作贈柳先生

一見嵩山老吾生恨太遲問君年幾許曾出一作見上皇時

酬李補闕紆

不住東林寺雲泉處處行近臣那得識禪客本無名



湖南蘭若示大乘諸公

未到無為岸空憐不繫舟東山白雲意歲晚尚悠悠

兵後經永安法空寺寄悟禪師

其寺號所焚

常說人間法自空何言出世法還同微蹤舊是香林下餘燼今成火宅中後夜池心生素月春天樹色起悲風吾知世代相看盡誰悟浮生似影公

春日杼山寄贈李員外縱

南山唯與北山鄰古樹連拳伴我身一作一開禪門老此身黃鶴有心多不住白雲無一作何事獨相親閑持竹錫深一作時一作行看水嬾繫麻衣出見人欲掇幽芳聊贈遠一作無限幽蘭從欲寄郎官那賞一作許石門春

酬秦山人贈別二首

知君高隱占賢星卷葉時時注佛經姓被名公題舊里秦君里詩將麗句號新亭麗句亭來觀新月依清室欲漱香泉護觸

瓶我有主人江太守如何相伴住禪靈江淹為宣城守常會禪靈寺

誰知臥病不妨禪跡寄詩流性似偏葉示黃金童子愛書題青字古人傳時高獨鶴來雲外每羨閑花在眼前

對此留君還欲別應思石澗音四訪春泉

山居一作詩示靈澈上人

晴明路出山初暖行踏春蕪看茗歸乍削柳枝聊代札時窺雲影學裁衣身開始覺隳名是心了方知苦行非外物寂中誰似我松聲草色共無一作忘機

遙和康錄事李侍御萼小寒食夜重集康氏園林

習家寒食會何頻應恐流芳不待人已愛治書詩句逸更聞從事酒名新庭蕪暗積承雙履林藹當飛灑幅巾誰見柰園時節共還持綠茗賞殘春

釋裴循春愁一作怨

蝶舞鶯歌喜歲芳柳絲裊裊蕙帶長一作蘭香江南春色共君有一作看何事君心獨自傷

西白溪期裴方舟不至



望君不見復何情野草開雲處處生應向秦時武陵路花間寂歷一人行

勞山憶棲霞寺道素上人久期不至

遠寺蕭蕭獨坐心山情自得趣何深泉聲稍滴芙蓉漏月影纔分鸚鵡林滿地雲輕長礙屣繞松風近每吹襟  
貪閑不記前心偶念別聊為出世吟更待花開徧山雪山山相似若為尋

酬秦山人出山見呈

手攜酒榼共書幃迴語長松我即歸若是出山機已息嶺雲何事背君飛

酬秦山人見尋

左右香童不識君擔簦訪我領鷗羣山僧待客無俗物唯有窗前片碧雲

宿法華寺簡靈澈上人

至道無機一作心與空林共杳冥孤燈寒竹自青一作熒不知何處小乘客一夜風來一作前聞誦經

潛別離

烏頭雖黑白一作有白時唯有潛離與暗別彼此甘心無後期

奉酬袁使君高春遊鶴鵠峰蘭若見懷

鶴鵠中峰近高奇古人遺常欲乞此地養松挂藤絲昨聞雙旌出一川花滿時恨無翔雲步遠赴關山期躋險  
與誰賞折芳應自怡遙知忘歸趣喜得春景遲已見郢人唱新題石門詩

荅裴濟從事

遲遲雲鶴意奮翅知有期三乘網紀局累登清白資應懷青塘居蕙草沒前墀舊月照秋水廢田留故陂至今  
高風在為君吹桂枝昨逢洞庭客果得故人詩何異王內史來招道林師欲攜山侶出難與白雲辭

白雲上人精舍尋杼山禪師兼示崔子向何山道上人

望遠涉寒水懷人在幽境為高皎皎姿及愛蒼蒼嶺果見栖禪子潺湲灌真頂積疑一念破澄息萬緣靜世事  
花上塵惠心空中境清閑誘我性遂使腸一作煩慮屏許共林客遊欲從山王一作主請木栖無名樹水汲忘機井持此



一日高未官謝箕穎夕霽山態好空月生俄頃識妙聆細泉悟深滌清茗此心誰得失笑向西林永

酬薛員外誼苦熱行見寄

六月金數伏茲辰日在庚炎曦爍一作曝肌膚毒霧一作霧昏性情一作性安得奮輕一作超翾超一作遙出雲征不知天地心如何  
匠生成火德燒百卉瑶草不及榮一作有客當此時忽貽懷中瓊捧翫煩袂一作袂滌肅歌美一作善風生遲君佐元氣調  
使四序平中令霜不被一作板大一作火餘氣常貞江南詩騷客休吟苦熱行

採實心竹杖寄贈李萼侍御

竹杖裁碧鮮步林賞高直實心去內矯全節無外飾行藥聊自持扶危資爾力初生在榛莽孤秀豈封殖干雪  
不死枝贈君期君識

酬薛員外誼見戲一首

方知正始作麗掩碧雲詩文彩盈懷袖風規發詠思遺弓逢大敵摩壘怯偏師頻有移書讓多慙繫組遲淺才迂  
且拙虛譽喜還疑猶倚披沙鑿長歌向子期

奉酬李中丞洪湖州西亭即事見寄兼呈吳馮處士時中丞量移湖州長史

愛君溪上任遲月開前局山火照書卷野風吹酒瓶為誰留此物意在眼中青樵子逗煙野漁翁宿沙汀主人非  
楚客莫謾譏獨醒宿昔邢城功道高心已冥貪將到處士放醉烏家亭

茗溪草堂自大曆三年夏新營泊秋及春彌覺境勝因紀其事簡潘丞述湯評事衡四十三韻

萬慮皆可遺愛山情不易自從東溪住始與人羣隔應物非宿心遺身是吾策先民崆峒子淪景事金液綺里  
猶近名於陵未泯跡吾師逆流教禪隱殊古昔僧傳云人皆隱於山我獨隱於禪洗足臨潺湲銷聲寄松柏  
道心制野猿法語授幽客境淨萬象真奇目皆有益原上無情花聖教意草木等器世間雖無情而理性通又云鬱鬱黃花無非般若若其義山中聽經石高僧於公詩曰

學徒數塊石生公有通經石竹生自蕭散雲性常潔白却見羈世人遠高摩霄翮達賢觀此意煩想遂冰蘖伊子戰苦勝覽境情

不溺智以動念昏功繇無心積形骸爾何有生死誰所戚為與勝悟冥不憂頽齡迫春風自貽蕩禪地常闐寂

擲札成柳枝僧傳北遠法師作涅槃經疏畢擲札於庭柳枝生焉澆瓶養泉脉道人知止足盥漱聊自適學外見古賢頗令我心惕眇綿雲官世



夢幻羽陵籍鬼錄徒相矜九原誰家宅俗情封淺近至理昧堯跖蹈善嗟沈冥履仁傷堙阨匠心聖亦尤攻異

天見責世論謂堯聖德而嗣不肖盜竊行而享長富無福仁禍淫之應試以慧眼觀斯言諒可觀外事非吾道忘緣倦所歷中宵

廢耳目形靜神不役色天夜清迴花漏時滴瀝高僧遠公刻蓮花湯東風吹杉梧幽月到石壁此中一悟心可與千載敵故

交徒好我筐中無咫尺潘生入空門祖師傳秘蹟潘生曾受曹溪禪門湯子自天德精詣功不僻放世與成名兩國在所擇

然作山計改服我下澤君隳元亮冠我脫潛師屐僧傳沙門法潛著山屐入朝倚臥高松根共逃金閨籍

荅裴集陽伯明二賢各垂贈二十韻今以一章用酬兩作

知音如瓊枝天生為子有攀折若無階何殊天上柳裴生清通嗣陽子盛德後詩名比元長二子詩比王融為少年著名賦體凌

延壽賦如文考亦俱歲年珠生驪龍頷或生靈蛇口何似雙瓊章英英曜吾手白日不可汗清源官客垢持此山上心待君忘

情友且伴丘壑賞未隨名宦誘坐石代瓊茵製荷捐艾綬清宵集我寺烹茗開禪牖發論教可垂正文言不朽

白雲供詩用清吹生座右不嫌逸令醉莫試仙壺酒皎皎尋陽隱千年可為偶一從漢道平世事無紛紜星文

齊七政天軸明二斗居士揚弓旌知君一作君在林藪莫學潁陽子請師高山叟出處藩我君還來會匡阜

荅豆盧居士春夜遊東園見懷

春意賞不足承夕步東園事表精慮遠月中華木繁開襟寄清景遐想屬空門安得纒芳屐看君幽徑登

寄崔萬芳夔

氣殺高隼擊惜芳步寒林風搖蒼琅根霜剪菽音翹蓮心歸思忽眇眇佳氣亦沈沈我身豈遐遠如隔湘漢深事邇

智莫及願乖情不任遲君忘言侶一笑開吾襟

訪朱放山人

野人未相識何處異鄉隔昨逢雲陽信教向雲陽覓空聞天上風飄颻不可覲應非矍鑠翁或是滄浪客早晚從

我遊共攜春山策

晚冬廢溪東寺懷李司直縱

廢溪無人跡益見離思深歸來始昨日恍惚驚歲陰清想屬遙夜圓景當空林宿昔月未改何如故人心遊從



間芳趾搖落樓寒岑眇眇湖上別含情初至今道流安寂寞世路倦嶇欽此意欲誰見懷賢獨難任微聲反冥  
默夕籟何哀吟禪念破離夢吾師誠援琴耿耿已及旦曷繇開此襟幽期諒未偶勝境徒自尋安得西歸雲因  
之傳素音

兵後與故人別予西上至今在楊楚因有是寄

日月不相待思君魂屢驚草玄寄楊子作賦得蕪城温温獨游跡遙遙相望情淮上春草歌楚子秋風生辟士天  
下盡君何獨屏營運開應佐世業就可成名誰借楚山住年年事耦耕

因遊支硎寺寄邢端公

大厦資多士掄材得豫章清門推問望早歲聘康莊作用方開物聲名久擅場丹廷分塞郡宿昔領戎行始馭  
屏星乘旋陰蔽第棠始於延州朝端瞻鸚立關右仰鷹揚威令兼寧朔英聲重護羌三軍成父子雜虜避封疆身執

金吾貴時遭寶運昌雍容持漢綽肅穆衛周堂排難知臣節攻疑定國章一言明大義千載揖休光踐職勳庸

列一作烈修躬志行彰優游應慕陸止足定師張中宸懷殊政南州佇小康仁為桂江雨威是柏臺霜侍御史譽誇言

無隱公忠禍不防遣深辭紫禁恩在副朱方左遷温州治中切玉鋒休淬垂天翅罷翔論文徵賈馬述隱許求羊肘

後看金碧腰間笑水蒼詩題白羽扇酒挈綠油囊曠達機何有深沈器莫量時應登古寺佳趣在春岡止水平

香砌鮮雲滿石牀山情何寂樂塵世自飛揚已遇鑪峰社還思緝蕙房外心親地主內學事李王花會宜春淺

禪遊喜夜涼高明依月境蕭散躡庭芳得道殊秦佚慕名似楚狂餘生於此足不欲返韶陽

同諸公奉侍祭岳瀆使大理盧幼平自會稽迴經平望將赴於朝廷期過故林不至用韻

望祀崇周典皇華出漢庭紫泥頒會計玄酒薦芳馨聖慮多虔肅一作祈齋心合至靈占祥刊史竹筮日數堯奠

禮秩加新命朝章篤一作重理刑敷誠通北一作九闕遺愛在南一作西亭一本此下有五字餘似誤三碑石前茗水思曾泛磯山憶重經

清風門客仰佳頌國人聽攀桂留卿月徵文待使星春郊迴駟牡遙識故林青

早秋桐廬思歸示道諺一作上人

桐江秋信早憶在故山時靜夜風鳴磬無人竹掃墀後來觸淨水鳥下啄寒梨可即一作何關吾事歸一作心自有期

勞勞山一作勞山居寄呈吳處士



山事繇來別只應中老身寒園掃綻栗秋浪拾乾薪楚人呼養領鶴開書竹誇雲笑向人俗家一作流相去遠野水作東鄰

寄報德寺從上人鼓吹山在寺西

宗流許身子物表養高關空色清涼寺秋聲鼓吹山看心水磬後行道兩花間七葉翻章句時時啟義關

山中月夜寄無錫長官

湖上涼風早雙峰月色秋遙知秣陵令今夜在西樓別葉蕭蕭下含霜處處流如何共清景異縣不同遊

奉賀顏使君真卿二十八郎隔絕自河北遠歸

相一作自失值氛煙縷應掌上年久離驚貌長多難喜身全比信尚書重如威太守憐滿庭看玉樹更有一枝連

題湖上蘭若示清會上人

峰心惠忍寺曠頂謝公山何似南湖近芳洲一畝間意中雲木秀事外水堂閑永日無人到時看獨鶴還

秋宵書事寄吳憑處士一本無處士二字

真一作禪性在一作交方丈寂一作寒寥無四鄰秋天月色正清夜道心真大夢觀前事一作遺浮名悟一作快此身不知庭樹意榮落

感何人

題山壁示道維上人

獨居何意足山色在前門身野長無事心冥自不言閑行數亂竹靜坐照清源物外從知少禪徒不耐煩

晚秋登佛川南峰懷裴例

登嶺望落日眇然傷別魂亭皋秋色徧遊子在荆門世故東西客山空斷續後此心誰復見寂寞偶芳蓀

訪陸處士羽一作訪陸羽處士不遇

太湖東西路吳主一作王古山前所思不可見歸鴻一作雁自翩翩何山賞春茗何處弄春泉莫是滄浪子悠悠一釣船

酬李侍御萼題看心道場賦以看毛腸心牙等五字看字得牙字

我法從誰悟心師是貫花三塵觀種子一雨發萌牙定起輪燈缺宵分印月斜了空如藏史始有會禪家正論亦有此

送一日禪客者流



酬姚補闕南仲雲溪館中戲題隨書見寄

一作清江詩

寺溪臨使府風景借仁祠補袞周官貴能名漢主恩臥雲知獨處望月憶同時忽枉緘中贈瓊瑤滿手持

春夜期裴都曹濟集心上人院不至

東林期隱吏日月為虛盈遠望浮雲隔空憐定水清逍遙方外侶荏苒府中情漸聽寒蟬發淵淵在郡城

和裴少府懷京一本有都字兄弟

宦遊三楚外家在五陵原涼夜多歸夢秋風滿故園北書無遠信西候獨傷魂空念青門別殷勤岐路言

和閻士和望池月答人

片月忽臨池雙蛾憶晝時光浮空似粉影散不成眉孤枕應驚夢寒林正入帷情知兩處望莫怨獨相思

遙和塵外上人與陸澧夜集山寺問涅槃義兼賞陸生文卷

上人自號北山子

共是竹林賢孫綽僧史以七人配德秘院流竹林七僧心從貝葉傳說經看月喻一作通開卷愛珠連清淨遙城外蕭疎一作條古塔前應隨北山子

高頂枕雲眠

春日和盧使君幼平開元寺聽妙奘上人講時上人將遊五臺

仁聖垂文在虛空日月懸陵遲追哲匠宗旨發幽詮法受諸侯請心教四子傳春生雪山草香下棘林天顧我從

今日聞經悟宿緣涼山萬里去應為教猶偏

答李侍御問

入道曾經離亂前長干古寺住多年愛貧唯製蓮花足取性閑書樹葉篇自笑不歸看石牒誰高無事弄苔泉

身外空名何足問吾心已出第三禪

奉酬李員外使君嘉祐蘇臺屏營居春首有懷

昔歲為邦初未識今朝休沐一作官始相親移家水巷貧一作貧依靜種柳風窗欲占春詩思先邀烏府客山情還訪白樓

人登臨許作一作接煙霞伴高在方袍間幅巾

和李舍人使君紆題雲明府道室

許令如今道姓雲曾經西岳事桐君流霞手把應憐壽黃鶴心期擬作羣金錄時教弟子檢砂林不遣世人聞桂



陽亦是神仙守分別無嗟兩地分

奉和陸中丞使君長源寒食日作

寒食江天氣最清庾公晨望動高情因逢內火千家靜便覩行春萬木榮深淺山容飛雨細繁紆水態拂雲輕腰章本郡誰相似數日臨人政已成

奉酬袁使君送陸瀨却迴期道寺院

欲別湖上客暮期西林還高歌風音表放舟月色間更人莫報夜禪閣本無關

招一作贈韓武康章

山僧雖不飲酌酒引陶潛此意一作無人別多為俗士嫌

秋居法華寺下院望高頂贈如獻上人

峰色秋天見松聲靜夜聞影孤長不出行道在寒雲一作入深雲

贈韋早卓陸羽

只將陶與謝終日可一作好忘情不欲多相識逢人懶道名

戲呈薛彝

山僧不厭野才子會須狂何處銷君興春風擺綠楊

贈顏主簿

漢家儀禮盛名教出諸顏更見尚書後能文在子山

贈融上人

常愛西林寺池中月出一作在時芭蕉一片葉書取寄吾師

聽寒更寄朱兵曹巨川

敬枕一作獨自聽寒更寒更發還住一夜千萬聲幾聲到君處

早春書懷寄李少府仲宣

子故里在長城卞山昔歲屬狂寇陷沒江左親故離散永望粉梓不覺傷懷因李使君長城遂寄是詩以見



情也

早年初問法因悟目中花忽值胡雛起  
芟夷若亂麻脫身投彼岸弔影念生涯  
跡與空門合心將世路賒東田已蕪沒  
東田詩 東田公有南澗益血傷嗟 蘇後記曰南澗竭謝氏流 崇替驚人  
事凋殘感物華知君過我里惆悵舊煙霞

贈和評事判官

廷評年少法家流心似澄江月正秋  
學究天人知遠識權分鹽鐵許良籌  
春風憶酒烏家近好月論禪謝寺幽  
清白比來誰見賞憐君獨有富人侯

酬秦系山人題贈

雲林出空一作鳥未歸松吹時飄雨浴一作沐  
衣石語花愁一作悲徒自詫吾心見境盡為非

酬秦系山人戲贈

正論禪寂忽狂歌莫是塵心顛倒多  
白足行花曾不染黃囊貯酒欲如何

貽李湯

茅氏常論七真記壺公愛一作好說三山事  
寧知梅福在人間獨為蒼生作仙吏  
日服丹砂骨自清膚如冰雪心更明  
山中玉笥是仙藥袖裏素書題養生  
願隨黃鶴一輕舉仰望青霄獨延佇  
平生好駿君已知何必山陰訪王許

述祖德贈湖上諸沈

我祖文章有盛名千年海內重嘉聲  
雪飛梁苑操奇賦梁苑出惠連公齊賦春發池塘得佳句康樂云池上樓詩夢會連方得池塘生芳草之句  
世業相承及我身風流自謂過時人  
初看甲乙矜言語對客偏能鵠鶴舞尚公少年善為飽用黃金無所求  
長裾曳地干王侯一朝金盡長裾裂  
吾道不行計亦拙歲晚高歌悲苦寒  
空堂危坐百憂攢昔時軒蓋金陵下  
何處不傳沈與謝四公與約俱是西邸八友綿綿芳藉至今聞  
眷眷通宗有數君誰見予心獨飄泊  
依山寄水似浮雲

舟行懷閻士和

二月湖南春草徧橫山渡口花如霰  
相思一日在孤舟空見歸雲兩三片

贈張道士

玉京真子名太一因服日華心如日  
此心不許世人知只向仙宮未曾出



戲呈吳馮

世人不知心是道只言道在他方妙還如瞽者一作老望長安長安在西向東笑

宿山寺寄李中丞洪

第五句缺三字

偶來中峰宿閑坐見真境寂寂孤月心亭亭圓泉影  
滿山花落始知靜從他半夜愁猿驚不廢此心長

杳冥

戲贈吳馮

予讀古人書遂識古人面不是識古人邪正心自見貴義輕財求俗譽一錢與人便驕倨昨朝為火今為水此道非君獨撫膺

感興贈烏程李明府伯宜兼簡諸秀才

門前峴山近無路可登陟徒愛峴山高仰之常歎息不如松與桂生在重巖側

晚秋宿李軍道所居

清溪路不遙都尉每相招落日休戎馬秋風罷射鵰木花生野徑柏實滿寒條永夜依山府禪心共寂寥

送陸判官歸杭州

芳草潛州路乘軺憶再旋餘花故林下殘月舊池邊峰色雲端寺潮聲海上天明朝富春渚應見謝公船

奉和顏使君真卿與陸處士羽登妙喜寺三癸亭

亭即陸生所創

秋意西山多列峯繁左次繕亭歷三癸三癸以癸丑歲癸卯初癸亥日立疏趾鄰什寺元化隱靈蹤始君啟高誅一作誅榛養翹楚鞭草

理芳穗俯砌披水容通天掃峰翠境新耳目換物遠風煙異倚石忘世情援雲得真意嘉林幸勿剪禪侶欣可庇

衛法大臣過佐遊羣英萃龍池護清澈虎節到深遽徒想唵頂期於今沒遺記

奉陪陸使君長源裴端公樞春遊東西武丘寺

雲水夾雙刹遙疑涌平陂入門見藏山元化何繇窺曳組探詭怪停驄訪幽奇情高氣為爽德暖春亦隨瑤草自的礫蕙樓爭蔽虧金精落壞陵劒彩沈古池一覽巾天界中峰步未移應嘉一作嘉生公石列坐援松枝



奉和陸使君長源夏月遊太湖此時公權領湖州

庾公心曠遠府事局耳目遂與南湖遊虛襟滌煩燠始知皇天意積水在亭育細流信不讓動物欣所蓄萬頃

合天容洗然無雲族峭嶺躡仙嶺神仙所居也超遙隨明牧知公愛澄清波靜氣亦肅已見橫流極況聞長鯨戮會北信至

王師已收長安中洲暫採蘋即柳潭汀洲採白蘋之意也南郡思剖竹公時改授信州向夕分好風飄然送歸舳

奉和崔中丞使君論李侍御萼登爛柯山宿石橋寺効小謝體

常愛謝公郡幽期願相從果迴青驄臆共躡玄仙踪靈境若髣髴爛柯思再逢飛梁丹霞接古局蒼苔封往想

冥昧理誰親冰雪容蕙樓聳空界蓮宇開中峰今為仙寺昔是仙山遺局古橋升仙之處見杜昔化冲虛鶴今藏護法龍雲窺香樹杳月見色天

重永夜寄岑寂清言滌心胸盛遊千年後書在巖中松

同顏使君真卿李侍御萼遊法華寺登鳳翅山望太湖

雙峰開鳳翅秀出南湖州地勢抱郊樹山威增郡樓正逢周柱史來會曾諸侯緩步凌彩嶺清鏡發颺颺披雲得

靈境拂石臨芳洲積翠遙空碧含風廣澤秋蕭辰資麗思高論驚精修何似鍾山集微文及惠休

奉陪陸使君長源諸公遊支硎寺寺即支公學道處

嘗覽高逸傳山僧有遺蹤佐遊繼雅篇嘉會何繇逢塵世即下界色天當上峰春暉徧眾草寒色留高松繚繞彩

雲合參差綺樓重瓊苑灑巾烏石湯清心胸靈境若可託道情知所從

奉陪鄭使君諤遊太湖至洞庭山登上真觀却望湖水

郡齋得無事放舟下南湖湖中見仙邸果與心賞俱不遠風物變忽如寰宇殊背雲視層崖別是登蓬壺突兀盤

水府參差杳天衢迴瞻平蕪盡洪流豁中區氣吞江山勢色淨氛靄無靈長習水德勝勢當地樞朝宗動歸心萬

里思鴻途

奉和袁使君高郡中新亭會張鍊師畫會二上人

置亭隱城堞事簡跡易幽公性崇儉素雅才非廣求傍簷竹雨清拂案杉風秋不移府中步登茲如遠遊坐覺

詩思高俯知物役休虛寂偶禪子逍遙親道流更聞臨川作下節安能酬

奉和陸使君長源水堂納涼効曹劉體



柳家陶一作進暑亭意遠不可齊煩襟蕩朱弦高步援綠萸愛公滿亭客來是清風攜澄潭前溪上曠望古郡西六月正中伏水軒氣常淒野香襲荷芰道性親鳧鷖禪子顧惠休逸民重劉黎乃知高世量不以出處睽

夏日奉陪陸使君長源公堂集

府中自清遠六月高梧間寥亮泛雅瑟逍遙扣玄關嶺雲與人靜庭鶴隨公開動息諒兼遂茲情即東山

九日和于使君思上京親故

霽景滿水國我公望江城碧山與黃花爛熳多秋情搖落見松柏歲寒比忠貞歡娛在鴻都是日思朝英

伏日就湯評事衡湖上避暑

大火方燥石停雲晝亦收將從賞心侶寸景難遠遊擁八苦炎伏出門望汀洲迴溪照軒宇廣陌臨梧楸釋悶命雅瑟放情思亂流更持無生論可以清煩憂

奉和顏使君真卿修韻海畢會諸文士東堂重校

外學宗碩儒游焉從後進恃以仁恕廣不學門欄峻著書裨理化奉上表誠信探討始河圖紛綸歸海韻親承大匠琢况觀頽波振錯簡記鈇繫音錘閱書移玉鎮曷繇旌不朽盛美流歌引

喜義興權明府自君山至集陸處士羽青塘別業

應難久辭秩暫寄君陽隱已見縣名花會逢闌是粉本自尋人至寧因看竹引身關白雲多門占春山盡最賞無事心籬邊釣溪近

夏日集李司直縱溪齋

修景屬良會遠颺生煩襟泄雲收淨綠衆木積芳陰疏滌府中務迢迢湖上心習閑得招我賞夜宜泛琴山近資性靜月來寄情深澹然若事外豈藉隳華簪

夏日題桐廬楊明府納涼山齋

陶家無炎暑自有林中峰席上落山影桐梢迴水容放懷涼風至緩步清陰重何事親堆按猶多高世蹤

和楊明府早秋遊法華寺

釋事出縣閣初聞茲山靈寺扉隱天色影剎遙丁丁碧峰委合沓香蔓垂莫苓清景爲公有放曠雲邊亭秋賞



石潭潔夜嘉杉月清誦空性不昧助道跡又經是以於物理紛然若未形移來字人要全與此道冥

宿道士觀

古觀秋木秀冷然屬鮮麗瓊葩被修蔓柏實滿寒條影殿山寂寂寥天月昭昭幽期寄仙侶習定至中宵清佩聞虛步真官方宿朝

冬日天井一作西峰張鍊師所居

採薪逢野泉漸見樓閣所坎坎山上聲幽幽林中語仙鄉何代隱鄉服言亦楚開水一作淨藥苗掃雪候山侶零葉聚敗籬幽花積寒渚冥冥孤鶴性天外思輕舉

奉同顏使君真卿開元寺經藏院會觀樹文殊碑

萬國布殊私千年降祖師雁門傳法至龍藏立言時故實刊周典新聲播魯詩六銖那更拂劫石盡無期奉同盧使君幼平遊精舍寺

影刹西方在虛空翠色分人天霽後見猿鳥定中間真界隱青壁春山凌白雲今朝石門會千古仰斯文

奉同顏使君真卿袁侍御駱駝橋翫月

山中常見月不及共遊時水上恐將缺林端愛落暎鳥驚憲府客人詠鮑家詩永夜南橋望裴回若有期和邢端公登臺春望句句有春字之什

春日繡衣輕春臺別有情春煙間草色春鳥隔花聲春樹亂無次春山遙得名春風正飄蕩春甕莫須傾

經仙人者即沈山下古人沈義一作白日昇仙處

日月人間短何時此得仙古山春已盡遺渚事空傳不見騰雲駕徒臨洗藥泉如今成逝水翻使恨流年

獨遊二首

性野趣無端春晴路又乾逢泉破石弄放鶴向雲看好僻誰相似從狂我自安芳洲亦有意步上白沙灘臨水興不盡虛舟可同嬉還雲與歸鳥若共山僧期世事吾不預此心誰得知西峰有禪老應見獨遊時

遊溪待月

溪色思泛月沿洄欲未歸殘燈逢水店疎磬憶山扉夜浦魚驚少空林鵲遶稀可中纔望見撩亂擣寒衣



西溪獨泛

道情何所寄，素舸漫流間。真性憐高鶴，無名羨野山。經寒叢竹秀，入靜片雲閑。泛泛誰為侶，唯應共月還。

早秋陪韓明府泛阮元公溪公嘗言禪功可入而宜情証能忘故詩中有此意戲之

兩信清殘暑，蕭條古縣西。早涼生浦淑，秋意滿高低。前事雖堆案，閑情得泝溪。何言戰未勝，空寂用還齊。

九日陪顏使君真卿登水樓

重陽荆楚尚高會，此難陪。偶見登龍客，同遊戲。馬臺風文向水，疊雲態擁歌迴。持菊煩相問，捫襟媿不才。

與盧孟明別後宿南湖對月

五一作南湖生夜月，千里滿寒流。曠望煙霞盡，淒涼天地秋。相思路渺渺，獨夢水悠悠。何處空江上，一作裏裴回送一作媿

容舟

自義亭驛送李長史縱夜泊臨平東湖

長亭賓馭散，岐路起悲風。千里勤王事，驅車明月中。寒生洞庭水，夜度塞門鴻。處處堪傷別，歸來山又空。

出遊

少時不見山，便覺無奇趣。狂發從亂歌，情來任闊步。此心誰共證，笑看風吹樹。

界石守風望天竺靈隱二寺

山頂東西寺，江中旦暮潮。歸心不可到，松路在青霄。

奉和顏使君真卿修韻海畢州中重宴

世學高南郡，身封盛魯邦。九流宗韻海，七字揖文江。借賞雲歸潔，留歡月在窗。不知名教樂，千載與誰雙。

晦日陪顏使君白蘋洲集

南朝分古郡，山水似湘東。堤月吳風在，蒹裾楚客同。桂寒初結旆，蘋小欲成叢。時晦佳游促，高歌聽未終。

冬至日陪裴端公使君清水堂集

亞歲崇佳一作高宴，華軒照滌波。渚芳迎氣早，山翠向晴多。推往知時訓，書祥一作雲辨政和。從公惜日短，留賞夜如何。

陪盧判官水堂夜宴



暑氣當宵盡，裴回坐月前。靜依山堞近，涼入水扉偏。久是棲林客，初逢佐幕賢。愛君高野意，烹茗釣淪連。

新秋同盧侍御薛員外白蘋洲月夜

隔著蘋洲近，迎涼欲泛舟。榮從憲府至，喜會夕郎遊。氣奪滄浪色，風欺汗漫流。誰言三伏夜，獨此月前秋。

夏日集裴錄事北亭避暑

前林夏雨歇，為我生涼風。一室煩暑外，衆山清景中。忘歸親野水，適性許雲鴻。蕭散都曹吏，還將靜者同。

與王錄事會張徵君姊妹鍊師院翫雪兼懷清會上人

何意康從事，還來會默仙。寒空驚雪徧，春意入歌偏。瑤草三花發，瓊林七葉連。飄飄過柳寺，應滿譯經前。

和李侍御萼歲初夜集處士書閣

書閣即侍御所創

遲賢新置閣，高意此郊居。古徑行春早，新窗見月初。放歌還倚瑟，講道亦觀書。為我留禪位，來逢此會疎。

湯評事衡水亭會覺禪師

山侶相逢少，清晨會水亭。雪晴松葉翠，煙暖藥苗青。靜對滄洲鶴，閑看古寺經。應憐<sup>一作</sup>關子<sup>一作</sup>了義，共心冥。

與朝陽山人張朝夜集湖亭賦得各言其志

洞庭孤月在，秋色望無邊。零露積衰草，寒蟬鳴古田。茫茫區中想，寂寂塵外緣。從此悟浮世，胡為傷暮年。

晦夜李侍御萼宅集招潘述湯衡海上人飲茶賦

晦夜不生月<sup>一作</sup>可坐<sup>一作</sup>琴軒，猶為開墻東。隱者在淇上，逸僧來茗愛。傳花飲詩看，卷素裁風流。高此會曉景，屢裴回。

寄昱上人上方居

厭向人間住，逢山欲懶歸。片雲閑似我，日日在禪扉。地靜松陰徧，門空鳥語稀。夜涼疎磬盡，師友自相依。

夏日與綦母居士昱上人納涼

為依爐峰住，境勝增道情。涼日暑不變，空門風自清。坐援香實近，轉愛綠蕪生。宗炳青霞士，如何知我名。

建元寺集皇甫侍御書閣

不因居佛里，無事得相逢。名重朝端望，身高俗外蹤。公愛講經嘗云某劉處士深詣至理機關看淨水，境寂聽疎鐘。宣室恩長在，知君志

未從



郭北尋徐主簿別業

近依城北住幽遠少人知積雪行深巷開雲繞古籬竹花冬更發橙實晚仍垂還共巖中鶴今朝下淥池

題報德寺清幽上人西峰寺即陳文帝故鄉

陳世凋亡後仁祠識舊山帝鄉喬木在空見白雲還雙塔寒林外三陵暮雨間此中難一作難戰勝君獨啟禪關

題鄭谷江畔桐齋鄭生好琴性遠兼慕欲

客齋開別住坐占綠江濱流水非外物閑雲長屬君浮榮未可累曠達若為羣風起高梧下清弦日日聞

和閻士和李蕙冬夜重集

郡理日閑曠洗心宿香峰雙林秋見月萬壑靜聞鐘珮玉行山翠交麾動水容如何股肱守塵外得相從

春日陪顏使君真卿皇甫曾西亭重會韻海諸生

為重南臺客朝朝會魯儒暄風衆木變清景片雲無峰翠飄簷下溪光照座隅不將簪艾隔知與道情俱

寒食日同陸處士行報德寺宿解公房一本無此字

古寺一作發開章陵下一作潛一作支公住幾年安心生輒草灌頂引春泉一作亂山春獨寂寂傳燈地寥寥禁火天世間一作人多暗

室白日為誰懸

兵馬曹季良宅夜集

清景不可失尋君趣有餘身高避事後一作外道長問心初出處名則異遊從跡何疎吟看刻盡燭笑卷讀殘書露

彩生筆硯風音入庭除平明仙侶散殷鯨動迴車

同李侍御萼李判官集陸處士羽新宅

素風千戶敵新語陸生能借宅心常遠移籬力更弘鈞絲初種竹衣帶近裁藤戎佐推兄弟詩流得友朋柳陰

容過客花徑許招僧不為墻東隱人家到未曾

題報恩寺惟照上人房

上界兩色乾涼宮日遲遲水文披菡萏山翠動罨思中有清真子惜惜步闌輝手紫頰黎纒願證黃金姿旋草

堦下生看心當此時亦名菡萏草枝葉皆石旋故名旋草草有五德



尋天目徐君

常見仙翁變姓名豈知松子號初平  
逢人不道往來處賣藥還將雞犬行  
獨鶴天邊俱得性浮雲世上共無情  
三花落地君猶在笑撫安期昨日生

同李著作縱題塵外上人院

百緣唯有什公瓶萬法但看一字經  
從遣鳥喧心不動任教香醉境常冥  
蓮花天晝浮雲卷貝葉宮春好月停  
禪伴欲邀何著作空音宜向夜中聽

題周諫別業

于寺與周生所居俱臨茗水

隱身茗上欲如何不著青袍愛綠蘿  
柳巷任疎容馬入水籬從破許船過  
昂藏獨鶴關心遠寂歷秋花野意多  
若訪禪齋遙可見竹窗書幌共煙波

同李中丞洪水亭夜集

佳人但一作且莫吹參差正憐月色生  
酒卮山公一作翁取醉不關我為一作自愛尊前白鷺鷥

題秦系山人麗句亭

獨將詩教領諸生但看青山不愛名  
滿院竹聲堪愈疾亂牀一作牀花片足忘情

春夜集陸處士居

一本無此字翫月

欲賞芳菲一作不待辰一作晨忘情人訪有情人  
西林可一作豈是無清景祇為忘情不記春

寄題雲門寺梵月無側房

時人相傳是實月道人後身也

越山千萬雲門絕西僧貌古還名月  
清朝掃石行道歸林下眠禪看松雪

法華寺上方題江上人禪空

路入松聲遠更奇山光水色共參差  
中峰禪寂一僧在坐對梁朝老桂枝

冬日山行過一作過薛徵君

我行倦修坂四顧無平陸兩霽鳴鷹鷄  
天寒聚麋鹿幽人訪名士家在南岡曲  
菜實繁小園稻花遶山屋深居寡憂悔  
勝境怡耳目微心尚與我永言謝浮俗



往丹陽尋陸處士不遇

遠客殊未歸我來幾惆悵叩關一日不見人繞屋寒花笑寂寂編荒阡柳色蕭蕭愁暮蟬行人無數不相識獨立雲陽古驛邊鳳翅山中思本寺魚竿村口望歸船歸船不見見寒煙離心遠水共悠然他日相期那可定閑僧著處即經年

集湯評事衡湖上望微雨

蒼涼遠景中雨色綠山有雲送滿洞庭風吹繞楊柳蕭蕭解輕袂盡日隨林叟

九日與陸處士羽飲茶

九日山僧院東籬菊也黃俗人多泛酒誰解助茶香

夜過康錄事造會兄弟

愛君門館夜來清瓊樹雙枝是弟兄月在詩家偏足思風過客位更多情

題沈少府書齋

不下南昌縣書齋每日閑野花當砌落溪鳥逐人還有異常臨水無時不見山千峰數可盡不出小窗間

春夜與諸公同宴呈陸郎中

南國宴佳賓交情老倍親月慙紅淚燭花笑白頭人寶瑟<sub>一作</sub>絃<sub>一作</sub>絃餘怨瓊枝不讓春更聞歌子夜桃李豔妝新

九日阻雨簡高侍御

江上重雲起何曾衰塵不能成落帽翻欲更摧巾素髮開依枕黃花暗待人且應攜下價芒屨就諸鄰<sub>第二句映一字</sub>

晚春尋桃源觀

武陵何處訪仙鄉古觀雲根路已荒細草擁壇人跡絕落花沈澗水流香山深有雨寒猶在松老無風韻亦長

全覺此身離俗境玄機亦可照迷方

同盧使君幼平郊外送閣侍御歸臺

留餞飛旌駐離亭草色間柏臺今上客竹使舊朝班日落東西水天寒遠近山古江分楚望殘柳入隋關戀闕

心常積迴軒日不閑芳辰倚門道猶得及春還



送梁拾遺蕭歸朝

明主重文諫才臣出江東東書辭東山改服臨北風萬里望皇邑九重當曙空天開芙蓉闕日上蒲桃宮天子初未起金閨籍先通身逢軒轅世名貴駕鸞中故人榮此別何用悲絲桐

奉陪楊使君頊送段校書赴南海幕

碩賢靜廣州信爲天下貞屈茲大將佐藉彼延閣英聲動柳吳與郊餞意不輕吾知段夫子高論關蒼生處以德爲藩出則道可行遙知南樓會新景當詩情天高林瘴洗秋遠海色清時泰罷飛檄唯應頌公成

送陸侍御士佳赴上京

長安三千里喜行不言永清路黃塵飛大河滄流靜更懷西川府主公昔和鼎伊鬱瑤瑟情威遲花驄影此時已難別日又無停景出錢閣相從心隨過前嶺

奉陪顏使君真卿登峴山送張侍御嚴歸臺

峴首千里情北轍自茲發煙霞正登覽簪筆限趨謁黃鶴望天衢白雲歸帝關客心南浦柳離思西樓月留賞景不延一作不延景感時芳易歇他晨有山信一爲訪林樾

酬元主簿子球別贈

故人方遠適訪我陳別情此夜偶禪室一言了無生覽君緘中寶如舉清玉瑛胡爲蘊高價歲晚徒營營辭秩貧且病何人見艱貞出無黃金橐空歌白苧行威遲策駑馬獨望故關樹渺渺千里心春風起中路近聞新拜命鸞鳳猶棲棘勸君寄一枝且養冥冥翼甘泉多竹花明年待君食

答道素上人別

春色徧遠道寂寞閩中行碧水何渺渺白雲亦英英離人不可望日暮芳洲情黃鶴有逸翮翹首白雲傾欲爲山中侶冑祕遼天聲藍縷眞子褐巖巖近臣纓以茲奪爾懷常恐道不成吾門弟子中不減惠休名一性研已遠五言功更精從君汗漫遊莫廢學無生忍草冑搖落禪枝不枯榮采采慰長路知吾心不輕幼情有去住眞性無離別留取老桂枝歸來共攀折



雲溪館送韓明府章辭滿歸

洛令從告還故人東門饒惠愛三年積軒車一夜遠曉月離館空秋風故山晚榮君有嘉薦顧我阻遊衍宿昔峰頂心依依不可卷

送穆寂赴舉

天子錫玄纁傾山禮隱淪君拋青霞去榮資觀國寶劍光既陸離瓊彩何璘玢夙駕別情遠商弦秋意新冥冥鴻鵠姿數尺看蒼旻殘寇近宋郊西行惡颺塵立身素耿介處難思經綸春府搜才日高科得一人

送張一本有仲字彝歸長沙

早聞凌雲彩謂在鴛鴦儔華髮始相遇滄江仍旅遊策名忘苟進澹慮輕所求常服遠遊誠緬懷經世謀片帆背風渚萬里還湘洲別望荆雲積歸心漢水流蘭若行采采桂權思悠悠宿昔無機者為君動離憂

秋日毘陵南寺送潘述之揚州

孤客秋易傷嘶蟬靜仍續佳晨亦已屢歡會常不足禪地非路岐我心豈羈束情生遠別時坐恨清景促望中千里隔暮歸西山曲蕭條月中道彩蒨原上綠不見同心人幽懷增躑躅

春日又送潘述之揚州

別渚望邗城岐路春日徧柔風吹楊柳芳景流郊甸日日東林期今夕異鄉縣文房曠佳士禪室阻清盼潘生曾受揮印離恨奪賞心不得諧所願莫憶山中人碧雲遙可見

新秋送盧判官

故人念宿昔欲別增遠情入座炎氣屏為君秋景清絲來空山客不怨離弦聲唯有暮蟬起相思碧雲生

奉送袁高使君詔徵赴行在效曹劉體

皇心亭毒廣整賊皆陶甄未刈蚩尤旗方同軒后年天子幸漢中輾轅阻氣煙壘書召幕一作英牧名在列岳仙國難倚長城廟謀資大賢清損休汝騎仁留述職篇遐路渺天末繁笳思河邊飾徒促遠期祇命赴急宣謏才豈足稱深仁顧何偏那堪臨流意千里望旗旄

奉送陸中丞長源詔徵入朝



詔下鄴侯幕徵賢寵上一作勳才當持漢典道可致堯君藩牧今榮饒詩流此盛文水從吳渚別樹向楚門分宿寺  
期嘉月看山識故雲歸心復一作何柰一作怊悵在江濱

奉送李中丞道昌入朝

文憲中司盛恩榮外鎮崇諸侯皆取則八使獨推功詔喜新銜鳳車看舊飾熊去思今武子餘教昔文翁清在一作  
如江水仁留是國風光一作徵二千石掃第望司空

冬日一本有奉字

送顏延之明府撫州觀叔父一作觀省

臨川千里別惆悵上津橋日暮人歸盡山空雪未消鄉雲心渺渺楚水路遙遙林下方歡會山中獨寂寥天寒驚  
斷鴈江信望迴潮歲晚流芳歇思君在此宵一作紫霄

送關小師還金陵

如何有歸思愛別欲忘難白鷺沙洲晚青龍水寺寒蕉花鋪淨地桂子落空壇持此心為境一作鏡應堪月夜看

峴山送裴秀才赴舉

漢家招秀士峴上送君行萬里見秋色兩河傷遠一作情王師出西鎬虜寇避一作東平天府登名後迴看楚水清

酬別襄陽詩僧少微詩中答上人歸夢之意

證心何有夢示說夢歸頻文字齋秦本詩騷學楚人蘭開衣上色柳向手中春別後須相見浮雲是我身

送契上人遊揚州

西陵古江口遠見東揚州淥水不同泛春山應獨遊尋僧白巖寺望月謝家樓宿昔心期在人寰非久留

送德清衛明府赴選時柳點時有薦狀

八使慎求能東人獨薦君身猶千里限名已九霄聞遠路翻喜別離言暫惜分鳳門多士會擁佩入卿雲

送鄭孝廉淮西覲省

離袂翠華滿晨羞欲早行春風生楚樹曉角發隋城野霽一作濕衣彩江鴻增客情征途不用戒坐見一作白波清

送沈秀才之閩中

越客不成歌春風起淥波嶺重寒不到海近瘴偏多野戍枕柳發人家翡翠過翻疑此中好君問定如何



送清會上人遊京

佳遊限衰疾一笑向西風思見青門外曾臨素澹東峰明雲際寺名寺日出露寒宮名宮行道禪長在香塵不染空

送沈居士還太原

辭官一作因世難家族盛南朝名重郊居賦沈休文作才高獨酌謠沈文浪花飄一葉峰色向三條高逸雖成性弓旌肯

忘一作招

同顏使君真卿峴山送李法曹陽水西上獻書時會有詔徵赴京

漢日中郎妙周王太史才雲書捧日去鶴版下天來草見吳洲一作發花思御苑開羊公惜一作風景欲別幾遲迴

兵後送姚太祝赴選

兩河兵已偃處處見歸舟日夜故人散江臯芳樹秋楚雲傷遠思秦月憶佳遊名動春官籍翩翩才少儔

兵後送薛居士移家安吉

舊遊經喪亂道在復何人寒草心易折閑雲性常真交情別後見詩句比來新向我挑州住惜君東嶺春

送鄔修之洪州觀兄弟

年少足詩情西江楚月清書囊山翠濕琴匣雪花輕久別經離亂新正憶弟兄贈君題樂府為是豫章行

送乾封李成

羽檄飛未息離情遠近同感君繇泛瑟關我是征鴻眇默歸人盡疎蕪夜渡空還期當歲晚獨在路行中

送崔判官還揚子

輕傳祗速役依依下姑亭秋聲滿楊柳暮色繞郊垆煙水搖歸思山當楚驛青

奉酬袁使君西樓餞秦山人與晝同赴李侍御招三韻

秋風怨別情江守上西城竹署寒流淺琴窗宿雨晴治書招遠意知共楚狂行

送清涼上人

何意欲歸山道高縣境勝花空覺性了月盡知心證永夜出禪吟清後自相應

送李丞使宣州



結駟何翩翩落葉暗寒渚夢裏春穀泉愁中洞庭雨聊持剡山茗以代宣城醕

送至洪沙彌遊越

知爾學無生不應傷此別相逢宿我寺獨往遊靈越早晚花會中經行剡山月

送皇甫侍御曾還丹陽別業

雲陽別夜憶春耕花發菱湖問去程積水悠揚何處夢亂山稠疊此時情將離有月教弦斷贈遠無蘭覺意輕

朝右要君持漢典明年北墅可須營

白蘋洲送洛陽李丞使還

蘋洲北望楚山重千里迴輶止一封臨水情來還共載看花醉去更相從罷官風渚何時別寄隱雲陽幾處逢

後會那應似疇昔年年覺老雪山容

送履霜上人還金陵西山

攜錫西山步綠莎禪心未了奈情何湘宮水寺清秋夜月落風悲松柏多

送辨聰上人還廣陵

莫學休公學遠公了心須一作與我心同隋家古柳數株在看取人間萬事空

送清勵上人遊福建

禪子自矜禪性成將來一作擬照建溪清南看閩樹花不落更取何緣一作了妄情

送顧道士遊洞庭山

見說洞庭無上路春遊亂踏五靈芝含桃風起花狼籍正是仙翁碁散時

送邢台州濟一作送獨孤使君赴岳州

海上仙山屬使君石橋琪樹古一作來聞他時畫出白團扇乞取天台一片雲

送柳察諫議叔

東城南陌強經過怨別無心亦放歌明日院一作公應問我閑雲長在石門多

送柳淡扶侍赴洪州此子素少官情共予有西山之好



中林許師友忽阻夙心期自顧青緇好來將黃鶴辭少年輕遠涉世道得無欺煙雨孤舟上晨昏千里時離魂  
渺天末相望在江渚無限江南柳春風卷亂絲

同李司直題武丘寺兼留諸公與陸羽之無錫

陵寢成香阜禪枝出白楊劔池留故事月樹即他方應世緣須別栖心趣不忘還將陸居士晨發泛歸航

夏日題鄭谷江上納涼館

迢遙山意外清風又對君若爲於此地翻作路岐分別館琴徒語前洲鶴自羣明朝天畔遠何處逐閑雲

太湖館送殷秀才赴舉

春風洞庭路搖蕩暮天多衰疾見芳草別離傷遠波詩名推首薦賦甲擬前科數日聞天府山衣製芰荷

送重鈞上人遊天台

漸看華頂出幽賞一作隨生十里行松色千重過水聲海容雲正盡山色雨一作初晴事事將心證知君道可成

早春送顏主簿遊越東兼謁元中丞

輕舸趣不已東風吹綠蘋欲看梅市雪知賞柳家春別意傾吳甯一作芳聲動越人山陰三月會內史得嘉賓

同顏使君清明日遊因送蕭主簿

誰知賞嘉節別意忽相和暮色汀洲徧春情楊柳多高城戀旌旆極浦宿風波惆悵支山月今宵不再過

送道琚上人還金陵

一與鍾山別山中得信稀經年求法後及夏問安歸野實充甘膳池花當綠衣慈親莫返拜外禮欲無爲

送裴邕之上京

辭山偶世清挾策忽西行帆過隨江疾衣霑楚雪輕尚文須獻賦重道莫論兵東觀今多事應高白馬生

送珍上人還天竺兼寄廣通上人秦山人

江寺名天竺多居躡遠蹤春帆依柳浦輕履上蓮峰禪子兼三隱空書共一封因君達山信應向白雲逢

送張孝廉赴舉

名在諸生右家經見素風春田休學稼秋賦出儒宮別路殘雲濕離情晚桂叢明年石渠署應繼叔孫通



送劉司法之越一本有州字

蕭蕭鳴夜角驅馬背城濛雨後寒流急秋來朔吹高三山期望海八月欲觀濤幾日西陵路應逢謝法曹

送簡栖上人之建州觀使君舅

亂峰江上色羨爾及秋行釋氏推真子鄰家許貴甥  
海人以木葉為帆花新雨淨帆葉好風輕千里依元舅迴潮亦有情

一作迴棧有遠情

登開元寺樓送崔少府還平望驛

登望思慮積長亭樹連連悠揚下樓日杳映傷帆煙入夜四郊靜南湖月待船

送王居士遊越

野性配雲泉詩情屬風景愛作爛熳遊閑尋東路永何山最好望須上蕭然嶺

雜言重送皇甫侍御曾

人獨歸日將暮孤帆帶孤嶼遠水連遠樹難作別時心還看別時路

送演上人之撫州觀使君叔

臨川內史憐諸謝爾在生緣比惠宗遠別應將秦本去幽尋定有楚僧逢停船夜坐親孤月把錫秋行入亂峰

便道須過大師寺白蓮池上訪高蹤

送大寶上人歸楚山

厭上烏橋送別頻湖光爛熳望行人欲將夜舸陪嘉月曾住空林伴老身獨鶴翩翩飛不定歸雲蕭散會無因從

何得道懷惆悵莫是人間屢見春

送侯秀才南遊

芳草隨君自有情不關山色與猿聲為看巖子灘頭石曾憶題詩不著名

別一作送洞庭維諒上人

白雲關我不關他此物留君情最多情一作憶著春風生橘樹歸心不怕洞庭波

康造錄事宅送太祝姪之虔吉訪兄弟



阮咸別曲四座愁賴是春風不是秋漫漫江行一作帆訪兄弟獲聲幾夜宿蘆洲

冬日梅溪送裴方舟宣州

平明正一作走馬上村橋花發一作落梅溪雪未消日短天寒愁送客楚山無限路遙遙一作遙

送韋向睦州謁獨孤使君沔

才子南看多遠情開舟蕩漾任春行新安江色長如此何似新安太守清

送至嚴山人歸山一作送嚴上人

初到人間柳始陰山書昨夜報春深朝朝花落幾株樹惱殺禪僧一作僧未證心

送僧遊揚州

平明擇鉢一作環錫向風輕正及隋堤柳色行知爾禪心還似我故宮春物一作草冑傷情

對陸迅飲天目山茶因寄元居士晟

喜見幽人會初開野客茶日成東井葉露採北山芽文火香偏勝寒泉味轉嘉投鐺湧作沫著椀聚生花稍與禪

經近聊將睡網除知君在天目此意日無涯

渡前溪

不意入前溪愛溪從錯落清清鑑不足非是深難度

送靈澈

我欲長生夢無心解傷別千里萬里心只似眼前月

寄路溫州

欲問采靈藥如何學無生愛鶴頗似君且非求仙情

浣紗女一作王維詩題云白石灘

清淺白沙灘綠蒲尚堪把家住水東西浣紗明月下

待山月

夜夜憶故人長教山月待今宵故人至山月知何在



雜興

人生分已定富貴豈妄來不見海底泥飛上成塵埃

春陵登望

西底空流水東垣但聚雲最傷梅嶺望花雪正紛紛

投知己

若爲令憶洞庭春上有閑雲可隱身無限白雲山要買不知山價出何人

兵後餘不亭重送盧孟明遊江西

孟明常引支子元道人修習禪心兼餌芝朮遂與予有棲山之契其宦情未遣故勸勉之

攜手曾此分况如隔胡越倫侯古封邑榮盛風雨歇飢懸號空亭野草生故轍如何此路岐更作千年別馮軾望遠道春山無斷絕朝行入郢樹夜泊依楚月佳士持操高揚才日昭晰離言何所贈盈滿有虧缺時節傷蟪蛄芳菲忌鷓鴣予思鹿門隱心跡貴冥滅顏反芝朮昔貌成冰雪歲晏期爾來銷聲坐巖穴

別山詩

時因主人寄風溪蘭若與道士石鵬峰相鄰禪僧仙師時得道會至秋中值外緣有請別山懷舊遂有

是詩

山翁亦好禪借我風溪樹採藥多近峰一作秋遠汲泉有春渡幽僧時相偶一作遇仙子或與晤自許戰勝心彌高獨遊步如

何區中事奪我林棲趣辭山下復上戀石行仍顧宿昔情或乖庶幾跡無誤松聲莫相誚此心冥去住

同袁高使君送李判官使迴

庾公歡此別路遠意猶賒爲出塘邊柳榮歸府中花馳陽照古堞遙思凝寒笳延步下前渚泝觴流淺沙湖光引

行色輕舸傍殘霞

陪顏使君餞宣諭蕭常侍

江濤凋瘵後遠使發天都昏墊宸心及哀矜詔命敷恤民驅急傳訪舊枉征艦外鎮藩條最中朝顧問殊文皆正



風俗名共溢寰區已事方懷闕歸期早戒塗繁笳咽水閣高蓋擁雲衢暮色生千嶂秋聲入五湖離歌猶宛轉歸馭已踟躕今夕庾公意西樓月亦孤

奉陪顏使君修韻海畢東溪泛舟餞諸文士

諸侯崇魯學羔鴈日成羣外史刊新韻中郎定古文魯公若書依切韻起東字脚皆列古篆菁華兼百氏一作素備三墳國語思開物王言欲致君研精業已就懽宴惜應分獨望西山去將身寄白雲

今上初登極歲送皇甫孝廉赴選光祿即故大夫之子

行應會府春欲勸及芳辰北極天文正東風漢律新少年逢聖代歡笑別情親況是勳庸後恩榮襲爾身

同楊使君白蘋洲送陸侍御士佳入朝

久愛吳興客來依道德藩旋師聞杜歸路憶轅轅舊佩蒼玉在新歌白芷繁今朝天地靜北望重飛翻

雪夜送海上人常州觀叔父上人殷仲文後

繼世風流在傳心向一燈望雲裁衲慣翫雪步花能交戰情忘久銷魂別未曾明朝阮家集知有竹林僧

送常清上人還舒州

濤徐林反人思爾法楚信有迴船估客親宵語閑鷗偶晝禪經聲含石激塵尾拂江煙常說歸山意誅茅廬霍前

峴山送崔子向之宣州謁裴使君

楚思入詩清晨登峴山情秋天水西寺古木宛陵城琴匣應將往書車亦共行吾知江太守一顧重君名

送嚴明府入關謁黎京兆

春日異秋風何為怨別同潮迴芳渚沒花落畫山空旅候聞嘶馬殘陽望斷鴻應思右內史相見直城中

送丘秀才遊越

山情與詩思爛熳欲何從夜舸誰相逐空江月自逢春期越草秀晴憶剡雲濃便擬將輕錫攜居入亂峰

送楊校書還濟源

妖烽昨日靜故里近嵩丘楚月搖歸夢江楓見早秋鄉心無遠道北信減離憂禪子還無事辭君買沃州

送楊遂初赴選



秋風吹別袂客思在長安若得臨觴醉何須減瑟彈素心凌竹柏仗信越波瀾春會文昌府思君每北看

送贊上人還京

久遊春草盡還寄北船歸沙鳥窺中食江雲入一作滿淨衣秦原山色近楚寺磬聲微見說翻經館多聞一作稀

送廣通上人遊江西

香爐七嶺秀秋色九江清自古多禪隱吾常愛此行尋師經鄂渚受請到青城離別人間事何關道者情

送羅判官還壽州幕

君章才五色知爾得家風故里旋歸駕壽春思奉戎天寒長蛇伏鷓烈文虎雄定領張征虜桓桓戮難功

送李秀才赴婺州招

山開江色上孤賞去應遲綠水迎吳榜秋風入楚詞一作詞猿清獨宿處木落遠行時見說東陽守登樓為爾期

送薛逢之宣州謁廢使一作謁裴使君

六月鵬盡化鴻飛獨冥冥秋烽家不定險路客頻經牛渚何時到漁船幾處停遙知詠史夜謝守月中聽

送德守二叔姪上人還國清寺觀師

道賢齊二阮俱向竹林歸古偈穿花線春裝卷葉衣僧墟迴水寺佛隴啓山扉愛別吾何有人心強有違

同明府章送沈秀才還石門山讀書

身為郢一作令客心許楚山雲文墨應經世林泉漫誘君欲隨樵子去惜與道流分官謝申公輩治詩事漢文

送吉判官還京赴崔尹幕

江南梅雨天別思極春前長路飛鳴鶴離帆聚散煙清晨趨九陌秋色望三邊見說王都尹山陽辟一賢

送襄判官赴商幕

商洛近京師才難赴幕時離歌紛白紵候騎擁青絲會喜疲人息應逢得虜衰看君策高足自此煙霄期

送李喻之處士洪州謁曹王

獨思賢王府遂作豫章行雄鎮廬霍秀高秋江漢清見聞驚苦節艱故傷遠情西邸延嘉士遺才得正平

送唐贊善遊越

全唐詩 卷三十 皎然五 十九



田園臨漢水離亂寄隨關今日煙塵盡東西又未還長亭百越外孤權五湖間何處遊芳草雲門千萬山

送韋秀才

晨裝行墮葉萬里望桑乾舊說涇關險猶聞易水寒黃雲戰後積白草暮來看近得君苗信時教旅思寬

送陳秀才赴舉

諸侯懼削地選士皆不羈休隱脫荷芟將鳴矜羽儀甲科爭玉片詩句擬花枝君實三楚秀承家有清規

烏程李明府水堂同盧使君幼平送樊上人遊五臺

身將劉令隱經共謝公翻有此宗師在應知我法存問心常寂樂為別豈傷魂獨訪華泉去秋風入雁門

送李季良北歸

風吹殘柳絲一作綠孤客欲歸時掩抑楚弦絕離披湘葉衰前軍猶轉戰故國杳難期北望鴈門雪空吟平子詩

送淳于秀才蘭陵覲省

歡言欲忘別風信忽相驚柳浦歸人思蘭陵春草生擷芳心未及視枕戀常盈此去非長路還如千里情

送至洪沙彌赴上元受戒

上元江中祭州有梁戒壇

不肖資章甫勝衣被木蘭今隨秣陵信欲及蔡州壇野寺鐘聲遠春山戒足寒歸來次第學應見後心難

九日同盧使君幼平吳興郊外送李司倉赴選

重陽千騎出送客為踟躕曠野多搖落寒山滿路隅晴空懸菡萏秋色起菱湖幾日登司會揚才盛五都

送盧孟明還上都

江臯北風至歸客獨傷魂楚水逢鄉雁平陵憶故園征驂嘶別館落日隱寒原應及秦川望春華滿國門

送李少賓赴舉

豈謂江南別心如塞上行苦雲搖陣色亂木攪秋聲周谷雨未散漢河流尚橫春司遲爾策方用靜妖兵

留別闍士和

不慣人間別多應忘別時逢山又逢水只畏一作却却一作恐來遲

送李道士



常隨山上下忽限江南北共是忘情人何繇有相憶

送裴參軍還下邳舊居

北望煙鋪一作鋪驃騎營虜烽無火楚天晴此時千里西一作思歸客泗上春風得及一作返耕

送文會上人還富陽

悠悠渺渺屬一作涉寒波故寺思歸意若何長憶孤洲一作舟二三一作三月春山偏愛一作賞富春一作陽多

送維諒上人歸洞庭

從來湖上勝人間遠愛浮雲獨自還孤月空天見心地寥寥一水一作鏡中山

九月八日送蕭少府歸洪州

明日重陽今日歸布帆絲雨望霏霏行過鶴渚知堪住家在龍沙意有違

同顏魯公泛舟送皇甫侍御曾

維舟若許暫從容送過重江不厭重霜簡別來今始見雪山歸去又難逢

送孫侍御遊越

不知持斧客吟會是何情丹陛恩猶在滄洲賞暫行江橈隨月泛山策逐雲行佳句傳零雨詩流許盛名

送顏處士還長沙觀省

西候風信起三湘孤客心天寒漢水廣鄉遠楚雲深服綵將侍膳擷芳思滿襟歸人忘一作志艱阻別恨獨何任

送還本上人遊江西

欲廣分何教心將江漢期雲招望寺處月待沂杯時真侶誰傷別降猿汝自悲多應過廬阜幽賞却來遲

送路少府使京兼親侍御兄

國賦推能更今朝發貢湖佇瞻雙闕鳳思見柏臺烏樹向秦關遠江分楚驛孤榮君有兄弟相繼騁長途

於武原從送盧士舉

落日獨歸客空山正一作走馬嘶蕭條古關外岐路更東西大澤雲寂寂長亭雨淒淒君還到湘水寒夜滿猿啼

送烏程李明府得陟狀赴京



驛吏滿江城深仁見此情士林推玉振公府薦冰清為政移風久承恩就日行仲容綸綍貴南巷有光榮  
送裴秀才往會稽山讀書

一身齋萬卷編室寄煙蘿硯滴穿池小書衣種楮多吟詩山響答泛瑟竹聲和鶴板求儒術深居意若何

送崔詹事論之上都

崔言典  
吳興

金虎城池在銅龍劍珮新重看前浦柳猶憶舊洲蘋遠思秦雲暮歸心臘月春青園昔遊處惆悵別離人

京口送盧孟明還揚州

蕭蕭北風起孤櫂下江濱暮客去來盡春流南北分萋萋御亭草渺渺蕪城雲相送目千里空山獨望君

送沙彌大智遊五臺

童年隨法侶家世本儒流章句三生學清涼萬里遊雲歸龍沼暗木落鴈門秋長老應一作相問一作傳予向祖州

送粟上人遊越

雲泉誰不賞獨見爾情高投石輕龍窟臨流笑鷺濤折荷為片席灑水淨方袍剡路逢禪侶多應問我曹

送潘秀才之舒州

楚水清風生揚舲泛月行荻洲寒露彩雷岸曙潮聲東道思才子西人望客卿從來金谷集相繼有詩名

送王山人遊廬山

千里訪靈奇山資亦相隨葉舟過鶴市花漏宿龍池峰頂應閑散人間足別離白雲將世事吾見爾心知

送道契上人之越觀大夫叔

楚僧推後輩唐本學新經外國傳香艷何人施竹瓶秋風別李寺春日向柯亭大阮今為郡看君眼最青

送沙彌長文遊京

白版年猶小黃花褐已通若為詩思逸早欲似休公邁俗多真氣傳家有素風應須學心地宗旨在關東

秋日送擇高上人往江西謁曹王

超然獨遊趣無限別山情子病不同賞雲閑應共行齋容秋水照香艷早風輕曾被陳王識遙知江上迎

送如獻上人遊長安



關中四子教猶存見說新經待爾翻為法應過七祖寺忘名不到五侯門閑尋郭杜看脩竹獨上風涼望古原  
高逸詩情無別怨春遊從遣落花繁

日曜上人還潤州

送君何處最堪思孤月停空欲別時露茗猶芳邀重會寒花落盡不成期鶴令先去看山近雲礙初飛到寺遲  
莫倚禪功放心定蕭家陵樹誤人悲

寺院聽胡笳送李殷

一奏胡笳客未停野僧還欲廢禪聽難將此意臨江別無限春風葭菼青

送僧一作李繹

斜日搖一作悠揚在柳絲孤亭寂寂水逶迤誰堪別後行人盡唯有春風起路岐

荅襄評事登荻花間送梁肅拾遺

波一作江上荻花非雪花風吹撩亂滿袈裟如今歲晏無芳草獨對離樽作物華

送勝雲小師

昨日雪山記一作知爾名吾今坐石已三生少年道性易流動莫遣秋風入別情

誚士和別

今日同明日隔何事悠悠久為客君憐溪上去來雲我羨磷磷水中石

送吳馮遊京

北期何意促蕙草夜來繁清月思淮水春風望國門此時休旋逸萬里忽飛翻若憶山陰會孤琴為我援

送僧遊宣州一作宣城

楚山千里一僧行念爾初緣道未成莫向舒姑泉口泊此中嗚咽為一作易傷情

宿支硎寺上房

上方精舍遠共宿白雲端寂寞千峰夜蕭條萬木寒山光霜下見松色月中看却與西林別歸心即欲闌

荅胡處士



西山禪隱比來聞長道唯應我與君書上無名心忘却人間聚散似浮雲

答張烏程

莫道謫官無主人秣陵才今日相親前溪更有忘憂處荷葉田田間白蘋

酬張明府

愛君詩思動禪心使我休吟待鶴吟更說郡中黃霸在朝朝無事許招尋

勞山居寄呈吳處士

官居鼎鼎古今無名世才臣獨一余賢閣御題龍墨燦詔歸補袞在須臾

從軍行五首

候一作雙騎出紛紛元戎霍冠軍漢鞞秋駘地羌火晝燒雲萬里戈一作戎城合三邊羽檄分烏孫驅未一作不盡宵顧遼陽勲

韓旆拂丹霄漢軍新破遠紅塵驅鹵簿白羽擁嫖姚戰苦軍猶樂功高將不驕至今丁零塞朔吹空蕭蕭

百萬逐呼韓頻年不解鞍兵屯絕漠暗馬飲濁河乾破虜功未錄勞師力已殫須防肘腋下飛禍出無端

飛將下天來奇謀闔外裁水心龍劍動地肺鴈山開望氣燕師銳當鋒虜陣摧從今射鵰騎不敢過雲堆

黃紙君王詔青泥校尉書誓師張虎落選將擐犀渠霧暗津蒲一作蒲失天寒塞柳疎橫行十萬騎欲掃虜塵餘

隴頭水二首

隴頭一作西水一作心欲絕隴水不堪聞碎影搖槍壘寒聲咽慢軍素從鹽海積綠帶柳城分日落天邊望透迤入塞雲

秦隴逼氐羗征人去未央如何幽咽水併欲斷君腸西注悲窮漢東分憶故鄉放魂聲攪亂無夢到咸陽一作咸陽

塞下曲二首

寒塞無因見落梅胡人吹入笛聲來勞勞亭上春應度夜夜城南戰未迴

都護今年破武威胡沙萬里鳥空飛旄竿瀚海掃雲出羶騎天山蹋雪歸

覽史

黃綺皆皓髮秦時隱商山嘉謀匡帝道高步遊天關不愛珪組緹却思林壑還放歌長松下日與孤雲閑



詠史

獨負高世資冥冥寄浮俗卞子去不歸何人辨荆玉  
獨春意不淺汚迹身豈辱鸞殿樂遠遭虬蟠甘窘束  
五噫謫且正可以見心曲

詠史

田氏門下客馮公衆中賤一朝市義還百代名獨擅  
始知下客不可輕能使主人功業成借問高車與  
珠履何如卑賤一書生

讀張曲江集

相公乃天蓋一作啓人文佐生成立程正頽靡繹思何縱橫  
春行弄緝綺陽林敷玉英飄然飛動姿邈矣高簡情後輩  
驚失步前修敢爭衡始欣耳目遠再使機慮清體正力已全  
理精識何妙昔年歌陽春徒推郢中調今朝聽鸞鳳  
豈獨羨一作蘇門嘯帝命鎮雄州待濟寄上流才兼荆衡秀氣助  
瀟湘秋逸蕩子山匹經奇文暢儔沈吟未終卷變態  
紛難數曜耳代明璫襲衣同芳杜惜惜聞玉磬寤寐在靈府

奉酬陸使君見過各賦院中一物得江蘿

江蘿生古砌花每落禪床嘉客未採掇空門自馨香名因詩目見  
色對道心忘不遇陸內史誰知殊衆芳

賦得謝墅送王長史其聖即畫七代祖吳興守舊居

世業西山一作州西墅移家長我身蕭疎遺樹老寂寞廢田春車巷  
傷前轍誰溝憶舊隣何堪再過日一作此更送北歸人

夏日同崔使君論登城樓賦得遠山

遠山湖上小青翠望依稀纔向窗中列還從林表微色濃春草在  
峰起夏雲歸不是蓬萊島如何人去稀

詠數探得七

鄒子譚天歲黃童對日年求真初作傳鍊魄已成仙鶴駕迎緱嶺  
星橋下蜀川逢君竹林客相對弄清絃奉同顏使君真卿送李侍  
御萼賦得荻塘路

落日車遙遙客心在歸路細草暗回塘春泉縈古渡遺蹤歎蕪沒  
遠道悲去住寂寞荻花空行人別無數

賦顏氏古今一事得晉仙傳送顏逸梁湘東王國常侍顏協著晉仙傳五篇

皎然六



曾看顏氏傳多記晉時仙却憶桐君老俱還桂父年青春留鬢髮白日向雲煙遠別費遺簡囊中有幾篇

賦得石梁泉送崔達

架石通霞壁懸崖散碧沙天晴虹影渡風細練文科舉一作舉陟幽期阻沿洄客意賒河梁非此路別恨亦無涯

賦得夜雨滴空塔送陸羽歸龍山同字

閑塔夜雨滴偏入別情中斷續清猿應淋漓候館空氣令煩慮散時與早秋同歸客龍山道東來雜好風

賦得燈心送李侍御萼光字

燈心生眾草因有始知芳綵妓窗偏麗金桃動更香花驚春未盡焰喜夜初長別後空離室何人借末光

賦得竹如意送詳師赴講青字

縹竹湘南美吾師尚毀形仍留負霜節不變在林青每入楊枝手因談貝葉經誰期沃州講持此別東亭

聽素法師講法華經

法子出西秦名齊漆一作道人纔敷藥草義便見雪山春護講龍來遠聞經鶴下頻應機如一雨誰不滌心塵

詠馱上人座右畫松

寫得長松意千尋數尺中翠陰疑背日寒色欲生風真樹孤標在高人立操同一枝遙可折吾欲問生公

夏日一作微雨登觀農樓和崔使君

片雨拂簷楹煩襟四坐清霏微過麥隴蕭散一作傍莎城靜愛和花落幽聞入竹聲朝觀趣無限高詠寄深一作開情

妙喜寺達公院賦得夜磬送呂評事

一磬寒山至疑心轉清越細和虛籟盡疎繞懸一作寒泉發在夜吟更長停空韻難絕幽僧悟深定歸客忘遠別寂歷

無性中真聲何起滅

詠小瀑布  
瀑布小更奇潺湲二三尺細脉穿亂沙叢聲咽危石初因智者賞果會幽人跡不向定中間那知我心寂

倦女臺得倦字

寂寂一作莫舊桑田一作誰家一作女得倦應無鷄犬在空有子孫傳古木花猶發荒臺路未遷一作月暮來雲一片一作片疑



是欲一作却歸年

靈澈上人何山寺七賢石詩

七石配七賢隱僧山上移石性殊磊落君子又高奇  
跂禪服宜壞坐客冠可墮夜倚月樹影盡傾風竹枝集質患  
追琢表頑用磷緇佚火玉亦害塊然長在茲

潘承孩子

愛子性情奇初生玉樹枝人曾天上見名向月中知  
我識嬰兒意何須待佩觿

南池雜詠五首并序

余草堂在池上洲昔柳吳興詩汀洲採白蘋即此地也左右雲山滿目一坐遂有終焉之志會廣德中寇盜  
淮海騷動宵人肆志吾屬不安因賦南池五詠聊以自適

水月

夜夜池上觀禪身坐月邊虛無色可取皎潔意難傳  
若向空心了長如影正圓

溪雲

舒卷意何窮縈流復帶空有形不累物無迹去隨風  
莫怪長相逐飄然與我同

虛舟

虛舟動又靜忽似去逢時觸物知無迹爲梁幸見遺  
因風到此岸非有濟川期

寒山

侵空撩亂色獨愛我中峰無事負輕策閑行躡幽踪  
衆山搖落盡寒翠更重重

寒竹

曩裏孤生竹獨立山中雪蒼翠搖動一作動風  
嫺娟帶寒月狂花不相似還共凌冬發

望遠村

林杪不可分水步遙難辨一片山翠邊依稀見村遠

惜暮景



疎陰花不一作動片景松梢度夏日舊來長佳遊何易暮

效古天寶十四年

日出天地正煌煌開晨曦六龍驅羣動古今無盡時夸父亦何愚競走先自疲飲乾咸池水折盡扶一作桑枝渴死化燭火嗟嗟徒爾為空留鄧林在折盡一作摧折令人嗤

古別離代人答關士和

太湖三山口吳王在時道寂寞千載心無人見春草誰識一作緘怨者持此傷懷抱孤舟畏狂風一點宿煙島望所思兮若何月蕩漾兮空波雲離離兮北斷鴻一作馬眇眇兮南多身去今天畔心折兮湖岸春風胡為兮塞路使我歸夢兮撩亂

擬長安春詞

春信在河源春風蕩妾魂春歌雜鶻鳩春夢繞轅轅春絮愁偏滿春絲悶更繁春期不可定春曲嬾新翻

效古

思君轉戰度交河強弄胡琴不成曲日落應愁隴底難春來定夢江南數萬丈游絲是妾心惹蝶繁花亂相續

昭君怨

自倚嬋娟望主恩誰知美惡忽相翻黃金不買漢宮貌青塚空埋胡一作秦地魂

銅雀妓

強開尊酒向陵看憶得君王舊日懽不覺餘歌悲自斷非關艷曲轉聲難

長門怨

春風日日閉長門搖蕩春心似一作自夢魂誰一作若遣花開只笑妾不如桃李正一作自無言

哭吳縣房贊明府

仁人邁厚德可謂名實全撫迹若疎曠會心極精研履危節詎屈廣德初江南寇盜充斥賊通名幸長城縣屢至害而竟不就著論識不偏公著道性論一篇恨以榮級淺嘉猷未及宣伊人期遠大志業難比肩昭世既合并吾君藉陶甄柰何明明理與善徒空詮微教或稽聖窮源反問天一官自吳邑六翮委江壩始是牽絲日翻成撒瑟年金膏果不就唐公昔日能洗道士學長生之術書以佛理難之玉珮長此捐



倚伏信冥昧天修驚後先安知忘情子愛網素已褰為有深仁感遂令真性遷心悲空林下淚灑秋景前夫子  
寡兄弟撫孤傷藐然傾雲為際結弔鶴共聯翩割念命歸駕訣詞向空筵樹桃陰始合愛客位常懸幡然一作遠  
行時崇望歸朝旋悟茲權宴隔哀被一作彼歲月延書帶變芳草履痕移綠錢冥期儻可逢生盡會無緣王坦之與生法師  
為冥期前死者錄  
罪福幸願示因業代君運精專沈約死後冥中見十一僧因誦云  
師老為我造經捨我苦難相思轉寂寞獨往西林泉欲見故人心時聞所贈篇素高陶  
靖節今重楚先賢芳躅將遺愛可為終古傳

哭覺上人

時解  
劉中

憶君南道越不作買山期昨得耶溪信翻為逝水悲神交如可見生盡杳難思白日東林下空懷步影時

題餘不溪廢寺

武原離亂後

一作武陸  
雁烈後

真界積塵埃殘月生秋水悲風起故臺居人今已盡棲鶴暝還來不到無生理應堪賦七哀

與宿吳匡山  
破寺詩畧同

同李洗馬入餘不溪經辛將軍故城

慘慘寒城望將軍下世時高墻暮草遍大樹野風悲僻壘今惟一作在勳庸近可思蒼然古溪上川逝共懷其

憶天台

箬溪朝雨散雲色似天台應是東風便吹從海上來靈山遊汗漫仙石過莓苔誤到人間世經年不早迴

萬回寺

萬里稱逆化愚惑性亦全紫紱拖身上妖姬安膝前一作見他拘坐寂故我是眠禪吾知至人心杳若青冥天

禪詩

萬法出無門紛紛使智昏徒稱誰氏子獨立天地元實際且何有物先安可存須知不動念照出萬重源

哀教

本師不得已強為我著書知盡百慮遺名存萬象拘如何工言子終日論虛無伊人獨冥冥時人以為愚

聞鐘

古寺寒山上遠鐘揚好風聲餘月樹動響盡霜天空永夜一禪子冷肱心境中



溪上月

秋水月娟娟初生色界天蟾光散浦淑素影動淪連何事無心見虧盈向夜禪

山雪

夕陽在西峰疊翠繁殘雪狂風卷絮迴驚後攀玉折何意山中人誤報山花發

江上風

江風西復東飄暴忽何窮初生虛無際稍起蕩漾中應吹夏口檣竿折定蹙滄城浪花咽今朝莫怪沙岸明一作昨夜聲狂卷成雪

山雨

一片雨山半晴長風吹落西山上滿樹蕭蕭心耳清雲鶴驚亂下水香凝不然風迴雨定芭蕉濕一滴時時入畫禪

問遙山禪老

天與松子壽獨飲日月精復令顏子賢胡為天其生吾將尋河源上天問天何不平吾將詰仙老大道無私誰強仙老難逢天不近世人何人解應盡明朝欲向翹頭山問取禪公此義還

禪思

真我性無主誰為塵議昏奈何求其本若拔大木根妄以一念動勢如千波翻傷哉子桑扈蟲臂徒虛言神威與外論宗邪生異源空何妨色在妙豈廢身存寂滅本非寂誼譁曾未誼嗟嗟世上禪不共智者論

支公詩

支公養馬復養鶴率性無機多脫畧天生支公與凡異凡情不到支公地得道繇來天上仙為僧却下人間寺一作世道家諸子論自然此公唯許逍遙篇山陰詩友喧四座佳句縱橫不廢禪

述夢

夢中歸見西陵雪渺渺茫茫行路絕覺來還在剡東峰鄉心繚繞愁夜鐘寺北禪岡猶記得夢歸長見山重重

赤松一作赤松洞



緣一作岸蒙籠出見天晴沙瀝瀝一作水濺濺何處羽人長洗藥殘花無數逐流泉

戲題松樹

爲愛松聲聽不足每逢松樹遂忘還偷然此外更何事笑向閑雲似我閑

戲題二首

看飲逢歌日屢曛我身何似繫浮雲時人不解野僧意歸去溪頭作鳥羣  
喧喧共在是非間終日誰知我自閑偶客狂歌何所爲欲於人事強相關

雜高興

嗟嗟號呶子世稱謫僊儔俗被絞綃欺天薦胸脩奔景謂可致馳齡言易流燕昭昧往事羸政亡前籌三山果  
不見九僊悠悠君看牛山樂君見麋浦遊昨日千金子聯綿成古丘吾將攬明月照爾生死流至樂享爰居慙  
貽達者尤冥冥光塵內機喪成海漚

雜興六首

吾觀談天客工言喪其精萬物資廣庇此中何有情若爲昧顏跖修短怨太清高論讓鄒子放詞徵屈生請從象  
外推至論尤明明

短齡役長世擾擾悟不早嬾女身後空歡娛夢中好從教西陵樹千載傷懷抱鶴駕何冥冥蘓洲去浩浩柔顏感  
三花凋發悲蔓草月中伐桂人是誰翻使年年不衰老

誰高齊公子泣聽雍門琴死且何足傷殊非達人心 獨高庭中鶴意遠貴氣埃有時青冥遊顧我還下來  
白雲琅玕色一片生虛無此物若無心若何卷還舒

疎散遂吾性栖山更無機寥寥高松下獨有閑雲歸精意不可道冥然還掩扉

偶然五首

樂禪心似蕩吾道不相妨獨悟歌還笑誰言老更狂

偶然一作寂無喧吾一作心一作性源可嫌蟲食木不笑鳥能言

隱心不隱跡却欲住人寰欠樹移春樹無山看畫山居喧我未錯真意在其間



虜語嫌不學胡音從不翻說禪顛倒是樂殺金王孫

真隱須無矯一作不須矯忘名要似愚只將兩條事空却漢潛夫

問天

天公一作翁何時有談者皆不經誰道賢人死今為傳說星

寓言

吾道本無我未曾嫌世人如今到城市彌覺此心真

前溪作

春歌已寂寂古水自涓涓徒誤時人輩傷心作逝川

戲作

乞我百萬金封我異姓王不如獨悟時大笑放清狂

浮雲三章

浮雲刺讒也蓋取夫盛明之時為浮雲所蒙非不明也小人比於君側讒言變惑亦如浮雲之害明子覽古史極觀君臣之際敗亡之兆生於讒慝遂作是詩

浮雲浮雲集於扶桑扶桑茫茫日暮之光匪日之暮浮雲之汗嗟我懷人憂心如蠶

浮雲浮雲集於咸池咸池微微日昃之時匪日之昃浮雲之惑嗟我懷人憂心如織

浮雲浮雲集於高春高春濛濛日夕之容匪日之夕浮雲之積嗟我懷人憂心如愁

寓言

人生百年我過半天生才定不可換東海釣鼈鼈不食南山坐石石欲爛

若邪春興

春生若邪一作溪水雨後漫流通芳草行無盡清一作春源去不窮野煙迷極一作浦斜日起微風數處乘流望依稀似剡中

晨登樂遊原望終南積雪

凌晨擁弊裘徑上古原頭雪霽山疑近天高思若浮瓊峰埋積翠玉嶂掩飛流曜彩含朝日搖光奪寸眸寒空標



瑞色爽氣襲皇州清眺何人得終當獨再遊

送商季舉

比來知爾有詩名莫恨東歸學未成新豐有酒爲我飲消取故園傷別情

弔靈均詞

昧天道兮有無聽汨音渚兮躊躇期靈均兮若存問神理兮何如願君精兮爲月出孤影兮示予天獨何兮有君君在萬兮不羣既冰心兮皎潔上問天兮胡不聞神莫覩若雲冥冥兮雷霆怒蕭條杳眇兮餘草莽古山春兮爲誰今援哀兮何思風激烈兮楚竹死國殤人悲兮雨颼颼雨颼颼兮望君時光茫蕩漾兮化爲水萬古忠貞兮徒爾爲

步虛詞

子因覽真訣遂感西城一作城君玉笙一作皇下青冥人間未曾聞日華鍊精一作魄皎皎無垢氛謂我有僊骨且令餌氣氤俯仰媿靈顏願隨鸞鶴羣俄然動風馭縹渺歸青雲

奉應顏尚書真卿觀玄真子置酒張樂舞破陣畫洞庭三山歌

道流迹異人共驚寄向畫中觀道情如何萬象自心出而心澹然無所營手援毫足蹈節披縑灑墨稱麗絕石文亂點急管催雲態徐揮慢歌發樂音縱酒酣狂更好攢峰若雨縱橫埽尺波澶漫意無涯片嶺峻嶒勢將倒盼睽方知造境難象忘神遇非筆端昨日幽奇湖上見今朝舒卷手中看與餘輕拂遠天色曾向峰東海邊識秋空暮景颯颯容翻疑是真畫不得顏公素高山水意常恨三山不可至賞君狂畫忘遠遊不出軒墀坐蒼翠

答韋山人隱起龍文藥瓢歌

野人藥瓢天下絕全如渾金割如月彪炳文章智使然生成在我不在天若言有物不繇物何意中虛道性全韋生能詩兼好異獲此靈瓢遠相遺仙侯玉帖人漫傳若士青囊世何秘一捧一開如見君藥盛五色香氣氤背一作階上驪龍蟠不睡張鱗擺領生風雲世人強知金丹道黠僊不成穢僊老年少紛如陌上塵不見吾瓢盡枯槁聊將繫肘步何輕便有三山孤鶴情東方小兒乏此物遂令僊籍獨無名



桃花石枕歌贈康從事

卞山幽石產奇璞荆人至死採不著何人琢枕持贈君片片桃花開未落  
見吾石錄 玉工辨兮知非石至寶繇來覽一作鑒者稀今君獨鑿應欲惜何辭售一作集與章一作章天真幸得提攜近玉人可中棄置君不顧天生秀色徒璘玢四座喧喧爭目悅巧過造化稱一絕莫言昨日因錯磨看取從來無點缺六月江南暑未闌一尺花冰試枕看高窗正午風颯變室中不減春天寒主人所重重枕德文章外飾徒相惑更有堅貞不易心與君天下為士則

張伯英一作伯英草書歌

伯英死後生伯高朝看手把山中毫先賢草律我草狂風雲陣發愁鍾王須臾變態皆自我象形類物無不可  
一作伯英 閨風遊雲千萬朵驚龍蹴踏飛欲墮更觀鄧林花落一作落朝狂風亂攪何飄飄一作飄有時凝然筆空握情在寥天獨飛鶴有時取勢氣更高憶得春江千里濤張生奇一作奇絕難再遇王今草書草罷臨風展輕素陰慘陽舒如有道鬼狀魁容若可懼黃公酒壚興偏入阮籍不噴糝亦顧長安酒勝醉後書此日騁君千里步

寒栖子歌曾居廬山欲有

君在廬山知不羣有疑是鶴又是雲生死塵埃汗不得眼前榮利徒紛紛今日惠然來訪我酒榼書囊肩背荷拂除衣上餌煙霞昨夜胥門宿蔡家天然不飲亦不食拋名換姓覓不得且向人間作酒僮不肖將身生羽翼停形為餌天地根胎息世人皆死我獨存洗慮因吞清明錄世人皆貪我常足栖子妙今道已成手把玄樞心運冥能令鬼哭神效靈身如飄風不可絆朝遊崆峒夕汗漫向來坐客猶未散忽憶羅浮欲去時遙指孤雲作路岐海上仙遊不可見人間日落空桑枝

翔隼歌送王端公

古人賞神駿何如秋隼擊獨立高標望霜翮應看天宇如咫尺低迴拂地凌風翔鵬鷁敢下鴈斷行情空四顧忽不見有時獨出青霞傍窮陰萬里落寒日氣殺草枯增奮逸雲塞斜飛攬葉迷雪天直上穿花疾見君高情有所屬贈別因歌翔隼曲離亭慘慘客散時歌盡路長意不足

白雲歌寄陸中丞使君長源



一見西山雲使人情意遠憑高發詠何超遙道妙如君一作有舒卷紫空壘景多麗容衆峰峰上自爲峰潔白不  
繇陰雨積高明宵共雜煙重萬物有形皆有著白雲有形無一作君繫縛黃金被燦玉亦瑕一片飄然汗不著或逢天  
上或人間人自營營雲自閑忽爾飛來暫爲侶忽然飛去莫能攀逸民對雲效高致禪子逢雲增道意白雲遇物  
無偏頗自是人心見同異闔闔天門宜曙看爲一作華纓作蓋擁千官從龍合沓臨清暑一作名就日遠遙繞露寒一作名誰憐  
西山雲亭亭處幽絕坐石長看非我羈手中欲攬一作待君說貞白先生那得知只一作向空山一作自怡悅

裴端公使君清席賦得青桂歌送徐長史

昔年攀桂爲留人今朝攀桂送歸客秋風桃李搖落盡爲君青青伴松柏謝公南樓送客還高歌桂樹凌寒山應  
憐獨秀空林上空賞敷華積雪間昨夜一枝生在月嬋娟可望不可折若爲天上堪贈行徒使亭亭照離別

周長史昉畫毗沙門天王歌

長史畫神獨感神高步一作區中無兩人雅而逸高且真形生虛無忽可親降魔大戟縮在手倚天長劍橫諸紳慈  
威示物雖凜凜在德無秋唯有春吾知真象本非色此中妙用君心得苟能下筆合神造誤點一點亦爲道寫出  
霜縑可舒卷何人應一作識此情遠秋齋清寂無外物盥手焚香聊自展憶昔胡兵圍未解感得此神天上下至今  
雲旗圖我形爲君一顧煙塵清

奉和顏魯公真卿落玄真子舴艋舟歌

楚章華臺成影  
願諸侯誘之

滄浪子後玄真子冥冥釣隱江之汜剡木新成舴艋舟諸侯落舟自茲始得道身不繫無機舟亦閑從水遠逝兮  
任風還朝五湖兮夕三山停綸乍入芙蓉浦擊汰時過明月灣太公取璜我不取龍伯釣鼈我不釣竹竿嫋嫋魚  
徒篋此中自得還自笑汗漫一遊何可期後來誰遇冰雪姿上古初聞出堯世今朝還見在堯時

鄭容全成蛟形木机歌

萬物貴天然天然不可得渾樸無勞剗工幽姿自可蛟龍質欲騰未去何翩翩揚袂爭前誰敢拂可中風雨  
一朝至還應不是池中物蒼山萬重採一枝形如器車生意奇風號雨噴心不折衆木千莖君獨知賦中與生遊  
賦與此山於  
識非君獨是何人



奉同顏使君真卿清風樓賦得洞庭歌送吳鍊師歸林屋洞

名山洞府到金庭三十六洞稱最靈不有古仙啓其秘今日安知靈寶經中山鍊師栖白雲道成仙秩號元君  
安之高仙者有元君次有夫人元君有秩比左仙公三千甲子朝玉帝世上如今名始聞吐納青牙養肌髮花冠玉鳥何高潔不聞天上來謫仙自是  
人間授真訣吳興太守道家流仙師遠放清風樓應將內景還飛去且從分風當此留湖之山兮樓上見山冥冥  
兮水悠悠世人不到君自到縹緲仙都誰與儔黃鶴孤雲天上物物外飄然自天匹一別千年未可期仙家不數  
人間日

夏銅碗為龍吟歌 并序

唐故太尉房公瑄早歲嘗隱終南山峻壁之下往往聞龍吟聲清而靜滌人邪想時有好事僧潛夏之以三  
金寫之唯銅聲酷似他日房公偶至山寺聞林嶺間有此聲乃曰龍吟復遷於茲矣僧因出其器以告公命  
夏之驚曰真龍吟也大曆十三祀秦僧傳至桐江予使童兒夏金做之亦不減秦聲也緇人或有譏者曰此  
達僧之事可以嬉娛爾曹無以瓊行自拘因賦龍吟歌以見其意

逸僧夏椀為一作龍吟世上未曾聞此音一從太尉房公賞遂使秦人傳至今初夏徐徐聲漸顯樂音不管何人辯  
似出龍泉一作萬丈底乍怪聲來近而遠未必全錄夏者功一作真生虛無非椀中寥亮掩清笛紫迴凌細風遙聞不  
斷在煙杪萬籟無聲天境空一作向天台宿華頂秋宵一吟更清迴能令聽者易常性憂人忘憂躁  
人靜今日鏗鏗江上聞蛟螭奔飛如得羣聲過陰嶺恐成兩響駐青天將起一作雲坐來吟盡空江一作碧却尋向者  
聽一作無迹人生萬事將此同暮賤朝榮動還寂

飲茶歌誚崔石使君

越人遺我剡溪一作茗採得金牙爨金鼎素瓷雪色縹一作沫香何似諸仙瓊葉綠一飲滌昏寐情來一作朗爽一作滿天  
地再飲清我神忽如飛雨灑輕塵三飲便得道何須苦心破煩惱此物清高世莫知世人飲酒多一作自欺愁一作看  
畢卓甕間夜笑向陶潛籬下時崔侯歎之意不已狂歌一曲驚人耳孰知茶道全爾真唯有丹丘得如此

買藥歌送楊山人

華陰少年何所希欲餌丹砂化骨飛江南藥少淮南有暫別胥門上京口京口斜通江水流裴回應上青山頭



夜驚潮沒鷓鴣堰朝看日出芙蓉樓搖蕩一作春風亂帆影片雲無效是揚州揚州宣宣賣藥市浮俗無由識仙子  
河間姪女直千金紫陽夫人服不死吾於此道復何如昨朝新得蓬萊書

薛卿教長行歌時量移湖州別駕

桂陽仙柳道家說昔傳蘇君今是薛聊將握槊偶時人便一作被人間稱冠絕黃楊文局龜螭蟠琢成散一作子雙琅玕初疑月破雲中墮復怪星移指下攢誰識兵奇勢可保坐看將軍上一作道長行有將軍梁有時彩王去聲非所希笑擊單于出重圍鳧鷖隼擊疾若飛左顧右盼生光輝家本聯姻漢戚里身是長安貴公子名高藝絕何翩翩幾迴決勝君王前一作危一作遊長樂與祈年人望青雲白日邊謫宦江南歲陰晚還將此道聊自遣絲來君子行最長長行總有君子行小人行亦知君寄心遠

桃花石枕歌送安吉康丞并序

安吉古桃州也今為吳興右邑士遐副焉於南山獲桃花石異而重之珍於席上士遐將赴京師故帥詩人以君所寶之物高歌贈行

君吏桃州尚奇一作跡桃州採得桃花石爛疑朝日照已舒含似春風吹未坼珪璋特達世所珍吾知此物亦其倫應羨花開不凋悴應嘉玉片無纖磷立性堅剛平若砥君子偏將交道比何人亦秉堅剛姿吾見君心得如此君心所好我獨知別多見少長相思從來賞翫安左右萬里提攜君莫辭

賦得吳王送女潮歌送李判官之河中府

見說吳王送女時行宮直到荆溪口溪上千年送女潮為感吳王至今有乃知昔人錄志誠流水無情翻有情平波忽起二三尺此上疑與神仙宅今人猶望荆之湄長令望者增所思吳王已歿女不返潮水無情那有期溪草何草號帝女溪竹何竹號湘妃靈濤旦暮自堪傷的爍嬋娟又爭發客歸千里自茲始覽古高歌感行子不知別後相見期君意何如此潮水

觀李中丞洪二美人唱歌軋箏歌時量移湖州長史

君家雙美姬善歌工箏人莫知軋用蜀竹弦楚絲清哇哇音哇宛轉聲相隨夜靜酒闌佳月前高張水引何一作淵淵美人矜名曲不誤感響時時如迸泉趙琴一作素所佳齊謳世稱絕箏歌一動凡音輟疑弦且莫停金露一作聲已



闕雅聲來遊魚唼鳴鶴裴回主人高情始為開高情放浪出常格偶世有名道無跡勲業先登上將科文章已冠諸人籍每笑石崇無道情輕身重色禍亦成君有佳人當禪伴於中不廢學無生愛君天然性寡欲家貧祿薄常知足謫官無愠如古人交道忘言比前躅不意全家萬里來湖中再見春山綠吳興公舍幽且閑何妨寄隱在其間時議名齊謝太傅更看攜妓似東山

陳氏童子草書歌

書家孺子有奇名天然大草令人驚僧虔老時把筆法孺子如今皆暗合颺揮電灑眼不及但覺毫端鳴颯颯有時作點險且能太行片石看欲崩偶然長掣濃入燥少室枯松欹不倒夏室炎炎少人歡山軒日色在闌干桐花飛盡子規思主人高歌興不至濁醪不飲嫌昏沈欲翫草書開我襟龍爪狀奇鼠鬚銳水一作水戔白晳越人惠王家小令草最狂為子灑出一作揮灑驚騰勢

飲茶歌送鄭容

丹丘羽人輕玉食採茶飲之生羽翼天台記云丹丘出大茗服之羽化名藏仙府世空一作其知骨化雲宮人不識雲一作雲山童子調金鑿楚人茶經虛得名霜天半夜芳草折鬪漫一作漫湘花啜又一作入生賞君一作常說此茶祛我疾一作祛我疾使人胃中蕩憂慄日上香爐情未畢醉一作醉踏虎溪雲高歌送君出

花石長枕歌荅章居士贈

楚山有石郢人琢琢成長枕知是玉全疑冰片坐一作坐恐銷閒發花蕞驚不足贈予比之金琅玕瓊花爛熳一作爛熳浮席端吾師道一作道吾不執寶今日感君因執看試叩鏗然應清律纖塵不留蠅敢拂萬物皆因造化資如何獨負清貞質南山有雲鶴在空長松為我生涼風高友一作友朗詠樂其中行住四儀皆道意不學小乘一作小乘一曲一作一曲士唯將此物安座隅取次閑眠有禪味

觀王右丞維滄洲圖歌

滄洲誤是真萋萋忽盈視便有春渚情褰裳掇芳芷颯然風至草不動始悟丹青得如此丹青變化不可尋翻空作有移人心猶言雨色斜拂座乍似水涼來入襟滄洲說近三湘口誰知卷得在君手披圖擁褐臨水時翛然不異滄洲叟



洞庭山維諒上人院階前孤生橘樹歌

洞庭仙山但生橘不生凡木與梨栗真子無私一作自不栽感得一株階下出細葉繁枝委露新四時常綠不關春  
若言此物無道性何意孤生來就一作人二月三月山初暖最愛低簷數枝短白花不用鳥一作銜來自有風吹手中  
滿九月十月爭破顏金實離離色殷殷一作一夜天晴香滿山天一作生珍木異於俗俗士來逢不敢觸清陰獨步  
禪起時徒倚前看看不足

春夜賦得澆水囊歌送鄭明府

吳縑楚練何白晷居士持來遺禪客禪客能裁澆水囊不用衣一作工秉刀尺先師遺我式一作無缺一濾一翻心敢  
賒夕望東峰思漱盥矐矐斜月懸澄紗徙倚花前漏初斷白猿爭嘯驚禪伴玉瓶餘瀉賞一作涓涓潑著蓮衣水珠  
滿因識仁人為宦情還如澆水愛蒼生聊歌一曲與君別莫忘寒泉見底清

湛處士枸杞架歌

天生靈草生靈地誤生人間人不貴獨君井上有一根始覺人間眾芳異拖線垂絲宜曙看裏回滿架何珊瑚春  
風亦解愛此物裏裏時來傍香實濕雲綴葉擺不去翠羽銜花驚畏失有羨孤松不凋色皇天正氣肅不得我獨  
全生異此輩順時榮落不相背孤松自被斧斤傷獨我柔枝保無害黃油酒囊石碁局吾羨湛生心出俗一作湛生  
擷芳生一作影風灑懷其致條然此中足

觀裴秀才松石墮歌

誰工此松唯拂墨巧思丹青營不得初寫松梢風正生此中勢與真松爭高柯細葉動颯颯乍聽幽颺如有聲左  
右雙松更奇絕龍鱗麈尾仍半折經春寒色聚不散逼座陰陰將下雪荆門石狀凌瓊璫蹙成數片倚松根何年  
積積苔黏跡幾夜潺潺水擊痕裴生詩家後來客為我開圖說松石對之自有高世心何事勞君上山屐

送顧處士歌吳興丘司歲之女軍詩况也

吳門顧子子早聞風貌真古誰似君人中黃憲與顧子物表孤高將片雲性背時人高且逸平生好古無儔匹醉  
書在篋稱絕倫神畫開廚怕飛出謝氏檀郎亦可儔道情還似我家流安貧日日一作讀書坐不見將名干五侯知  
君別業長洲外欲行秋田循一作映澹門前便取殼鯨乘腰上還將鹿盧一作佩禪子有情非世情御苾貢餘聊贈行



金唐詩 卷三 滿道喧喧遇君別爭窺玉潤與冰清

水精數珠歌

西方真人為行密一作臂上記珠皎如日佛名無著心亦空珠去珠來體常一誰道佛身千萬身重重只向心中出

兵後西日溪行并序

沈義仙記銅峴地肺可以逃水又聖桃源記天地改花源在即此地也此一章靈澈上人可以志之

一從清氣上為天仙叟何年見乾海黃河幾度濁復清此水如今未曾改西尋仙人渚誤入桃花穴風吹花片使

我迷時時問山驚踏雪石梁丹竈意更奇石梁丹竈銅峴仙人清靈跡有四所春草不生多故轍我來隱道非隱身如今世上無風塵路是

武陵路人非秦代人飯松得高侶濯足偶清津數片昔賢磐石在幾迴竝坐戴綸巾

姑蘇行一作登

古臺不見秋草衰一作却憶吳王全盛時千年月照秋草上吳王在時幾迴望至今月出君不還世人空對姑蘇山

山中精靈安可覩轍跡人蹤麋鹿聚嬋娟西子傾國容化作寒陵一堆土

短歌行

古人若不死吾亦何一作有所悲蕭蕭煙雨九原上白楊青松葬者誰貴賤同一塵死生同一指人生在世一作為代共如此

何異浮雲與流水短歌行短歌無窮日已傾鄴宮梁苑徒有名春草秋風傷我情何為不學金仙侶一悟空王無

死生

山月行一作關山月未句缺一字

家家望秋月不及秋山望山中萬境長寂寥夜夜孤明我山上海人皆言生海東山人自謂出山中憂虞歡樂皆

占月月本無心同不同自從有月山不改古人望盡今人在不知萬世今夜時孤月將誰更待一作孤月將誰更相待

顧渚行寄裴方舟

我有雲泉隣渚山山中茶事頗相關鴉鳴時芳草死山家漸欲收茶子伯勞飛日芳草滋山僧又是採茶時

來慣採無近遠陰嶺長今陽崖淺大寒山下葉未生小寒山中葉初卷名山吳婉一作携籠上翠微蒙蒙香刺冒春衣

迷山一作山迷乍被一作可落花亂度水時驚啼鳥飛家園不遠乘露摘歸時露彩猶滴瀝初看怕一作抽出欺玉英更取煎來勝



金液昨夜西峰雨色過朝尋新茗復如何  
文宮露濕青芽老堯市人稀紫筍多  
紫筍青芽誰得識日暮採一作採之長  
太息清冷真人待子元仙傳清冷真人裴君  
號道人支子元為友貯此芳香思何極

武源行贈丘卿岑

昔年羣盜阻江東吳山動搖楚澤空  
齊人亦戴蜂蠆毒美稷化為荆棘藋  
洶洶四顧多窟穴浮雲白波名不同  
萬人死地當虎口一旦生涯懸一作鼓  
中昨日將軍殉死節悉向生民陷成  
血胸中豹畧張陣雲握內蛇矛揮白  
雪長洲南去接孤城居人散盡鼓譟  
驚三春不見芳草色四面唯聞刁斗  
聲此時狂寇紛如市君當要衝固深  
壘縱橫計出皆獲全士卒身先每輕  
死埽平氛稷望吳門人間歲美桑柘  
繁比屋生全一作受君賜連營罷戰  
賴一作君恩如何棄置功不一作錄  
通籍無名滯江曲灞亭不重李將軍  
漢爵猶輕蘇屬國荒營寂寂隱山椒  
春意空驚故柳條野戰攻城盡一作  
只如此即今誰是霍嫖姚

長安少年行

翠樓春酒蝦蟆陵長安少年皆共矜  
紛紛半醉綠槐道躑躅花驄驕不勝

風入松

西嶺松聲落日秋千枝萬葉風颼颼  
美人援琴弄成曲寫得松間聲斷續  
聲斷續清我魂流波壞陵安足論美  
人夜坐月明裏含少商兮一作照清  
微風何淒一作淒一作今聽聽一作攪  
寒松兮又夜起夜未央曲何長金徽  
更促聲泱泱何人此時不得意意苦  
弦悲聞客堂

陪盧中丞閑遊山寺

此首與和闐士和奉  
憲冬夜宴集詩略同

野寺出人境捨舟登遠峰林開明見月  
萬壑靜聞鐘擁燭明山翠交塵動水  
容如何股肱守塵外得相逢

湖南草堂讀書招李少府

削去僧家一作事南池便隱居為憐松子  
壽還卜道家書藥院常無客茶樽獨  
對余有時招逸史來飯野中蔬

答李季蘭

天女來相試一作將花欲染衣禪心竟  
不起還捧舊花歸

酬鄭判官湖上見贈

全唐詩 卷三十 皎然七 廣宣



歲歲湖南隱已成如何星使忽知名沙鷗慣識無心客今日逢君不解驚

送旻上人遊天台

真心不廢別試看越溪清知汝機忘盡春山自有情月思華頂宿雲愛石門行海近應須汎無令鷗鷺驚

送別

聞說情人怨別情霜天浙瀝在寒城長宵漫漫角聲發禪子無心恨亦生

與昂上人兩字繼合四句初字日

有一鳥雛凌寒獨宿若逢雲雨兩兩相逐

次日

野外有一人獨立無四隣彼見是我身我見是彼身

廣宣

廣宣姓廖氏蜀中人與劉禹錫最善元和長慶兩朝並為內供奉賜居安國寺紅樓院有紅樓集今存詩十七首編為一卷

皇太子頻賜存問并索唱和新詩因有陳謝

望苑招延一作賢後禪扉訪道餘祇言俟文雅何意及庸虛率性多非學緣情偶自書清風閣寺響白日見心初重道逢軒后崇儒過魏儲青宮列芳一作梓玄圃積瓊瑤鄭鼠寧容者齊竿久舍諸空懷受恩感舍思幾躊躇

禁中法會應制

天上萬年枝人間不可窺道場三教會心地百王期待讀露恩早傳香駐日遲在筵還向道通籍許言詩空媿陪仙列何階答聖慈從今精至理長願契無為

降誕日內庭獻壽應制

慶壽千齡遠敷仁萬國通登霄欣有路捧日媿無功仙駕三山上龍生二月中修齊長樂殿講道大明宮此地人難到諸天事不同法筵花散後空界滿香風



寺中柿樹一蒂四顆詠應制

珍木生奇畝低枝拂梵宮因開四界分本自百花中當夏陰涵綠臨秋色變紅君看藥草喻何減太陽功

早秋降誕日獻壽二首應制

秋葉開六葉元聖誕千年繞殿祥風起當空瑞日懸道光中國主人識大羅仙敢贊無疆壽香花上法筵

萬方瞻聖日九土仰清光磬地山河壯彌天福壽長瑞煙薰法界真偈啟仁人王看獻千秋樂千秋樂未央

駕幸天長寺應制

天界宜春賞禪門不掩關宸遊雙闕外僧引一作百花間車馬喧長路煙雲淨遠山觀空復觀俗皇鑒此中閑

九月菊花詠應制一作清江詩

可訝東籬菊能知節候芳細枝青玉潤繁蕊碎金香爽一作氣浮一作朝露濃姿帶夜霜泛杯傳壽酒應共樂時康

駕幸聖容院應制

大唐國裏千年聖王舍城中百億身却指容顏非我相自言空色是吾真深殿虔心隨寶輦廣庭徐步引金輪古

來貴重緣親近狂客慙為侍從臣

聖恩顧問獨遊月磴閣直書其事應制

禪居河畔無多地來往尋春物正華磴道上盤千畝竹欄干低壓一作數萬人家簷前施飯來飛鳥林下行香踏落花

自解剎那知佛性不勞更喻幾塵沙

安國寺隨駕幸興唐觀應制

東林何殿是西鄰禪客垣牆接羽人萬乘遊仙宗有道三車引路本無塵初傳寶訣長生術已證金剛不壞身兩

地盡修天上事共瞻鸞駕一作重來巡

賀王起一作賀王詩

從辭鳳閣掌絲綸便向青雲領貢賓再闢文場一作無枉路兩開金榜絕窵人眼看龍化門前水手放鶯飛谷口春

明日定歸台席去鶴鶴原上共陶鈞

駕幸普濟寺應制



南方寶界幾由旬八部同瞻一佛身寺壓山河天宇靜樓懸日月鏡光新重城柳暗東風曙一作暖複道花明上苑春  
向晚鑿與歸鳳闕曲江池上動青蘋

紅樓院應制一作沈  
佺期詩

紅樓疑見白毫光寺逼宸居福盛唐支遁愛山情謾切曇摩泛海路空長經聲夜息聞天語鑑氣晨飄接御香誰  
道此中難可到自憐深院得徊翔

再入道場紀事應制一作沈  
佺期詩

南方歸去再生天內殿今年異昔年見闢乾坤新定位看題日月更高懸行隨車一作香輦登仙路坐近爐煙講法筵  
自喜恩深陪侍從兩朝長在聖人前

寺中賞花應制

東風萬里送香來上界千花向日開却笑霞樓紫芝侶桃源深洞訪仙才

九月十五日夜宿鄭尚書細東亭望月寄杜給事

霜天晴一作昨夜宿東齋松竹交陰愜素懷迥出風塵心得地一作思可憐三五月當陽清光滿院思一作情見寒色臨門笑語  
諧霄漢路殊從道合往來人事不相乖

舍職

舍職元和太和間長壽寺僧詩一首

酬盧仝見訪不遇題壁一本無不遇題壁四字  
盧仝有訪舍職上人詩

長壽寺石壁盧公一首詩渴讀一作飲即不渴飢讀一作食即不飢鯨吞海水盡露出珊瑚枝海神知貴不知價留向人  
間光照夜

善生

善生貞元時僧詩四首

旅中荅喻軍事問客情



一自游他國相逢少故人縱然爲客樂爭似在家貧  
喜恨霜侵鬢接詩病入神若非憐片善誰肯問風塵

贈盧逸人

高眠巖野間至藝敵應難詩苦無多首藥靈惟一丸  
引泉魚落釜攀果露沾冠已得嵇康趣逢迎事每關

送玉禪師

飄然無定迹迴與律乘違入郭隨緣住思山破夏歸  
通夏不終謂之破夏孟擊數家飯衲乞幾人衣洞了曹溪旨寧輸俗者機

送智光之南值雨

結束衣囊了炎州定去游艸堂方惜別山雨爲相留  
又得一宵話免生千里愁莫辭重卜日後會必經秋

韜光

韜光蜀人卓錫靈隱之巢溝塢白居易守郡時題其堂曰法安詩一首

謝白樂天招

山僧野性好林泉每向巖阿倚石眠不解栽松陪玉勒  
惟能引水種金蓮白雲乍可來青嶂明月難教下碧天城

市不能飛錫去恐妨鶯轉翠樓前

知玄

知玄字後覺姓陳氏眉州人僖宗時賜號悟達國師歌詩二十餘卷今存詩三首

五歲詠花

花開滿樹紅花落萬枝空唯餘一孕在明日定隨風

祝堯詩

生天本自生天業未必求仙便得仙鶴背傾危龍背滑  
君王且住一千年

荅僧澈

觀君法苑思冲虛使我真乘刃有餘若使龍光時可待  
應憐僧肇論成初五車外典知誰敵九趣多才恐不如  
蕭寺講軒橫淡蕩帝鄉雲樹正扶疎幾生曾得闍瑜意  
今日堪將貝葉書一振微言冠千古何人執卷問吾廬

元孚

善生 韜光 知玄 元孚 栖白



元孚宣城開元寺僧與許渾同時或曰楚中僧詩二首

月夜懷劉秀才

獨夜相思但自勞  
阮生吟罷夢雲濤  
此時小定未禪寂  
古塔月中松磬高

送李四校書

朱絲寫別鶴  
泠泠詩滿紅箋  
月滿庭莫學楚狂  
隳姓字知音還有子期聽

栖白

栖白越中僧前與姚合交後與李洞曹松相贈  
荅宣宗朝嘗居薦福寺內供奉賜紫詩一卷今存十六首

邊思

西北黃雲暮  
聲聲畫角愁  
陰山一夜雨  
白草四郊秋  
亂雁鳴寒渡  
飛沙入廢樓  
何時番色盡  
此地見芳洲

八月十五夜詠月

尋常三五夜  
不是不嬋娟  
及至中秋滿  
還勝別夜圓  
清光疑有露  
皓魄爽無煙  
自古人皆望  
年來又一年

尋山僧真勝上人不遇

松下禪栖所  
苔滋徑莫分  
青山春暮見  
流水夜深聞  
不坐看心石  
應隨出定雲  
猿猴非可問  
巖谷自空曛

贈李溟秀才

南居古廟深  
高樹宿山禽  
明月上清漢  
騷人動楚吟  
數篇正始韻  
一片補亡心  
孤憤歎何謝  
雲波不可尋

送石秀才

正是歎羈游  
知音拜楚侯  
何須辭遠道  
自可樂扁舟  
倚棹江洲雨  
聞猿島岫秋  
謝家山水興  
終日待詩流

送造微上人游五臺及禮本師

寒空金錫響  
欲過渭陽津  
極目多來鴈  
孤城少故人  
與師雖別久  
於法本相親  
又對清涼月  
中宵語宿因

送禪師宗極歸玉峰

背郭去歸宿  
頭陀意頗濃  
鶴爭栖遠樹  
猿闢上孤峰  
夜戍經霜月  
秋城過雨鐘  
由來無定止  
何處訪高蹤

送僧歸舊山



談空與破邪獻壽復榮家白日一作星得何傷青天落幾花傳燈皆有分化俗獨無涯却入中峯寺還知有聚沙

送圓仁三藏歸本國

家山臨晚日海路信歸橈樹滅渾無岸風生只有潮歲窮程未盡天末國仍遙已入闍王夢香花境外邀

送王鍊師歸嵩嶽

飄然綠毛節杳去洛城端隔水見秋嶽兼霜掃石壇一溪松色古半夜鶴聲寒迴與人寰別勞生不可觀

壽昌節賦得紅雲表夏日

景候融融陰氣潛如峰雲共火相兼霞光捧日登天上丹彩乘風入殿簷行逐赤龍千歲出明當朱夏萬方瞻微臣多幸逢佳節得賦殊祥近御簾

經廢宮

終日河聲咽暮空煙愁此地畫濛濛錦帆東去沙侵苑玉輦西來樹滿宮魯客望津天欲雪朔鴻離岍葦生風那堪獨立思前事回首殘陽雉堞紅

贈識古法師

重城深寺講初休却憶家山訪舊游對月與君相送夜聞蛩教我獨驚秋雲心杳杳難爲別鶴性蕭蕭不可留遙想孤舟清渭上飄然帆影起離愁

月夜懷劉秀才一作元平詩

獨夜相思但自勞阮生吟罷夢雲濤此時小定未禪寂古塔月中松磬高

寄南山景禪師

一度林前見遠公靜聞真語世情空至今寂寞禪心在任起桃花柳絮風

哭劉得仁

爲愛詩名吟至死一作此風魂雪魄去難招直須桂子落墳上生得一枝宛始消

應物

應物大中時江南詩僧也嘗與羅鄴唱酬作九華山記詩二首



龍潭

石激懸流雪滿灣五龍潛處野雲閑暫收雷電九峰下且飲溪潭一水間浪引浮槎依北岬波分曉日浸東山  
回瞻四面如看畫須信游人不欲還

題化城寺

平高遠處創蓮宮一水縈流處處通畫閣畫關遲日畔禪房夜掩碧雲中平川不見龍行雨幽谷遙聞虎嘯風  
偶與遊人論法要真元浩浩理無窮

智亮

智亮大中中閩開元寺僧嘗祖臍行乞號祖臍和尚詩二首

戴雲山吟

人間謾說上天梯上萬千迴總是迷曾似老人巖上坐清風明月與心齊

又

戴雲山頂白雲齊登頂方知世界低異艸奇花人不識一池分作九條溪

良乂

良乂大中時僧詩一首

答盧鄴一本題上有秋山二字

風泉祇一作尺向夢中聞身外無餘可寄君當戶一輪惟曉月掛簷數片是秋雲

常達

常達字文舉俗姓顧發跡河陽大福山大中中居吳郡破山寺詩八首

山居八詠

身閑依祖寺志僻性多慵少室遺真旨層樓起暮鐘啜茶思好水對月數諸峰有問山中趣庭前是古松  
晚望虛庭物心心見祖情煙開分嶽色雨霧滅泉聲遠樹猿長嘯層巖日乍明更堪論的意林下筍新生  
一室塵埃外儵然祇麼常睡來開寢帳鐘動下禪林溪浸山光冷秋凋木葉黃時提祖師意欹石看斜陽



西來真祖意祇在見聞中寒雁一聲過疎林幾葉空心閑憐水石身老怯霜風爲報參玄者山山月色同  
真性寂無機塵塵祖佛師日明庭砌暖霜苦藥苗衰汲水和煙酌栽松帶雪移好聽玄旨處後嘯嶺南枝  
古寺凭欄危時聞舉妙機庭空月色淨夜迴磬聲移漏轉寒更急燈殘冷焰微太虛同萬象相謂話玄微  
胡僧論的旨物物唱圓成疎柳春來翠幽窗日漸明禪心清石室蝶翅覆花英好聽談玄處喬松鶴數聲  
祖祖唯心旨春融日正長霜輕莎草綠風細藥苗香月滿真如淨花開覺樹芳庭前鶯囀處時聽語圓常

僧鸞

僧鸞少有逸才不事拘檢謁薛能尚書以其顛率令之出家後入京爲文章供奉賜紫或云即解于鳳詩二首

苦熱行

燭龍銜火飛天地平陸無風海波沸彤雲疊疊聳奇峰一作彤雲疊焰焰流光熱凝翠煙鳥搏鵬輝雙翅義和赫怒

強總轡飲流夸父斃長途如見當中印王字明明夜西朝又東古來有道仍再中扶桑老葉蔽不得輝華直欲

一作凌蒼空行一作人揮汗翻成兩口燥喉乾噉塵土西郊雲色晝冥冥如何不救生靈苦何山怪木藏蛟龍縮鱗

卷鬣爲乖慵不發滂澤注天下欲使風雷何所從旱苗原上枯成焰嶽靈徒祝無神驗豪家簾外喚清風水紋  
明角鋪長箏玉扇畫堂凝夜秋歌豔繞梁催莫愁陽烏落盡酒不醒扶上西園當月樓廢田曠死非吾屬庫有  
黃金倉有粟

贈李粲秀才

字輝

隴西輝用真才子摛奇探險無倫比筆下銛磨巨闕鋒胸中靜灑西江水哀弦古樂清人耳月露激寒哭秋鬼  
苔地無塵到曉吟杉松老葉風乾起十軸示余三百篇金碧爛光燒蜀牋雄芒逸氣測不得使我躑躅成狂顛  
大郊遠濶空無邊凝明淡綠收餘煙曠懷相對景何限落日亂峰青倚天又驚大舶帆高懸行濤劈浪凌飛仙  
回首瞥見五千仞撲下香爐瀑布泉何事古人誇八斗焉敢今朝定妍醜颯風驅雷暫不停始向場中稱大手  
駿如健鶻鷲與鵬拳雲獵野翻重霄狐狸竄伏不敢動却下雙鳴當迅颺愁如湘靈哭湘浦咽咽哀音隔雲霧  
九嶷深翠轉巍峨仙骨寒消不知處清同野客敲越甌丁當急響涵清秋鸞雛相引叫未定霜結夜闌仍在樓  
高若太空露雲物片白激青皆彷彿仙鶴閑從淨碧飛巨鼇頭戴蓬萊出前輩歌詩惟翰林神仙老格何高深



鞭駢造化繞筆轉燦爛不為酸苦吟夢乘明月清沈沈飛到天台天姥岑傾湖湧海數百字字字不朽長縱金  
此日多君可儔侶堆珠疊璣滿玄圃終日並轡遊崑崙十二樓中宴王母

神穎

神穎咸通中僧詩二首

和王季文題九華山

衆岳雄分野九華鎮南朝彩筆疑空遠崔嵬寄青霄龍潭古仙府靈藥今不凋瑩為滄海鏡煙霞作荒標造化  
心數奇性狀精氣饒玉樹鬱玲瓏天籟韻蕭寥寂寂尋乳竇兢兢行石橋通泉漱雲母藉草紫香苔我住一作幽  
且深君賞昏復朝稀逢發清唱片片霜凌颺

宿嚴陵釣臺

寒谷荒臺七里洲賢人永逐水東流獨狼叫斷青天月千古冥冥潭樹秋

澹交

澹交蘇州昭隱寺僧乾符中人也詩三首

效古

榮辱又榮辱一何翻與覆人生百歲中孰肯死前足玄鬢忽如絲青叢不再綠自古爭名徒黃金是誰祿

病後作

未得忘一作身法此身終未安病腸猶可洗瘦骨不禁寒藥少心情一作神餌經無氣方看悠悠片雲質一作獨對一作夕

陽殘

寫真

圖形期自見自見却傷神已是夢中夢更逢身外身水花凝幻質墨彩染一作空塵堪笑予兼爾俱為未了人

文秀

文秀江南僧居長安以文章應制與鄭谷善詩一首

端午



節分端午自一作有誰言萬古傳聞為屈原堪笑楚江空渺渺一作浩浩不能洗得直臣冤

懷楚

懷楚唐末僧住安州白兆竺乾院詩二首

謝友人見訪留詩

軒車誰肯到泉石自相親暮雨凋殘寺秋風悵望人庭新一片葉衣故一作上十年塵一作春賴有瑤華贈清吟愈病身

送新平故人

常聽一作建倉庚思舊友又因蝴蝶夢生涯一千餘里河連一作邊郭三十六峰寒到家陰島直分東號一作曉雁晴樓高入

上陽鴉姜嫄廟北與君別應笑薄寒悲落花

耽章

耽章俗姓黃莆田人出家于福州靈石嗣法洞宗慕曹溪六祖乃名其山曰曹世以曹山稱之後住仰山詩一首

辭南平鍾王召

摧殘枯木倚寒林幾度逢春不變心樵客見之猶不採郢人何事苦搜尋

子蘭

子蘭昭宗朝文章供奉詩一卷

短歌行

日月何忙忙出沒住不得使我勇壯心少年如頃刻人生石火光通時少於塞四季倏往來寒暑變為賊偷人面上花奪人頭上黑

飲馬長城窟

游客長城下飲馬長城窟馬嘶聞水腥為浸一作征人骨豈不是流泉終不成潺湲一本無此二句洗盡骨上土不洗骨中冤

骨若比一作不流水四海有還魂一本無此二字空流嗚咽聲聲中疑是一作骨言

夜直



大內隔重牆多聞樂未央燈明宮樹色茶煮禁泉香鳳輦通門靜雞歌入漏長宴榮陪御席話密近龍章吟步彤  
庭月眠分玉署涼欲粘朱綬重頻草白麻忙筆力將羣吏人情在致唐萬方瞻仰處晨夕面吾皇

贈行脚僧

世界曾行遍全無行可修炎涼三衲共生死一身体片斷雲隨體稀疎雪滿頭此門無所著不肯暫淹留

秋日思舊山

咸言上國一作天上繁華豈謂帝城羈旅十點五點殘螢千聲萬聲秋雨白雲江上故鄉月下風前吟處欲去不去遲遲

未展平生所佇

寄乾陵楊侍郎

冷落官資不畏貧司曹且共內官分步量野色成公案點檢樵聲入秦聞陵廟路因朝去掃御爐香每夜來焚碑  
寒樹古神門上管得無窮空白雲

登樓憶友

物象遠濛濛周迴極望中帶煙千井樹和磬一樓風月色寒沈地波聲夜颺空登臨無限趣恨不與君同

華嚴寺望樊川

萬木葉初紅人家樹色中疎鐘搖兩脚秋水浸雲容雪磧回寒鴈村燈促夜春舊山歸未得生計欲何從

與道侶同於水陸寺會宿

論道窮一作同心少有朋此時清話昔年曾柿凋紅葉鋪寒井鵠一作鶴墜霜毛著定僧風遶遠聲秋澗水竹穿深色夜房

燈出門盡是勞生者只此長閑幾箇能

城上吟

古塚密於草新墳侵官一作道城外無閑地城中人又老

襄陽曲

為憶南遊人移家大堤住千帆萬帆來盡過一作過盡門前去

誠貪



多求待心足未足旋傾覆明知貪者心求榮不求辱

蟬二首

獨蟬初唱古槐枝委曲悲涼斷續遲雨後忽聞誰最苦異鄉孤館憶家時

衰柳蟬吟旁濁河正當殘日角聲和尋常不足一作是少愁思此際聞時愁更多

太平坊尋裴郎中故宅

不語淒涼無限情荒堦行盡又重行昔年住此何人一作此住人何在滿地一作空見槐花秋草生

登樓

邊邑鴻聲一例秋大波平日遶山流故人千里同明月盡夕無言空倚樓

長安早秋

風舞槐花落御溝終南山色入城秋門門走馬徵兵急公子笙歌醉玉樓

對雪

密密無聲墜碧空霏霏有韻舞微風幽人吟望搜辭處飄入窗來落硯中

鷓鴣

翠毛丹脣乍教時終日無寥似憶歸近來偷一作倚解人言語亂向金籠說是非

晚景

池荷衰颯菊芬芳策杖吟詩上草堂滿目暮雲風卷盡郡樓寒角數聲長

長安傷春

霜隕中春花半無狂遊恣飲盡兇徒年年賞翫公卿輩今委溝塍骨漸枯

河梁晚望二首

水勢滔滔不可量漁舟容易泛滄浪連山翠靄籠沙渚白鳥翩翩下夕陽

雨添一夜秋濤濶極目茫茫似接天不知龍物潛何處魚躍蛙鳴滿檻前

悲長安



何事天時禍未回生靈愁悴苦寒灰豈知萬頃繁華地強半今為瓦礫堆

千葉石榴花

一朵花開千葉紅開時又不藉春風若教移在香閨畔定與佳人豔態同

觀碁

拂局盡消時能因長路遲點頭初得計格手持無疑寂默親遺景凝神入過思共藏多少意不語兩相知

可止

可止姓馬氏范陽房山人長近體律詩乾寧中賜紫後唐明宗令住持洛京長壽寺署號文智大師有三山集今存詩九首

山居

雪消春力展花漫洞門垂果長纖枝曲巖崩直道移重猿園淺井闢鼠下疎籬寒食微燈在高風勢微破

贈樊川長老

一作清尚詩

瘦顏顴骨見滿面雪毫垂坐石鳥疑死出門人謂癡照身潭入楚浸影檜生隋太白曾經夏清風涼四肢

寄積麥山會如長老

默然如大道塵世不相關青檜行時靜白雲禪處閑貧高一生行病長十年顏夏滿期游寺尋山又下山

送僧

四海無拘繫行心與自濃百年三事衲萬里一枝筇夜減當晴影春消過雪蹤白雲深處去知宿在何峰

哭賈島

燕生松雪地蜀死葬山根詩僻降今古官卑悞子孫塚闌寒月色人哭苦吟魂墓雨滴碑字年年添蘇痕

雪十二韻

落處咸過尺翛然物象淒瑞凝金殿上寒甚玉關西潤比江河普明將日月齊凌雲花頂膩鎖徑竹梢低出谷樵童怯歸林野鳥迷煮茶融破練磨墨染成鷺陷兔埋平澤和魚凍合溪入樓消酒力當檻寫詩題道路依憑馬朝



昏委託雞洞深狼作族松亞鶴移棲及夏清巖穴經春溜石梯豐年兼泰國天道育黔黎

精舍遇雨

空門寂寂淡吾身溪雨微微洗客塵臥向白雲情未盡任他黃鳥醉芳春

小雪

落雪臨風不厭看更多還恐蔽林巒愁人正在書窗下一片飛來一片寒

送婆羅門僧

雪嶺金河獨向東吳山楚澤意無窮如今白首鄉心盡萬里歸程在夢中

句

不知誰會喃喃語必向王前報太平

中山節度王處直座誦白鶴時請侯兼并王欲繼好息民故云高僧傳

雲表

雲表唐末於豫章講法華慈恩大疏法席稱盛詩一首

寒食日

寒食悲看郭外春野田無處不傷神平原纍纍一作添新塚半一作是去年來哭人

歸仁

歸仁唐末江南僧住京洛靈泉詩六首

自遣

日日為詩苦誰論春與秋一聯如得意萬事總忘憂雨墮花臨砌風吹竹近樓不吟頭也白任白此生頭

酬沈先輩卷

一百八十首清冷韻可敲任從人不愛終是我難拋桂魄吟來滿蒲團坐得凹先生聲價在寰宇幾人抄

題賈島吟詩臺

此臺如可廢此恨有誰平縱使迷青草終難沒舊名天悲朝雨色嶽哭夜猿聲不是心偏苦應關自古情

悼羅隱

可上 卷二 即雲 隱



一著讒一作謝書未快心幾抽胸臆縱狂吟管中窺豹我猶在海上釣鼈君也沈歲月盡能消憤懣寰區那更有知音長安冠蓋皆塗地仍喜先生葬碧岑

題楚廟

羞容難更返江東誰問從來百戰功天地有心歸道德山河無力為英雄蘆花尚認霜戈白海日猶思火陣紅也是男兒成敗事不須惆悵對西風

牡丹

三春堪惜牡丹奇半倚朱欄欲綻時天下更無花勝此人間偏得貴相宜偷香黑蟻斜穿葉觀蕊黃蜂倒挂枝除却解禪心不動算應狂殺五陵兒

卿雲

卿雲唐末嶺南僧詩四首

舊國里一作舊里

舊居梨一作梨嶺下風景近炎方地暖生春早一作草家貧覺歲長石房雲過濕衫一作衫徑雨餘香日夕竟一作入無事詩書聊

自強

秋日江居閑詠

寄居江島邊閑詠見一作幾秋殘草白牛羊瘦一作瘦風高稷鳥寒檢方醫故疾挑薺備中餐時復停書卷鉏莎種木蘭

長安言懷寄沈彬侍郎

故園梨一作梨嶺下歸路接天涯生作長安草勝為邊地花雁南飛不到書北寄來賒堪羨神仙客青雲早致家

送人游塞

去去玉關路省君曾未行塞深多伏寇時靜亦一作欲屯兵雪每先秋落花嘗近夏生閑陪射鵬將應到受降城

隱巖

隱巖唐末匡廬僧詩五首

逢老人



路逢一老翁兩鬢白如雪一里二里行四回五回歇

牧童

牧童見人俱不識一作會盡着芒鞋戴箬笠朝陽未出衆山晴露滴蓑衣猶半濕二月三月時平原草初綠三箇五箇騎羸牛前村後村來放牧笛聲纔一舉衆稚齊歌舞看看白日向西斜各自騎牛又歸去

蜀中送人游廬山

君游正值芳春月蜀道千山皆秀發溪邊十里五里花雲外三峯兩峰雪君上匡山我舊居松蘿拋擲十年餘君行試到山前問山鳥只今相憶無

琴

七條絲上寄深意澗水松風生十指自乃知音猶尚稀欲教更入何人耳

浮橋

橫壓驚波防沒溺當初元朔是軍機行人到此全無滯一片江雲踏欲飛

冷然

冷然唐末僧詩一首

宿九華化成寺莊

佛寺孤莊千嶂間我來詩境強相關巖邊樹動猿下澗雲裏錫鳴僧上山松月影寒生碧落石泉聲亂噴潺湲明朝更躡層霄去誓共煙霞到老閑

大愚

大愚鄴都青蓮寺沙門詩一首

乞荆浩畫

六幅故牢健知君恣筆蹤不求千澗水止要兩株松樹下留盤石天邊縱遠峰近巖幽濕處惟藉墨煙濃

懷濟

懷濟秣歸郡僧詩二首

卷之二 冷然 大愚 懷濟 巨超



上歸州刺史代通狀二首

懷濟能遠知未兆之事東里人以神聖待之  
刺史于公補註乃以詩通狀于異而釋之

家在閩山西復西其中歲歲有鶯啼如今不在鶯啼處鶯在舊時啼處啼

家在閩山東復東其中歲歲有花紅而一作如今不在花紅處花在舊時紅處紅

恒超

恒超姓馮氏范陽人居棣州開元寺終于後漢之乾祐詩一首

辭郡守李公恩命

虛著褐衣老浮杯道不成誓傳經論死不染利名生厭樹遮山色憐窗向月明他時隨范蠡一棹五湖清

淨顯

淨顯五代時洛陽首座沙門詩一首

題廣愛寺楞伽山

靈異不能棲鳥雀幽竒終不着猿猱為經巢賊應無損縱使秦驅也謾勞珍重昔賢留像迹陵遷谷變自堅牢先二句

修雅

修雅唐法師詩一首

闍誦法華經歌

山色沈沈松煙冪冪空林之下盤陀之石石上有僧結跏橫膝誦白蓮經從旦至夕左之右之虎跡狼跡十片  
五片異花狼籍偶然相見未深相識知是古之人今之人是曇彥是曇翼我聞此經有深旨覺帝稱之有妙義  
合目冥心子細聽醍醐滴入焦腸裏佛之意今祖之髓我之心今經之旨可憐彈指及舉手不達目前今正是  
大矣哉甚竒特空王要使羣生得光輝一萬八千土土皆作黃金色四生六道一光中狂夫猶自問彌勒我  
亦當年學空寂一得無心便休息今日親聞誦此經始覺驢乘匪端的我亦當年不出戶不欲紅塵沾步武今  
日親聞誦此經始覺行行皆實所我亦當年愛吟咏將謂冥搜亂神定今日親聞誦此經何妨筆硯資真性我  
亦當年狎兒戲將謂光陰半虛棄今日親聞誦此經始覺聚沙非小事我昔曾游山與水將謂他山非故里今  
日親聞誦此經始覺山河無寸地我昔心猿未調伏常將金鎖虛拘束今日親聞誦此經始覺無物為拳拳師



誦此經經一字字字爛嚼醍醐味醍醐之味珍且美不在脣不在齒只在勞生方寸裏師誦此經經一句句句白牛親動步白牛之步疾如風不在西不在東只在浮生日用中日用不知一何苦酒之腸飯之腑長者揚聲喚不迴何異聾何異瞽世人之耳非不聽耳聰特向經中聾世人之目非不明目明特向經中盲合聰不聰合明不明聽聽上下浪死虛生世人縱識師之音誰人能識師之心世人縱識師之形誰人能識師之名師名醫王行佛令來與衆生治心病能使迷者醒狂者定垢者淨邪者正凡者聖如是則非但天恭敬人恭敬亦合龍讚詠鬼讚詠佛讚詠豈得背覺合塵之徒不稽首而歸命

元寂

元寂俗姓高居昇元寺保大中授左街僧錄內供奉賜紫坐飲酒狂歌落職後醉死于石子岡詩一首

馬全書云寂日以狂歌爲事大醉則十數小兒隨之行歌于路與羣兒互相應和窮苦無人

酒禿酒禿何榮何辱但見衣冠成古丘不見江河變陵谷

若虛

若虛南唐僧隱廬山石室李主累徵不就詩三首

懷廬山舊隱

九疊嵯峨倚着天悔隨寒瀑下巖煙深秋猿鳥來心上夜靜松杉到眼前書架想遭苔蘚裏石窗應被薜蘿纏一枝筇竹游江北不見爐峰二十年

樂仙一作真觀

樂氏騎龍上碧天東吳遺宅尚依然悟來大道無多事真後丹元一作經不值錢老樹夜風蟲咬葉古垣春雨蘚

生一作松傾鶴一作死桑田變一作華表歸鄉未有年

古鏡

軒后紅一作爐獨鑄成蘚痕磨落月輪呈萬般物象皆能鑒一箇人心不可明匣內乍開鸞鳳活臺前高挂鬼神驚百年肝膽堪將比祇怕看頻素髮生

文益



文益餘杭人姓魯住金陵清凉寺世稱法眼宗詩一首

觀木平和尚

木平山裏人貌古年一作復少相看陌路同論心秋月皎懷一作衲線非蠶助歌聲有鳥城闕今日來一謳一作曾已曉

无則

无則五代時人為法眼文益禪師弟子詩三首

鷺鷥

白蘋紅蓼碧江涯日暖雙雙立睡時願揭金籠放歸去却隨沙鶴鬪輕絲

百舌鳥二首

千愁萬恨過花時似向春風怨別離若使衆禽俱解語一生懷抱有誰知  
長截隣雞叫五更數般名字百般聲饒伊搖舌先知曉也待青天明即鳴

謙光

謙光金陵人素有才辨江南國主禮之詩一首

賞牡丹應教

擁袖對芳叢由來事不同鬢從今日白花似去年紅艷異隨朝露馨香逐曉風何須對零落然後始知空

貫休

貫休字德隱俗姓姜氏蘭谿人七歲出家日讀經書千字過目不忘既精奧義詩亦奇險兼工書畫初為吳越錢鏐所重後謁成汭荆南汭欲授書法休曰須登壇乃授汭怒遣放之黔天復中入益州王建禮遇之署號禪月大師或呼為得得來和尚終於蜀年八十一初有西嶽集吳融為序極稱之後弟子曇域更名寶月集其全集三十卷已亡胡震亨謂宋睦州刻本多載他人詩不足信其說亦不知何據胡存詩僅二卷今編十二卷

善哉行傷古曲無知音

有美一人兮婉如青揚識曲別音兮令姿煌煌繡袂捧琴兮登君子堂如彼萱草兮使我憂忘欲贈之以紫玉



尺白銀鐙久不見之兮湘水茫茫

讀離騷經

湘江濱湘江濱蘭紅芷白波如銀終須一去呼湘君問湘神雲中君不知何以交靈均我恐湘江之魚兮死後盡為人曾食靈均之內兮箇箇為忠臣又想靈均之骨兮終不曲千年波底色如玉誰能入水少取得香沐函題貢上國貢上國即全勝和璞懸瓌垂棘結綠

陽春曲

江東廣明初作

為口莫學阮嗣宗不言是非非至公為手須似朱雲輩折檻英風至今在男兒結髮事君親須敦前賢多慷慨歷數雍熙房與杜魏公姚公宋開府盡向天上仙宮閑處坐何不却辭上帝下下土忍見蒼生苦苦苦

白雪曲

列鼎佩金章淚眼看風枝却思食藜藿身作屠沽兒負米無遠近所希升斗歸為人無貴賤莫學雞狗肥斯言如不忘別更無光輝斯言如或忘即安用人為

上留田

父不父兄不兄上留田螿賊生徒陟岡淚崢嶸我欲使諸凡鳥雀盡變為鵲鴿我欲使諸凡草木盡變為田荆鄰人歌鄰人歌古風清風生

胡無人

一本有行字

霍嫖姚趙充國天子將之平朔漠肉胡之肉燼胡帳幄千里萬里唯留胡之空殼邊風蕭蕭榆葉初落殺氣晝赤枯骨夜哭將軍既立殊勲遂有胡無人曲我聞之天子富有四海德被無垠但令一物得所八表來賓亦何必令彼胡無人

苦寒行

北風北風職何嚴毒摧壯士心縮金烏足凍雲囂囂礙雪一片下不得聲遠枯桑根在沙塞黃河徹底頑直到海一氣搏束萬物無態唯有吾庭前杉松樹枝枝健在

萬里

一本有曲字



兔不遲烏更急但恐穆王八駿著鞭不及所以蒿里墳出藪藪氣凌雲天龍騰鳳集盡為風消土喫狐掘蟻拾黃金不啼玉不泣白楊騷屑亂風愁月折碑石人莽穢榛沒牛羊寒宰時見牧童兒弄枯骨

臨高臺

涼風吹遠念使我升高臺寧知數片雲不是舊山來故人天一涯久客殊未回鴈來不得書空寄聲哀哀

杞梁妻

秦之無道兮四海枯築長城兮遮北胡築人築土一萬里杞梁貞婦啼鳴嗚上無父兮中無夫下無子兮孤復孤一號城崩塞色苦再號杞梁骨出土疲魂飢魄相逐歸陌上少年莫相非

古離別

離恨如旨酒古今飲皆醉只恐長江水盡是兒女淚伊余非此輩送人空把臂他日再相逢清風動天地

戰城南二首

萬里桑乾傍茫茫古蕃壤將軍貌憔悴撫劍悲年長胡兵尚陵逼久住亦非強邯鄲少年輩箇箇有伎倆拖槍半夜去雪片大如掌

磧中有陰兵戰馬時驚蹶輕猛李陵心摧殘蘇武節黃金鎖子甲風吹色如鐵十載不封侯茫茫向誰說

少年行

紀事作公子行一本後二首作公子行係入蜀王建遇之甚厚一日召令誦近詩時貴戚皆坐休欲誦之乃稱公子行建善之貴倖皆惡之

錦衣鮮華手擎鵝閑行氣貌多輕忽稼穡艱難總不知五帝三皇一作王是何物

自拳五色裘進入他人宅却捉蒼頭奴玉鞭打一百面白如削玉猖狂曲江曲馬上黃金鞍適來新賭得

夢遊仙四首

夢到海中山入箇白銀宅逢見一道士稱是李八伯三四仙女兒身著瑟瑟衣手把明月珠打落金色梨

車渠地無塵行至瑤池濱森森椿樹下白龍來喚人

宮殿崢嶸籠紫氣金渠玉砂五色水守閭仙婢相倚睡偷摘蟠桃幾倒地

輕薄篇二首

繡林錦野春態相壓誰家少年馬蹄蹋蹋關雞走狗夜不歸一擲賭却如花妾誰云一作誰言不顯不狂其名不彰



悲夫

木落蕭蕭蟲一作鳴唧唧不覺朱萼臉紅霜劫髮漆世途多事泣向秋日方今少壯不努力老大徒傷悲如何

長安道

憧憧合合八表一轍黃塵霧合車馬火熱名湯風雨利輾霜雪千車萬馱半宿關月上有堯禹下有夔高紫氣

銀輪兮一本無常覆金闕仙掌捧日兮一本無濁河澄澈愚將草木兮有言一本作有言與華封人兮不別一本作不別

洛陽塵

昔時昔時洛城人今作茫茫洛城塵我聞富有石季倫樓臺五色干星辰樂如天樂日夜聞錦妹繡妾何紛紛  
真珠簾中姑射神人文金線玉香成暮雲孫秀若不殺晉室應更貧伊水削行路塚石花磷磷蒼茫金谷園牛  
羊齧荆榛飛鳥好羽毛疑是綠珠身

富貴曲二首

有金張族驕奢相續瓊樹玉堂雕牆繡轂統綺雜鍾鼓合合美人如白牡丹花半日只舞得一曲樂不樂足  
不足爭教他愛山青水綠

如神若仙似蘭同雪樂戒于極胡不知轍只欲更綴上落花恨不能把住明月太山肉盡東海酒竭佳人醉唱  
敲玉釵折寧知耘田車水翁日日多背欲裂

野田黃雀行

高樹風多吹爾巢落深蒿葉暖宜爾依泊莫近鴉類蛛網亦惡飲野田之清水食野田之黃粟深花中睡埽土  
裏浴如此即全勝啄太倉之穀而更穿人之屋

古意九首

一雨火雲盡閉門心冥冥蘭花與芙蓉滿院同芳馨佳人天一涯好鳥何嚶嚶一作我有雙白璧不羨于虞卿我  
有徑寸珠別是天地精玩之室生白瀟灑身安輕只應天上人見我雙眼明

陽鳥爍萬物草木懷春恩茫茫塵土飛培壅名利根我本是蓑笠幼知天子尊學為毛氏詩亦多直致言不慕  
需臚一作類附勢同崩奔唯尋桃李蹊去去長者門



美人如遊龍被服金鴛鴦手把古刀尺在彼白玉堂文章深掣曳珂珮鳴丁當好風吹桃花片片落銀床何妨一作學一作羽翰遠逐朱鳥翔

乾坤有清氣散入詩人脾聖賢遺清風不在惡木枝千人萬人中一人兩人知憶在東溪日花開葉落時幾一作擬以黃金鑄作鍾子期

莫輕白雲白不與風雨會莫見守羊兒或是初平輩人生非日月光輝豈常在一榮與一辱古今一作常相對君一本無不見于公門子孫好冠蓋

古交如真金百煉色不回今交如暴流儻忽生塵埃我願君子氣散為青松我恐荆棘花只為小人開傷心復傷心吟上高高臺

常思謝康樂文章有神力是何清風清凜然似相識一種為頑巖得作翻經石一種為枯槁得作登山屐永嘉為郡後山水添鮮碧何當學羽翰一去觀遺跡

常思李太白仙筆驅造化玄宗致之七寶床虎殿龍樓無不可一朝力士脫靴後玉上青蠅生一箇紫皇殿前五色麟忽然掣斷黃金鎖五湖大浪如銀山滿船載酒搥鼓過賀老成異物顛狂誰敢和寧知江邊墳不是猶

醉臥

憶在山中時丹桂花葳蕤紅泉浸瑤草白日一作生華滋箬屋開地鑿翠墻挂藤衣看經竹窗邊白猿三兩一作枝

東峰有老人眼碧頭骨奇種薤煮白石旨趣如嬰兒月上來打門月落方始歸授我微妙訣恬澹一作無所為別

來六七年只恐白日飛

酷吏詞 唐末寇亂休遊地者宮刑師高氏優待之節于龍與幸會者宿時政不治乃作酷吏詞以刺之

霖雨灑灑風吼如斷有叟有叟暮投我宿吁歎自語云太守酷如何如何掠脂幹肉吳姬唱一曲等閒破紅東韓娥唱一曲錦段鮮照屋寧知一曲兩曲謔曾使千人萬人哭不惟哭亦白其頭飢其族所以祥風不來和氣

一作不復蝗乎一作暨乎一作東西南北

還舉人歌行卷

厚於鐵圍山上鐵薄似雙成仙體顯蜀機鳳雛動楚璧珊瑚枝枝撐著月王愷家中藏雞掘顏回飢俛愁天雪



古松直筆雷不折  
雪衣女啄蟪桃缺  
佩入龍宮步遲遲  
繡簾銀殿何參差  
即不知驪龍失珠知不知

陳宮詞

緬想當時宮闕盛  
荒宴椒房懷堯聖  
玉樹花歌百花裏  
珊瑚窗中海日迸  
大臣來朝酒未醒  
酒醒忠諫多不聽  
陳宮因此成野田  
耕人犁破宮人鏡

擬齊梁酬所知見贈二首

靜只焚香坐詠懷  
悲歲關佳人忽有贈  
滿手紅琅玕不獨耀  
肌魄將行爲羽翰  
酬如上青天風雪空漫漫  
美如仙鼎金清如織手  
琴孫登嘯一聲縹緲不可尋  
但覺神洋洋如入三昧林  
釋手復在手古意深復深  
慚無英瓊瑤何以酬知音

經古戰場

茫茫凶荒迴如天  
設駐馬四顧氣候迂  
結秋空崢嶸黃日將沒  
多少行人白日見物莫  
道路高低盡是戰骨莫  
見地赤碧盡是征血  
昔人昔人既能忠盡于力  
身糜戈戟脂其風膏其域  
今人何不繩其脛植其食  
而使空曠年年常貯愁煙  
使我至此不能無言

村行遇獵

獵師紛紛走榛莽  
女亦相隨把弓矢  
南北東西盡殺心  
斷燒殘雲在圍裏  
鶻拂荒田兔成血  
竿打黃茅雉驚起  
傷嗟箇輩亦是人  
一生將此關身已  
我聞天地之大德曰生  
又聞萬事皆天意  
何遣此人又如此  
猶更願天公一丈雪  
深山麋鹿盡凍死

漁家

赤蘆蓋屋低壓恰  
沙漲柴門水痕壘  
黃雞青犬花蒙籠  
漁女漁兒掃風葉  
有叟相逢帶秋醉  
自拔船楫色無媿  
前山脚下得魚多  
惡浪堆中盡頭睡  
但得忘筌心自樂  
肯羨前賢釣清渭  
終須畫取挂秋堂  
與爾爲鄰有深意

田家作

田家老翁無可作  
晝甑蒸梨香漠漠  
只向堦前曝背眠  
赤桑大葉時時落  
古壑侵門桃竹密  
倉囤峨峨欲遮蔽  
日自云孫子解耕耘  
四五年來腹多實  
我聞此語心自悲  
世上悠悠豈得知  
稼而不穡徒爾爲



江邊祠

松森森江渾渾江邊古祠空閉門精靈應醉社日酒白龜咬斷葛蒲根花殘冷紅宿雨滴土龍甲濕鬼眼赤天符早晚下空碧昨夜前村行霹靂

苦熱寄赤松道者

天雲如燒人如炙天地鑪中更何適蟬喘雷乾冰井融些子清風有何益守羊真人聘之役高吟招隱倚碧壁紫氣紅煙鮮的的澗茗園瓜麴塵色驕冷奢涼合相憶

偶作二首

新詩一千首古錦初下機除月與鬼神別未有人知子期去不返浩浩良不悲不知天地間知者復是誰門前數枝路路車馬鳴名埃與利塵千里萬里行只見青山高豈見青山平朱門勢峨峨冠蓋何光明黃鳥在花裏青蟬奪其聲爾生非金玉豈常貴復貞寄言之子心可以歸無形

夜曲

蟪蛄切切風騷騷芙蓉噴香蟾蜍高孤燈耿耿征婦勞更深撲落金錯刀

春晚書山家

柴門寂寂黍飯馨山家煙火春雨晴庭花濛濛水泠泠小兒啼索樹上鶯

水一作橋香塘黑蒲森森鴛鴦鸚鵡如家禽前村後壟桑柘深東鄰西舍無相侵蠶娘洗蠶前溪涿牧童吹笛和衣

浴山翁留我宿又宿笑指西坡瓜豆熟

春晚閑居寄陳嵩伯

春霖閉門久春色聚庭木一夢辭舊山四鄰有新哭菰蒲生白水風篔擢纖玉為憶湖上翁花時獨冥目

長持經僧

勞勞長夜坐勞勞早起杉森森不見長人聲續續如流水縱金掙玉吐宮嚙微頭低草木手合神鬼日消三兩黃金爭得止佛言常持經者可日食三兩金而槁木朽枝一食而已傷嗟浮世之人善事不曾入耳

范范曲



茫茫復茫茫滿眼皆埃塵莫言白髮多並莖是愁筋未達苦雕僞及達多不仁淺深與高低盡能生棘榛茫茫  
四大愁殺人

古鏡詞上劉侍郎

至寶不自寶照古還照今仙人手胼胝寥泚秋沈沈不是十二面不是百煉金若非八彩者不可輒照臨卽歸  
玉案頭爲君整冠簪卽居吾君手照出天下心恭聞太宗朝此鏡當宸襟六合懸清光萬里無塵侵此鏡今又  
出天地還得一

送姜道士歸南岳

松品落落雪格索索眼有三角頭峭五岳若不居岳此處難著藥僮貌蠻名鄙彼葫蘆酒滿擔劣起萬里長風  
嘯一聲九貞須拍黃金几落葉蕭蕭 杳 送師言了意未了意未了他時爲我致取一部音聲鳥

了仙謠

海中紫霧蓬萊島安期子喬去何早遊戲多騎白騏驎鬚髮如銀未曾老亦留仙訣在人間函鏃終言藥非道  
始皇不得此深旨遠遣徐福生憂惱紫木黃精心上苗大還小還行中寶若師方術棄心師似雪山何處討

循吏曲上王使君

需宿需宿炳爛光合蒸蒸黎民鍾此多福自東自西自南自北伊飛伊走乳乳良牧和氣無形春光自成大信  
不信貽厥無朕需女需女爾亦須語使君爲理玄風震古需女需女爾亦須語我願喙長三千里枕著玉階奏  
明主

古鏡詞

我有一面鏡新磨似秋月上唯金膏香下狀驪龍窟等開不欲開醜者多不悅或問幾千年軒轅手中物

懷張爲周朴

張周二夫子詩好人太癖更不過嶺來如今頭盡白人傳禹力不到處河聲流向西周又到處卽閉戶逢君方  
展着張不知是不是若是卽大奇我又聞二公心與人不同一生常在寂寞中有時狂吟入僧宅錦囊烏啼荔



枝紅有時冥搜海山腦珊瑚枝動日杲杲聖君在上知不知赤面濁醪許多好

題弘顛三藏院

儀清態淡雕瓊環塔簾瀟灑無塵埃嶽茶如乳庭花開信心弟子時時來灌頂壇嚴伸福塞三十年功苦拘吏  
梵僧夢裏授微言雪嶺白牛力深得師曾受神僧真言於夢中水精一索香一爐紅蓮花舌生醍醐初聽喉音寶樓閣如聞魔王  
宮殿拉一作金瓦落次聽妙音大隨求更覺人間萬事深悠悠四音俱作清且柔愛河濁浪却倒流却倒流兮無  
處去碧海含空日初曙

古意代友人投所知

青松雖有花有花不如無貧井泉雖清且無金轆轤客從遠方來遺我古銅鏡挂之玉堂上如對軒轅聖天龍  
睡坤腹土蝕金鬣綠因知燕趙佳人顏似玉不得此鏡終不終字

聞知已入翰林

天驥頭似鳥儻忽四天下南金色如樵入火不見火吾交二名士遽立于帝左鳳姿既出世天意屬在我奇哉  
子淵頌無可無不可

上裴大夫二首

我有一端綺花彩鸞鳳羣佳人金錯刀何以裁此文

我有白雲琴樸斷天地精俚耳不使聞慮同衆樂聽指指法仙法應存聲聲聖人聲一彈四時和再彈中古清庭  
前梧桐枝颯颯南風生還希師曠懷見我心不輕

上劉商州

周邵吁嗟氣結爲禎祥雲客從遠方來持此將贈君時命偶不謬授館終南東惜惜良吏師不寐如老農丘軻  
文之天代天有餘功代天復代天后稷何所從

閑居擬齊梁四首

夜兩山草滋爽籟生古木閑吟竹仙偈清於嚼金玉螭蟬啼壞牆苟免悲局促道人優曇花迢迢遠山綠  
果熟無低枝芳香入屏帷故人久不來萱草何離離苦吟齋貌減更被杉風吹獨賴湖上翁時爲烹露葵



紅藕映嘉飭澄池照孤坐池痕放文彩雨氣增慵懂山翁寄木藥幸得秋病可終召十七人雲中備香火  
清氣生滄洲殘雲落林藪放鶴久不歸不知更歸否支策到江濱江皋木葉飛自憐爲客遠還如鵲遠枝南枝  
復北枝玉露沾毛衣

塞上曲二首

錦袷胡兒黑如漆騎羊上冰如箭疾蒲萄酒白雕腊紅首着根甜沙鼠出單于右臂何須斷天子昭昭本如日  
一握鬃髯一握絲須知只爲平戎術

去年轉關陰山脚生得單于却放却今年深入于不毛胡兵拔帳遺弓刀男兒須一作展平生志爲國輸忠合天  
地甲穿雖即一作失黃金劔缺猶能生紫氣塞草萋萋兵士苦胡虜如今勿胡虜封侯十萬始無心玉關凱一作生入  
君看取

擬齊梁體寄馮使君三首

庭鳥多好音相呼灌木中竹房更何有還如鳥巢空賴逢富人侯真東晉謝公煌煌發令姿珂珮鳴丁冬故山  
有深霞未如旌旗紅漸非衛霍松何以當清風  
露益暉聲長蕙蘭垂紫帶清吟待明月孤雲忽爲蓋伊余石林人本是燒畬輩頻接謝公棊輸多未曾賽  
大道貴無心聖賢爲始慕秋空共澄潔美玉同貞素偉哉桐江守雌黃出金口爲文能廢典談道弭空有雪林  
稿枯者坐石聽亦久還疑紫磨身成居靈運後

書匡山老僧菴

篔簹紅實好鳥語銀鬢瘦僧貌如祖香煙濛濛衣上聚冥心縹緲一作入鐵圍白麈作夢枕藤屨東峯山媪貢瓜乳

讀顧况歌行

雪泥露金水滴瓦楓檉火著僧留坐忽覩通翁况別一軸歌始覺詩魔辜負我花飛飛雪霏霏三珠樹曉珠累累  
妖狐爬出西子骨雷車拶破織女機憶昔鄱陽寺中見一碣通翁詞兮通翁札屐翼未伏王右軍李白不知誰  
擬殺別別若非仙眼應難別不可說不可說離亂離離應打折

冬末病中作二首



冬風吹草木亦吹我病根故人久不來冷落如丘園  
麟龍與摩詰吁歎非不聞顧惟年少時未合多憂懃風鍾  
遠孤枕雪水流凍痕空餘微妙心期空靜者論

胸中有一物旅拒復攻擊向下還上來唯疑是肺石山童頑且小用之復何益教洗煮茶錯雪團打鄰壁宛轉  
無好姿裴回更何適庭前早梅樹坐見花盡碧屋老多鼠窠窗卑一本露山脊近來胸中物已似輪藥力微吟復  
微吟依稀似莊鳥

遇葉進士

文章擬真宰儀冠冷如壁山寺偶相逢眼青勝山色氣隆多慷慨語澹無他力金繩殘果落竹閣涼雨滴自媿  
龍鍾人見此冲天翼

寄杜使君

清晨捲珠簾盥漱香滿室杉松經雪後別有精彩出琅函芙蓉書開之向塔日好鳥常解來孤雲偶相失有時  
作章句氣概還鮮逸茫茫世情世誰人愛真實清高慕玄度宴然琴道一殘磬隔風林微陽解冰筆亦知休明  
代諒無經濟術門前九箇峯終擬為文乞

寄高員外

冷冽蒼黃風似劈雪骨冰筋滿瑤席庭松流汗相抵噴霜絮重裘火無力孤峯地鑪燒白樞龐者道者應相憶  
儵忽維陽歲云暮寂寥不覺成章句惟應將寄藥珠宮一作禪刹雲深一來否

書陳處士屋壁二首

有叟傲堯日髮白肌膚紅妻子亦讀書種蘭清溪東處士有白雲有奇色紫桂含天風即應迎鶴書有羨於洞洪  
高步前山前高歌北山北數載賣甘橙山貲近云足新詩不將出往往僧乞得唯云李太白亦是偷桃賊吟狂  
鬼神走酒醞天地曩青芻生堦除櫛之束成束

對月作

今人看此月古人看此月如何古人心難向今人說古人求祿以及親及親如之何忠孝為朱輪今人求祿唯  
庇身庇身如之何惡木多斜文斜文復斜文顯室何紛紛



山茶花

風裁日染開仙圃百花色死狸血謬今朝一朶隋堦前應有看人怨孫秀

上孫使君

二十九句  
缺一字

聖主得賢臣天地方交泰恭惟嶽精粹多出於昭代君侯握文鏡獨立塵埃外王演俗容儀崔陵小風機馨香擁蘭雪峻秀高嵩岱嵇松領歲寒莊劍無礮淬威稜玉霜直匠石金槌大詩穿明月珠道拍安期背中興鸞鳳集直道風雲會萬卷似無書三山如歷塊德乎天所縱清矣誰堪對有法在朝端無塵到冠蓋具瞻從寡勿旦夕調鼎鼎為君整衢尊為君載蕃塞豈知吾后意憂此毗陵最親手賜彤弓蒼生是繫賴下車鄰寇散是物冰壺內冀遂喪廉平次公太繁碎袴襦動地父母歌闌闌雪鏢戈鋌非煙遠旌旆寧思子產冰宵羨任棠嗟忽如春再來不獨天重戴昂藏海嶠鶴冷碧仙庭檜物物動和氣家家有新態芙蓉開帶幕錦帳無纖嗟鼓角穿凍雲恩波動耕耒奸回改精魄禮教書紳帶必于堯舜日還似房杜輩野人有章句格力亦慷慨若不入丘門世間更誰愛

哭靈一上人

一公何不在空有遠公名共說岑山路今時不可行舊房松更老新塔草初生經論傳緇侶文章遍墨卿禪林枝幹折法宇棟梁傾誰俊修僧史應知傳已成

行路難

君不見山高海深人不測古往今來轉青碧淺近輕浮莫與交地卑只解生荆棘誰道黃金如糞土張耳陳餘斷消息行路難行路難君自看

不會當時

一作

作天地剛有多般愚與智到頭還用真宰心何如上下皆清氣大道冥冥不知處那堪頓得義和

轡義不義

一作

仁不仁擬學長生更容易負心一作為鑪復為火綠木求魚應且止君不見燒金煉石古帝王鬼火

熒熒白楊裏

君不見道傍廢井生古木本是驕奢貴人屋幾度美人照影來素綆銀餅濯纖玉雲飛雨散今如此繡閣雕甍作荒谷涕渭笙歌君莫誇不應常一作是西家哭休說遺編行者幾至竟終須合天理敗他成此亦何功蘇張終



作多言鬼行路難行路難不在羊腸裏

九有茫茫共堯日浪死虛生亦非一清淨玄音竟不聞花眼酒腸暗如漆或偶因片言隻字登第光二親又不

能獻可替否航要津口譚義軒與周孔履行不及屠沽人行路難行路難日暮途遠空悲歎

君不見道傍樹有寄生枝青青鬱鬱同榮衰無情之物尚如此為人不及還堪悲父歸墳兮未朝一作夕已分黃

金爭田宅高堂老母頭似霜一作雪心作數支一作枝淚常滴我聞忽如負芒刺不獨為君空歎息古人尺布猶可縫得

陽義犬一作夫令人憶寄言世上為人子孝義團圓莫如此若如此不道死兮更何俟

泊秋江

岸如洞庭山似剡船漾清溪涼勝簟月白風高不得眠枯葦叢邊釣師魘

嘲商客

葦蕭蕭風撼撼落日江頭何處客斜倚帆檣不喚人五湖浪向心中白

寄王滌

梅月多開戶衣裳潤欲滴寂寥雖無形不是小警敵地虛草木壯雨白桃李赤永日無人來庭花苦狼籍吟高好鳥觀風靜茶煙直唯思萊子來衣拖五般色

上馮使君五首

撐船碧江上春日何遲遲汀花最深處拾得鴛鴦兒 漁父無憂苦水仙亦何別眠在綠葦邊不知釣筒發

樵叟無憂苦地仙亦何別茆屋岸花中弄孫頭似雪 扣舷得新詩茶煮桃花水薜薜數片帆去去殊未已

仁政無不及乳獺將子行誰家苦竹林中有讀書聲

擬一本無君子有所思二首

我愛正考甫思賢作商頌我愛揚子雲理亂皆如鳳振衣中夜起露花香旖旎撲碎驪龍明月珠敲出鳳皇五色髓陋巷蕭蕭風拊枅一作新緬想斯人勝珪璧寂寥千載不相逢無限區區盡虛擲君不見沈約道佳人不在茲

春光為誰惜

安得龍猛筆點石為黃金西嶽龍猛大士於現中磨藥點筆成金西天有龍猛金其色紫散為一作向醅吏家使無貪殘心甘棠密葉成翠幄一作鳳不來



天地塞所以傾國傾城人如今如今不可得一作所以傾城人如今不可得

古塞下曲四首一本無古字亦無四首二字第三首另題

古塞腥膻地胡兵聚如蠅寒鵬中髀石落在黃河水蒼茫邏沙城枿枿賊氣與鑄金禱秋穹還擬相憑陵

戰一作骨踐成一作黃塵飛入征人目黃雲一作忽變黑戰鬼作陣一作哭陰風吼大漠火號出不得誰為天子前唱此邊

城曲

日向平沙出還向平沙沒飛蓬落軍一作陣營驚鵬去天末帝鄉青樓倚霄漢歌吹掀天對花月豈知塞上望鄉人

日日雙眸滴清血

狼煙在陣雲向奴愛輕敵領兵不知數牛羊復吞積嚴冬大河枯嫖姚去深擊戰血染黃沙風吹暎天赤

鼓腹曲

我昔不幸兮遭百罹蒼蒼留我兮到好時耳聞鐘鼓兮生豐肌白髮却黑兮自不知東鄰老人好吹笛倉園我  
我穀多赤餅紅鰕兮枿麋脂有酒如濁醪兮呼我喫往往醉倒潢洿之水邊兮人盡識孰云六五帝兮四三皇  
如夔如龍兮如龔黃吾不知此之言兮是何之言兮

經曠禪師院

吾師楞伽山中人氣岸古淡僧麒麟曹溪老兄一與語金玉聲利泥棄唾委兀兀如頑雲驪珠兮固難償其價  
靈芝兮何以根其根真貌枯槁言樸略衲衣爛黑燒嶽痕憶昔十四五年前苦寒節禮師問師楞伽月此時師  
握玉麈尾報我却云非日月一敲粉碎狂性歇庭松無韻冷撼骨搔窗擦簷數枝雪邇來流浪于吳越一片閑  
雲空皎潔再來尋師已蟬蛻蒼蘊枝枯醴泉竭水檀香火遺影在甘露松枝月中折師去世有甘露降于庭松寶師往日真隱心

今日不能隨雙血

邊上作三一作首一本缺

山無綠兮水無清風既毒兮沙亦腥胡兒走馬疾飛鳥聯翩射落雲中聲

陣雲忽向沙中起探得胡兵過遼水堪嗟護塞征戍兒未戰已疑身是鬼

見說青塚穴中有白野狐時時出沙磧向東而號呼號呼復號呼畫師圖得無



送張拾遺赴施州司戶

道之大道古太古二字爲名爭莽鹵社稷安危在直言須歷堯塔搢諫鼓恭聞吾皇至聖深無比推席却几聽  
至理一言偶未合堯聰賈生須看湘江水君不見頃者百官排闥赴延英陽城不死存令名又不見仲尼遙奇  
司馬子珮玉垂紳合如此公平公平施之掾江上春風喜相見畏天之命復行行芙蓉爲衣勝絕續好音入耳  
應非久三峽聞猿莫迴首且啜千年羹醉巴酒

書倪氏屋壁三首

茶烹綠乳花暎簾撐沙苦筍銀纖纖窗中山色青翠粘主人於我情無厭  
白桑紅椹鶯咽咽麵揉玉塵餅挑雪將爲數日已一月主人於我特地切  
水嬌草媚掩山路睡榘鴛鴦如畫作春光靄靄忽已暮主人剛地不放去

續姚梁公座右銘

并序

愚嘗覽白太保所作續崔子玉座右銘一首其詞旨乃典乃文再懇再切實可警策未悟貽厥將來又見姚  
崇卞蘭張說李邕皆有斯文尤爲奧妙其于東島婉婉乃千古之鑒戒資腴矣愚竊愛其文惟恨世人不能  
行之十得其二一日抽毫遂作續白氏之續命曰續姚梁公座右銘一首雖文經理緯不逮於羣公而亦  
可書於屋壁云

善爲爾諸身行爲爾性命禍福必可轉莫愁言前定見人之得如己之得則美無不克見人之失如己之失是  
亨貞吉反此之徒天鬼必誅福先禍始好殺滅絕不得不止守謙寡慾善善惡惡不得不作無見貴熱諂走蹙  
蹙無輕賤微上下相依古聖著書矻矻孳孳忠孝信行越食逾衣生天地間未或非假身危彩虹景速奔馬胡  
不自彊將升玉堂胡爲自墜言虛行僞豔殃爾壽須戒酒腐爾腸須畏勵志須至撲滿必破非莫非於歸非過  
莫過於文過及物陰功子孫必封無恃文學是司奇薄患隨不忍害逐無足一此一彼諧宮合徵親仁下問立  
節求已惡木之陰匪陰盜泉之水匪水世孚草草能生幾幾直須如冰如玉種桃種李嫉人之惡酬恩報義忽  
已之慢成人之美毋擔虛譽無背至理恬和慈暢沖融終始天人之行盡此而已丁寧丁寧戴髮含齒

上盧少卿覓千文



荆山有美玉含華尚炳爛堪爲聖君璽堪爲聖君案草木潤不彫煙霞覆不散野人到山下仰視星辰畔倘或如粟黃保之上霄漢

謝盧少卿惠千文

廬山有石鏡高倚無塵垢晝景分煙蘿夜魄侵星斗苞含物象列搜照魚龍吼寄謝天地間毫端皆我有

大蜀皇帝壽春節進堯銘舜頌二首

堯銘

金冊昭昭列聖孤標仲尼有言巍巍帝堯承天眷命罔厥矜驕四德炎炎堦莫不周永乎於休垂衣飄飄吾皇則之小心翼翼秉陽亭毒不遑暇食土堦苔綠茅茨雪滴君旣天賦相亦天錫德翰金鏡以聖繼聖漢高將將太宗兵柄吾皇則之日新德盛朽索六馬罔墜厥命熙熙蓼蕭塊潤風調舞擊干羽囿入蓂莢旣玉其葉亦金其枝葉葉枝枝百工允釐享國如堯不疑不疑

舜頌

高高歷山有黍有粟皇皇大舜合堯玄德五典克從四門伊穆大道將行天下爲公臨下有赫選賢用能吾皇則之無斃無逸綏厥品彙光光得一千輻臨頂十在隨蹕大哉大同爲光爲龍吾皇則之聖謀隆隆納隍孜孜孜孜切切六宗是禋五瑞斯列排麟環鳳披香立雪四夷納賁九圍一作有截昔故世師降生竺乾壽春亦然萬年萬年

大蜀高祖潛龍日獻陳情偈頌

有叟有叟居岳之室忽振金湯下彼巉崿聞蜀風景地寧得一富人侯王旦爽摩詰龍角日角紫氣盤屈揭日月行符湯禹出天步孔艱橫流犯蹕穆穆蜀俗整整師律髯髮垂雪忠貞貫日四人蘇活萬里豐謐無雨不膏有露皆滴有叟有叟無實行實一瓶一衲旣朴且質幸蒙顧盼詞煖恩鬱軒鏡光中願如善吉

寄大願和尚

注內缺三字

道朗居太山達磨住熊耳手擎清涼月靈光溢天地盡騎金師子去世久已矣吾師隱廬岳外念全剗削擲孔



聖之日月相空王之橐籥曾升麟德殿譚無著賜衣三銖讓不著太平興國公與師詩云竟無唯思紅泉白石閣因隨

襄楷離京索時襄公出守歸陵與師同行邇來便止於匡霍瀑布千尋噴冷煙旃檀一枝翹瘦鶴峴首故人清信在千書萬書取

不諾襄公鏡裏陽羨使微人昔為門下人扣玄佩惠無邊垠自憐亦是師子子未逾三載能嘖呻江西三鏡一從散席

歸寧後溪寺更有誰相親青山古木入白浪赤松道士為東鄰焚香西望情何極不及曇詵淚空滴襄公弟子

江太守社中人還送郗超米千石昔經鑿送米入山與道安寶書遽掩修章句萬里空函亦何益終須一替辟蛇人未解融神出

空寂匡山神為遠公侍首 辟蛇人大師曾 書 不知何緣得相見惟冲融無相而會耳

上顧大夫

碧海漾仙洲驪珠外無寶一岳倚青冥羣山盡如草君侯聖朝瑞動只關玄造誰云倚天劍含霜在懷抱誰云

青雲險門前是平道洪氏亦何幸里巷清如掃至化無經綸至神無祝禱即應炳文柄孤平去浩浩即應調鼎

味比屋堪封保野人慕正化來自海邊島經傳髻裏珠詩學池中藻閉門十餘載庭杉共枯槁今朝投至鑿得

不傾肝腦斯文如未精歸山更探討

寒月送玄一本有士入天台

之子逍遙塵世薄格淡於雲語如鶴相見唯談海上山碧側青斜冷相沓芒鞋竹杖寒凍時玉霄忽去非有期

僮擔赤籠密雪裏世人一作無人留得之想入紅霞路深遠孤峰縱甯仙騰起星精聚觀泣海鬼月湧薄煙花點

水送君丁寧有深旨好尋佛窟遊銀地佛窟銀地 天台雲境也雪簷納僧皆正氣伊昔貞白先生同此意若得神聖之藥即莫

忘遠相寄

上杜使君

為魚須處海為木須在岳一登君子堂頓覺心空廓右聽青女鏡左聽宣尼鐸政術似蒲盧詩情出冲漠從來

苦清苦近更加澹薄訟庭何所有一隻兩隻鶴煙霞色旌旗禾黍香侵郭嚴霜與美雨皆從二天落蒼生苦澹

瘼如何盡消削聖君新雨露更作誰思渥即擬五色筆密勿金鑿角即同房杜手把乾坤橐籥休說卜圭峰開

門對林壑

送僧入馬頭山



馬頭寶峰秀寒寒空有叟有叟真隱其中無味醍醐亦非般若白趾碧目數百瀟灑苦竹大於杉白熊卧如馬  
金鍾撼壑布水噴瓦芙蓉堂開峰月入岳精踏雪立屋下伊余解攀緣已是非常者更有叟獨往來與我語情  
無剛彊氣透今古竹笠援補芒鞋藤乳北風倒人乾雪不聚滿頭霜雪湯雪去湯雪去無人及空望真氣江上立

上盧使君

第二十四句缺一字

夔龍在廟堂雖然有僉議蒼生得父母自是天之意鄱陽氣候正文物皆鮮媚金鏡有餘光春風少闕地膺門  
倚寒碧到者寧容易賓從皆鳳毛爪牙悉後臂樓臺千萬戶錦繡龍歌沸大惠蟲鳥全至嚴龍虎畏可憐召伯  
樹婆娑不勝翠詩搜日月華道嚙神仙味嘉樹白雀來祥煙甘露墜中川一帶香 開幽邃地逸少情有餘東  
山境不啻恭聞聖天子廊廟猶虛位應知黎庶心只恐徵書至

送題雅禪師

霜鋒斨石鳥雀聚帆凍陰颺吹不舉芬陀利香釋驂虎幡幢冒雪爭迎春光主芙蓉堂窄堆花乳手提金柁  
打金鼓天花娉婷下如雨後猊座上師子語苦却樂樂却苦盧至黃金忽如土

和楊使君遊赤松山

為郡三星無一事龔黃意外扳喬松日邊揚歷不爭路雲外苔蘚須留蹤溪月未落漏滴滴隼旟已入山重重  
捫蘿蓋輸山屐伴駐旆不見朝霞濃乳後劇點掛險樹露水翠腕生諸峰初平謝公道非遠默然物外心相逢  
石羊依稀斲瑤草桃花彷彿開仙宮終當歸補吾君衮好山好水那相容

送崔使君

第二

柳門柳門芳草芊綿日日日默然默然子牟戀關歸闕王梁下樓相別食實得地頗淹歲月今朝天子在上  
合雪必雪况絳之牧文行炳潔釋謂緣因久眠清塵王嘉迎安遠狎遺民媿彼二子厥或相似論文不文話道  
無滓士有貴逼勢不可過麟步規矩鳳翥昂拊峴首仁蹤項頻跋商雲乳麝香可撮望塵 連紫闥吾皇必

用整乾坤莫忘江頭白頭達

白頭達事見高僧傳

杜侯行

并序

愚自江東兵荒之後受杜氏兄弟深知往曾見陳陶與撫州蔡京使君雜言曰蔡氏行今亦擬之曰杜侯



行云耳

天目連天搏秀氣，崢嶸作起新城地。德門鍾秀光盛時，三虎八龍皆世瑞。項者天厖亂下鯨，翻海烽火崩騰照。行在江表唯傳君子營，劍衝牛斗疏真宰。金昆玉季輕三鼓，煮海懸魚臣節苦。鴈影參差入瑞煙，荆花爛爛開仙圃。我聞大中咸通真，令主相惟大杜兼小杜。但能致君活國濟生人，亦何必須踏金梯折桂樹。宣宗懿宗調舜琴，大杜小杜爲殷霖。出將入相，今功德深。生人受賜，今直至。今杜侯兄弟繼之後，璞玉渾金美騰口。常言一呼百萬何足云，終取封侯之印大如斗。恭聞吾皇似堯禹，搜索賢良皆面覩。杜侯杜侯君儻修，令德克有終。即必還爲大杜兼小杜人之戴，今天筆註國之福。今天固祚四海無波八表臣，如今而後君看取。

偶作五首

誰信心火多，多能焚大國。誰信鬢上絲，莖莖出蠶腹。嘗聞養蠶婦，未曉上桑樹。下樹畏蠶飢，兒啼亦不顧。一春膏血盡，豈止應王賦。如何酷吏酷，盡爲搜將去。蠶蛾爲蝶飛，僞葉空禡枝。寬校與恨機，一見一露衣。

機生機巧生，巧心鑊烘烘。日煎炒闔蜀，眉嚙遊海島。扶桑椹熟金烏飽，金烏飽飛復飛。四天下人眼眙眙。

孰云我輕薄，石頭如何喚作玉。孰云我是非，隨邪逐惡又爭得。古人終不事悠悠，一言道合死即休。豈不見大

鵬點翼，蓋十洲是何之物。鳴啾啾。

君子食即食，何必在珍華。小人食不食，縱食如泥沙。清歌且莫唱，妙舞亦休誇。爾非鳳，災麒麟肉焉能一掛於

齒牙。去來去來歸去來，紅泉正灑芙蓉霞。

君不見金陵風臺月榭煙霞光，如今五里十里野火燒茫茫。君不見西施綠珠顏色可傾國，樂極悲來留不得。

君不見漢王力盡得乾坤，如何秋雨灑廟門。銅臺老樹作精魅，金谷野狐多子孫。幾許繁華幾更改，唯有堯舜

周召丘軻似長在，坐看樓閣成丘墟。莫話桑田變成海，吾有清涼雪山雪。天上人間常皎潔，茫茫慾火欲燒人。

惆悵無因爲君說。

山中作

山爲水精宮，藉花無塵埃。吟狂岳似動，筆落天瓊瑤。伊余自樂道，不論才不才有時。鬼笑兩三聲，疑是大謝小

謝李白來。



聞前王使君在澤潞居

為善無近名竊名者得聲不如心誠哉是言也使君聖朝瑞乾符初刺婺德變人性靈筆變人風土煙霞與蟲  
鳥和氣將美兩千里與萬里各各來相附信哉有良吏玄識應百數東陽古者相傳有記云刺史滿一百即有好刺史來後有大  
寇至使君來正當一百人兩年後果有黃賊來公避地遠去  
人古人自古人今日又見民歌六七袴不幸大寇崩騰來孤城勢孤固難銅攀棘既不及旌旆衝風露大駕已  
西幸飄零何處去發人空悲哀對生祠泣沾莓苔忽聞暫寄河之北兵強四面無塵埃唯祝鑿與早歸來用此  
咎絲仲虺才使四野霧廓八紘鏡開皇天無親長與善鄰宜哉宜哉

將入匡山別芳書二公二首

一作將入  
廬山別僧

噴嵐堆黛塞寒碧窗前古雪如白石臨歧約我來不來若來須撥紅霞覓

紅豆樹一作花問滴紅雨戀師不得依師住世情世界愁殺人錦繡谷中歸舍去

送楊秀才

北山峨峨香拂拂翠漲青奔勢巉崒赤松君宅在其中紫金為墻珠作室玻璃門外仙徽睡幢節森森絳煙密  
水精簾捲桃花開文錦娉婷眾非一撫長離坎荅鼓花姑吹簫弄玉起舞三萬八千為半日海涸鼈枯等閑覩  
愛共安期暮苦識彭祖祖有時朝玉京紅雲擁金虎石橋亦是神仙住一作柱白鳳飛來又飛去五雲縹緲羽翼高  
世人仰望心空勞

別杜將軍

伊余本是胡為者採蕈鋤茶在窮野偶披蓑笠事空王餘力為文擬何謝少年心在青雲端知音滿地皆龍鸞  
遽逢天步艱難日深藏溪谷空長歎偶出重圍遇英哲留我江樓經歲月身限玉帳香滿衣夢歷金盆金華山  
最高處雨  
和雪東風來兮歌式微深雲道人召來歸燕辭大厦今將何為濛濛花雨今鶯飛飛一汀楊柳同依依

送夢上人歸京

伊余龍鍾歸海涯千山萬水情自怡夢公別我還上國江邊慘執行遲遲向我道雲中覓伴未得伴又示我數  
首新詩盡是詩只恐不如此若如此如此即須天子知蕭蕭金吹荆門口槐菊闌黃落葉走前程勝事未可涯  
但恐圭峰難入手蓮峰掌記韓拾遺鴈行雍穆世所稀二十年前即別離憑師一話吟朝飢



問岳禪師疾

世病如山岳世醫皆拱手道病如金鎖師遭鎖鎖否大塵為世病無為無事為道病如金鎖伊昔芙蓉頰談經似主涉蘇合畫氤氳天花似飛蝶覺樹垂實魔輩刺疾病也不問終不皺膝師常坐不卧也春光冉冉不上爾質東風浩浩謾入爾室云何斯人而有斯疾

上荆南府主三讓德政碑

明明赫赫中興主動納諸隍冠前古四海英雄盡戢兵皆如圪圪一作圪圪天金柱萬姓多論政與德請樹豐碑似山岳一從寇滅二十年琬琰雕鐫賜重疊荆州化風何卓異寡欲無為合天地雖立貞碑與眾殊字字皆是吾皇意君侯捧碑西拜泣臣且何人思游及鳳皇一作詔銜下雕龍文德味政虛爭敢立函封三奏心匍匐堅讓此碑聲蓋國我恐江淹五色筆作不立此碑之碑文不得

施萬病丸

我聞昔有海上翁鬚眉皎白塵土中葫蘆盛藥行如風病者與藥皆惺惚藥王藥上親兄弟救人急於已諸體玉毫調御偏讚揚金輪釋梵咸歸禮賢守運心亦相似不吝親親拘子子曾聞古德有深言由來大士皆如此

甘雨應祈

春雨偶愆期草木亦未覺君侯不違處退食或閉閣東海浪滔滔西江波漠漠得不願身為大虬金其角玉其甲一吸再噴雲平霧匝華暢九有清傾六合使不蘇者蘇不足者足情通上玄如膏綿綿有叟有叟鼓腹歌於道邊歌曰麥苗芄芄兮鶴鷓飛日出而作今日入歸如彼草木兮雨露肥古人三樂兮我樂多之天之成兮地之平兮柘系黃兮瓠葉青兮乳女啼兮蒸黍馨兮炙背捫虱兮復何經營兮

寄韓團練

真宰動洪鑪萬物皆消息唯有三珠樹不用東風力君子天廟器頭骨何巉削海內久聞名江西偶相識誰不有詩機麟龍不解織誰不有心地蘭茝不曾植多君二俱作獨立千仞壁話道出先天憑師動臻一作臻極青霄鴈行律紅露荆花滴偶然成遠別別後長相憶行至鄱陽郡又見謝安石留我遇殘冬身心苦恬寂江上春又至引頸山空積何日再相逢天香滿瑤席



春野作五首

閑步淺青平綠流水征車自逐誰家挾彈少年擬打紅衣啄木

山花雨打盡滿地如爛錦遠尋鷓鴣雛拾得一團草 大牛苦耕田乳犢望似泣萬事皆天意綠草頭戴我

斜陽射破冢髑髏半出地不知誰氏子猶自作意氣

牛兒小牛女少拋牛沙上鬪百草鋤龍老人又太老薄煙漠漠覆桑棗戴嵩醉後取次掃

深山逢老僧二首

衲衣線麓心似月自把短鋤耨拙青石溪邊踏葉行數片雲隨兩眉雪

山童貌頑名乞乞放火燒畬采崖蜜擔頭何物帶山香一籬白草一籬粟

道情偈

草木亦有性與我將不別我若似草木成道無時節世人不會道向道却嘆道傷嗟此輩人寶山不得寶

懷二三朝友

傷心復傷心流光似飛電有惠驪龍十斛珠不如一見君子面愁人復愁人滿眼皆埃塵有惠黃金一萬斤不

如一見於仁人我昔讀詩書如今盡拋也只記得田叔孟溫舒帝王滿口呼長者

偶作

君子稱一善馨香遍九垓小人妬一善處處生嫌猜口如暴死人鐵尺拘不開稂莠蝕田髓積陰成冬雷因知

咋舌人千古空悠哉

義士行

先生先生不可遇愛平不平看斗豎黃昏雨電空似驚別我不知何處去

觀懷素草書歌

張顛顛後顛非顛直至懷素之顛始是顛師不譚經不說禪筋力唯於草書朽一作顛狂却恐是神仙有神助今

人一作神莫及鐵石畫今墨須入金尊竹葉數斗餘半斜一作半傾山衲濕醉來把筆揮一作如虎粉壁素屏不問主亂

擊亂抹無規矩羅剎石上坐伍子胥崩騰兮不可止天機暗轉鋒銚裏閃電光邊霹



震飛古栢身中澤一作早龍死駭人心今日賦音曉音頓人足今神辟易乍如沙場大戰一作戰後斷槍檄箭一作斷皆一作

狼籍又似深山朽一作怪石上古病松枝掛鐵錫月兔筆天竈墨斜鑿黃金側判玉珊瑚枝長大束一作如東天馬驕獒

不可勒東却西南又北倒又一作還起斷復續忽如鄂公喝一作捉住單雄信秦王肩一作拈上剔一作拈著棗木槩懷素師懷素師

若不是星辰降瑞即必是河岳孕靈固宜須冷一作冷笑逸少爭得不心醉伯英天台古杉一千尺崖崩削一作岸折何

崢嶸或細微仙衣半折一作縫金線垂或妍媚桃花半紅公子醉我恐山為墨兮磨海水天與筆兮書大地一作海折何

乃能畧展狂僧意常恨與師不相識一見此書空歎息伊昔張渭一作謂任華葉季良數子贈歌豈虛飾所不足

者渾未曾道著其神力石橋被燒燒一作却良玉土不一作不蝕錐畫沙兮印印泥世人世人爭得測知師雄名在世間

明月清風有何極

送盧舍人三首

一曰勸君不用登峴首山讀羊祜碑男兒事業須自奇此碑山頭如日月日照人人不知人不知青山白雲

徒爾為

二曰勸君登商山不用覓商山皓雲深雪深驟馬倒我願終南太華變為金吾后見之不為寶我願九州四海

紙幅幅與君為諫草使躡高踐躡蓬軒見皞日環五色是物得老如此即商山皓商山皓君不用討他他必來

相討

三曰君不見釋梵諸天壽億垓天上人間去復來君又不見紫金為輪一千幅寶洲 四皆臣伏輪王釋梵作

何因祇是弘隆大乘福自古皇王與賢哲頂敬心師刻金玉報通三世釋迦言莫將梁武為題目君不見近代

韋襄蔣與蕭韋處厚相國出入廟堂禮佛如朝見君父表休相國師事空王信敬無比出將入相偏重門拜相文房書府師百僚代天理物

映千古布髮掩泥非一朝大哉釋梵輪王璞已矣何人繼先覺行行珍重寄斯言斯言不是尋常曲缺一

宿深村

行行一宿深村裏雞犬豐年鬧如市黃昏見客合家喜月下取魚戽共水

黃鸞

一種為春禽花中開羽翼如何此鳥身便是黃金色黃金色若逢竹實終不食



送越將歸會稽

面如玉盤身八尺燕語清猗戰袍窄古嶽龍腥一匣霜江上相逢雙眼碧冉冉春光方婉婉黯然別我歸稽嶽  
他年必帥郎鄂兒與我殺輕班定遠

別仙客

巨鼇頭縮翻仙翠蟠桃爛落珊瑚地浪濺霓旌濕鵬翅畧別千年太容易

寒江上望

荒岸燒未死白雲癡不動極目無人行浪打取魚籠

讀唐史

我愛李景伯內宴執良規君臣道昭彰天顏終熙怡大箴怕清風糠粃繚亂飛洪鑪烹五金黃金終自奇大哉  
為忠臣捨此何所之

樵叟

樵父貌飢帶塵土一作風自言一生苦寒暑一作暑擔頭擔箇赤瓷甕斜陽獨立一作入濛籠塢

春山行

重疊太古色濛濛花雨時好峰一作山行恐盡流水語相隨黑壤生紅黍一作木黃猿領白兒因思石橋月曾與故一作道人期

送諫官南遷

危行危言者從天落海涯如斯為遠客始是好男兒瘴雜交州雨犀指馬援碑不知千萬里誰復識辛毗

懷香爐峰道人

常思峰頂叟石窟土為牀日日先見日煙霞多異香冥心同槁木掃雪帶微陽終必相尋去斯人不可忘

觀李翰林真二首

日角浮紫氣凜然塵外清雖稱李太白知是那星精御宴千鍾飲蕃書一筆成宜哉杜工部不錯道騎鯨  
誰氏子丹青毫端曲有靈屹如山忽墮爽似酒初醒天馬難攏勒仙房久閉扃若非如此輩何以傲彤庭



晚泊湘江作一作晚泊湘江懷古  
煙浪濤一作濤秋色高吟似有一一作鄰一輪湘渚月萬一作古獨醒人岸濕穿花遠風香傳廟頰祇應諛佞者到此不傷神

淮上逢故人

故園離亂後十載始逢君長恨南熏奏尋常只自聞荒窗秋見岳赤地夜生雲莫歎謀身晚中興正用文

讀杜工部集二首

造化拾無遺唯應杜甫詩豈非玄域一作奪得古人旗日月精華薄山川氣槩卑古今吟不盡惆悵不同時  
甫也道亦喪孤身出蜀城彩毫終不擬白雪更能輕命薄相如命名齊李白名不知未陽令何以葬先生

題簡禪師院

機忘室亦空靜與沃洲同唯有半庭竹能生竟日風思山海月上出定印香終繼後傳衣者還須立雪中

讀劉得仁賈島集二首

二公俱作者其柰亦迂儒且有諸峰在何將一第吁句還如菡萏誰復贈襜褕想得重泉下依前與衆殊  
役思曾衝尹多言阻國親桂枝何所直陋巷不勝貧馬病唯一作湯雪門荒劣有人伊余吟亦苦為爾一省頰

天台一本無老僧

獨住無人處松龕嶽色侵僧中九十臘雲外一生心白髮垂不剃青眸笑轉深猶能指孤月為我暫開襟

經費隱君舊宅

巉巖玉九株秀濕掩蒼梧祥瑞久不出羲軒消得無雨和高瀑濁燒燿大楮枯到此思歸去迢迢隔五湖

秋末懷舊山

昔住匡廬北無人知姓名侵雲收穀粟引蟻上柑橙寒雨雪兼落枯林虎獨行誰能將白髮共向此中生

春過鄱陽湖

百慮片帆下風波極目看吳山兼鳥沒楚色入衣寒過此愁人處始知行路難夕陽沙島上回首一長歎

寄僧野和尚

鳥一作鳥外更誰親諸峰即四鄰白頭寒枕石青衲爛無塵椽粟堆行徑猿猴遠定身儻然重結社願作掃壇人



寄馮使君

端居碧雲暮好鳥啼紅芳滿郭桃李熟捲簾風雨香清吟繡段句默念芙蓉章未得歸山去頻升謝守堂

寄紫閣隱者

積翠藏一叟常思未得遊不知在巖下爲復在峰頭苔上枯藤笕泉淋破石樓伊余更何事不學此翁休

寄天台道友

大是清虛地高吟到日晡水聲金磬亂雲片玉盤粗仙有遺蹤在人還得意無石碑文不直壁畫色多枯冷立  
千年鶴閑燒六一爐松枝垂似物山勢秀難圖紫府程非遠清溪徑不迂馨香柏上露皎潔水中珠賢聖無他  
術圓融只在吾寄言桐柏子珍重保之乎

旅中懷孫路

暮塵微雨收蟬急楚鄉秋一片月出海幾家人上樓砌香殘果落汀草宿煙浮唯有知音者相思歌白頭

貽世

至理不誤物悠悠自不明黃金燒欲盡白髮火邊生苦惑神仙謔難收日月精捕風兼繫影信矣不須爭

覽李秀才卷

香沐整山衣開君一軸詩吟當秋景苦味出雪林遲經濟幾人到工夫兩鬢知因嗟和氏淚不是等閑垂

懷方干張爲

冥搜入仙窟半夜水堂前吾道祇如此古人多亦然螢沉荒塢霧月苦綠梧蟬因憶垂綸者滄浪何處邊

四皓圖

何人圖四皓如語話嘮嘮雙鬢雪相似是誰年最高溪苔連豹褥仙酒汗雲袍想得忘秦日伊余亦合逃

懷白閣道侶

寒思白閣層石屋兩三僧斜雪掃不盡飢後喚得應香然一字火磬過數潭冰終必相尋去孤懷久不勝

讀孟郊集

東野子何之詩人始見詩清冽霜雪髓吟動鬼神司舉世言多婿無人師此師因知吾道後冷淡亦如斯



懷四明亮公

孤峰含紫煙師住此安禪不下便一作下如斯太可憐坐侵天井黑吟久海霞焉豈覺塵埃裏干戈已十年

秋過錢塘江

巨浸東隅極山吞大野平因知吳相恨不盡海濤聲黑氣騰蛟窟秋雲入戰城遊人千萬里過此白髮生

上俞許二判官

近拋蓑笠者急善遇休明未省親宗伯焉能識正聲病容經夏在岳夢入秋并無限林中意今逢許郭傾

懷劉得仁

詩名動帝畿身謝亦因詩白日只如哭皇天得不知旅墳孤躑岳羸僕泣如兒多少求名者聞之淚盡垂

歸故林後寄二三知己

昨別楚江邊遠巡早數年詩雖清到後人更瘦於前岸翠連喬嶽汀沙入壤一作壤田何時重一見談笑有茶煙

春寄西山陳陶

搔首復搔首孤懷草萋萋春光已滿目君在西山西澗水成文去庭柯擎翠低所思不可見黃鳥花中啼

秋末江行

四顧木落盡扁舟增所思雲衝遠燒出帆轉大荒遲天際霜雪作水邊蒿艾衰斷後不堪聽一聽亦同悲

送人歸新羅

昨夜西風起送君歸故鄉積愁窮地角見日上扶桑蜃氣生初霽潮痕匝亂荒從茲頭各白魂夢一相望

思匡山賈匡

一作寒夜思  
匡山賈生山兄詩癖甚寒夜更何為覓句唯一作如頑坐嚴霜打不知石膏黏木屐一作履崖蜜一作落冰池近見禪僧說生涯勝往時

偶作

十載獨高扉唯為二雅詩道孤終不雜頭白更何疑句冷杉松與霜嚴鼓角知修心對閑鏡明月印秋池

贈方于

盛名與高隱合近謝敷村弟子已得桂先生猶灌園垂綸侵海介拾句歷雲根白日昇天路如君別有門弟子謂李廣也



漁父

一葉一竿竹箬鬚雪欲零陸應無祖業香必是伊  
一竹醒兒亦名魚鷓歌稱我洞庭回頭深自媿舊業近滄冥

題友人山居

卜居鄰塢寺魂夢又相關鶴本如雲白君初似我  
閑月明僧渡水木落火連山從此天台約來茲未得還

寄宋使君

寺倚烏龍腹窗中見碧稜空廊人畫祖古殿鶴窺燈  
風吼深松雪爐寒一鼎冰唯應謝內史知此道心澄

懷武夷紅石子二首

常思紅石子獨自住山椒窗外猩猩語爐中妣妣嬌  
乳香諸洞滴地秀衆峰朝曾見奇人說煙霞恨太遙

弋者終何慕高吟坐綠螯燒侵薑芋窖僧與水雲袍  
竹鞘奮刀缺松枝獵箭牢何時一相見清話擘蟠桃

送人征蠻

七縱七擒處君行事可攀亦知磨一劍不獨定諸蠻  
樹盡低銅柱潮常沸火山名須麟閣上好去及瓜還

懷周朴張為

二子無消息多應各自耕巴江思杜甫漳水憶劉楨  
白髮應全白生涯作麼生寄書多不達空念重行行

寄令狐郎中

雨打繁暑盡放懷步微涼綠苔狂似人入我白玉堂  
壑鳥眠堪畫庭檉夜益香唯應藥宮子時到虎溪傍

鄱陽道中作

鄱陽古岸邊無一樹無蟬路轉他山大砧驅鄉思偏  
湖平帆盡落天淡月初圓何事堯雲下干戈滿許田

歸故林別知己

別離無古今柳色向人深萬里長江水平生不印心  
遠書容北雁贈別謝南金媿勉青雲志余懷非陸沈

送僧遊天台

囊空心亦空城郭去騰騰眼作麼是眼僧誰識此僧  
歇隈紅樹久笑看白雲崩已有天台約深秋必共登

詠竹根瓊子



出處慙林藪才微幸一陽不緣懷片善豈得近馨香節亦因人淨聲從擲地彰但令筋力在永願報時昌

硯瓦

淺薄雖頑朴其如近筆端低心蒙潤久入匣更身安應念研磨苦無為瓦礫看儻然仁不棄還可比琅玕

水壺子

良匠曾陶瑩多居筆硯中一從親几案常恐近兒童卓立澄心久提攜注意通不應嫌器小還有濟人功

筆

莫訝書紳苦功成在一毫自從蒙管錄便覺用心勞手點時難棄身閑架亦高何妨成五色永願助風騷

碁

碁信無聲樂偏宜境寂寥著高圖暗合勢王氣彌驕人事掀天盡光陰動地銷因知韋氏論不獨為吳朝

夜對雪作寄友生

皓彩中宵合開門失所蹤一作從何年今夜意共子在一作老孤峰氣射燈花落光侵壁罅濃唯君心似我吟到五更鐘

題惠琮律師院

苦節兼青目公卿話有餘唯傳黃葉喻還似白泉居後撥孤雲破鍾撞象木疎社壇蹤跡在重結復何如

寄清泠山道人

常憶清泠子深雲種早禾萬緣雖不涉一句子如何蹤跡諸峰匝衣裳老虱多江頭無事也終必到煙蘿

秋盡途中作

行行芳草歇潭島葉紛紛山色路無盡砧聲客強聞殘陽曜極野黑水浸空墳那得無鄉思前程入楚雲

秋居寄王相公三首

禪林蟬一首句缺落地燥可生苔好句慵收拾清風作麼來餅唯餐喜悅社已得宗雷還似山中日柴門更不開一首句缺

松聲高似瀑藥熟色如花誰道全無病時猶不在家逐六塵名不在家也山童春菽粉圍叟送銀瓜誰訪孫弘閣談玄到日斜

氣與非常合常人爭得知直須窮到底始是出家兒關雀街紅粟鄰僧背古碑祇應王與謝時有沃州期

讀玄宗幸蜀記



宋璟姚崇死中庸遂變移如何遊萬里祇爲一胡兒泣漏乾坤色飄零日月旗火從龍闕起淚向馬嵬垂始憶  
張丞相全師郭子儀百官皆剽劫九廟盡崩墮鹿撲銀輪一作暗雷奔棧閣危倖臣方賜死野老不勝悲時有李思遠  
黃江月十上  
及雷飄淪日行宮寂寞時人心雖未厭天意亦難知聖兩歸丹禁承乾動四夷因知納諫諍始是太平基

聞徵四處士

一詔羣公起移山四海聞因知丈夫事須佐聖明君白酒全傾獲蒲輪半載雲從茲居諫署筆硯幾人焚

送友人下第遊邊

失意窮邊去孤城值晚春黑山霞不赤白日鬼隨人角咽胡風緊沙昏曠月新明時至公在迴首莫因循

寄匡山紀公

錦繡谷中人相思入夢頻寄言無別事琢句似終身書卷須求旨鬚根易得銀斯言如不惑千里亦相親

聞無相道人順世五首

一事不經營孤峰長老情惟餐椽子餅愛說道君兄池藕香狸掘山神白日行又聞行脚也何處化羣生  
自昔尋師日顛峰絕頂頭雖聞不相似特地使人愁庭樹雪摧殘上有白獼猴大哉法中龍去去不可留  
常思將道者高論地爐傍迂談無世味夜深山木僵下山遭離亂多病惟深藏一別三十年煙水空茫茫  
石霜既順世吾師亦不住杉桂有猩猩糠粃無句句土肥多孟蘇道老如瓔孺莫比優曇花斯人更難遇  
百千萬億偈共他勿交涉所以那老人密傳與迦葉吾師得此法不論劫不劫去矣不可留無踪若爲躡

苦熱

松桂枝一作不動陽鳥飛半天稻麻須一作煩結實沙石欲生煙毒氣仍干扇高枝不立蟬舊山多積一作雪歸去是

何年

鄂渚贈祥公

寂寥堆積者自爲是高僧客遠何人識吟多冷病增松煙青透壁雪氣細吹燈猶賴師於我依依非面朋

懷武昌樓一二首



常憶能吟一房連古帝墟無端多忤物唯我獨知渠病愈囊空後神清木落初祇因烽火起書札自茲疎  
清風江上月霜灑月中砧得句先呈佛無人知此心師得句云寂寥從鬼出蒼翠到門深惟有雙峰寺時時獨去尋

寒食郊外

寒食將吾族相隨過石溪塚花沾酒落林鳥學人啼白水穿蕪疾新霞出霧低不堪迴首望家在赤松西

送道士歸天台

道高留不住道去更何云舉世皆趨世如君始愛君徑侵銀地滑瀑到石城聞它日如相憶金桃一為分

經孟浩然鹿門舊居二首

孟子終焉處遊人得得過橋深黃狝小地煥白雲多孔聖嗟大謬立宗爭柰何空餘峴山色千古共嗟峨  
花落谷鶯啼精靈安在哉青山不可問永日獨裴回塚穴應藏虎荒碑祇見苔伊余亦惆悵昨日郢城迴

春送禪師歸閩中

春色滿三湘送師還故鄉穿霞逢黑鷓乞食得紅薑大化宗門闢孤禪海樹涼儻為新句偈寄我亦何妨

途中逢周朴

東西南北路相遇共興哀世濁一作獨無知己子從何處來菊衰芳草在程遠宿煙開儻遇中興主還應不用媒

避寇山中作

山翠碧嵯峨琴牽去者多淺深俱得地好惡未知他有草皆為戶無人不荷戈相逢空悵望更有好時麼

避寇上唐臺山

蒼黃緣鳥道峰脊見樓臺檀桂香皆滴煙霞濕不開僧高着半白山老石多摧莫問塵中事如今正可哀

題嶧桐一作律師院

律中麟角者高談出塵埃芳草不曾觸幾生如此來壑風吹磬斷杉露滴花開如結林中社伊余亦願陪

上馮使君渡水僧障子

跣足柱巴藤潺湲渡幾曾盡權無著印不是等閑僧熊耳應初到牛頭始去登畫來偏覺好將寄柳吳興

秋夜翫月懷玉霄道士



光異磨碧出輪非雕斲成今宵剛道別舉世勿人爭征婦砧添怨詩人哭到明惟宜華頂叟笙磬有餘聲

上杭州令狐使君

顏冉德無鄰分憂浙水濱愛山成大癖求瘼似諸身視事奸回盡登樓海岳春野人如有幸應得見陶鈞

懷諸葛珏

諸葛子作者詩曾我細看出山因覓孟踏雪去尋韓過孟郊韓愈于洛下謬獨哭不錯諸葛云思牽天岫起吟索刻雲間常流飲實難諸葛曾為僧名然有詩云到處

自鑿井不能飲常流知音知便了歸去舊江干

羸馬與羸童微吟冒北風店孤僧共歇日落思無窮囊草無非刺魏人那識公投物不遇而去鶯花五陵道去去與誰同

懷錢唐羅隱章魯封

二子依公子雞鳴狗盜徒青雲十上苦白髮一莖無風澀潮聲惡天寒角韻孤別離千萬里何以慰榮枯

送沈侍郎

從知無遠近木落去闌城地入無諸俗冠義甲乙精山多高興亂江直好風生儉府清無事唯應薦禰衡

題宿禪師院

身閑心亦然如此已多年語淡不著物茶香別有泉古衣和蘚袖新偈幾人傳時說秋歸夢孤峰在海邊

秋晚泊石頭驛有寄

蕭索漳江北何人愁寂寥北風人獨立南國信空遙燒塢新雲白漁家衆木凋所思不可見行雁在青霄

別盧使君

杜宇聲聲急行行楚水濱道無禪政化行處傲孤雲幸到膺門下頻蒙俸粟分詩雖曾引玉碁數中埋軍山好

還尋去思深豈易云扇風千里泰車兩九重聞晴霧和花氣危檣鼓浪文終期陶鑄日再見信陵君

秋夜吟

如愚復愛詩木落即眠遲思苦香消盡更深筆尚隨飢童春赤黍繁露灑烏裨看却龍鍾也歸山是底時

桐江閑居作十二首

木落兩脩脩桐江古岸頭擬歸仙掌去剛被謝公留猛燒侵茶塢殘霞照角樓坐來還有意流水面前流



香刹通真觀樓臺倚郡城陰森古樹氣粗淡老僧情壁畫連山潤仙鐘扣月清何須結西社大道本無生  
靜室焚檀印深爐燒鐵瓶茶和阿魏煖火種柏根馨數隻飛來鶴成堆讀了經何妨似支遁騎馬入青冥  
不問賡桑子唯師妙吉祥等閑眠片石不覺到斜陽獨自收楮葉教童探柏瓢王孫莫指笑淡泊味還長  
詩琢冰成句多將大道論人誰知此意日日祇關門乳鼠穿荒壁溪龜上淨盆因知無事貴言外更無言  
紅黍飯溪苔清吟茗數杯祇應唯道在一作無意俟時來樹壘藏仙洞山蒸足爆雷從他嫌復笑門更不曾開

蟬急野蕭蕭山中信屢招樹香烹菌朮詩

瓊瑤諸境教人認荒榛引燒燒吾皇禮金骨誰

美南朝第四句八句缺三字

露滴滴蘅茅秋成爽氣交霜禪如蜜裹

似鹽苞浮蘚侵蛩穴微陽落鶴巢還如山裏日門更絕人敲

第四句缺二字

灑鳥毛衣別頻來似愛吟蕭條秋病後斑駁綠苔深珠翠籠金像風泉灑玉琴孰知吾所適終不是心心  
芙蓉峰裏居關閑復何如白覆兼花鹿多年不見渠紅泉香滴瀝丹桂冷扶疎唯有西溪叟時時到弊廬  
憶在山中日爲僧鬢欲衰一燈常到曉十載不離師水汲冰溪滑鐘撞雪閣危從來多自省不學擬何爲  
囊非撲滿器門更絕人過土井連岡冷風簾迸葉多村童頑似鐵山菜硬如莎唯有前山色窗中無柰何

寄馮使君

山風與霜氣浩浩滿松枝永日燒杉子無人共此時爲文攀諷諫得道在毫釐唯有桐江守常憐志不卑

經棲白舊院二首

竺卿何處去觸目盡淒涼不見中秋月空餘一炷香殘花飄暮雨枯葉蓋啼螿誰禮新墳塔蕭條渭水傍  
國寶還亡一時多李德林故人卿相泣承製渥恩深舊葉誰收得空堂影似吟裴回不能去寒日下西岑

贈李祐道人一作贈道士

關昔復埃塵難親復易親皆疑有仙術問著却愁人祇是耽浮蟻曾云見泣麟相逢先合手渾似有前因

贈景和尚院

藏經看幾徧看有數條霜萬境心都泯深冬日亦長窗虛花木氣袖挂水雲鄉時說秋歸夢峰頭雪滿牀

上宋使君

折桂文如錦分憂力若春位高空倚命詩妙古無人有感禾爭熟無私吏盡貪野人如有幸應得見陶鈞



離亂後寄九峰和尚二首

亂後知深隱，蒼應近石樓。異香因雪歇，仙果落池浮。詩老全拋格，心空未到頭。還應嫌笑我，世路獨悠悠。蕭灑復蕭灑，松根獨據梧。瀑冰吟次折，遠燒坐來無。老猥寒披袖，孤雲靜入厨。不知知我否，已到不區區。

送黃賓于赴舉

第三句第七句各缺一字

冬暮兩霏霏，行人喜可稀。二階夜雪亞，聖在春闈馬。疾頑童遠山，荒凍葉飛。師無一事應，見麗龜歸。

題靈溪暢公墅

境清僧格冷，新斲古林開。舊隱還如此，令人來又來。嵐飛黏似霧，茶好碧於苔。但使心清淨，從渠歲月催。

送高九經赴舉

回也曾言志明君，則事之中興。今若此須去，更何疑志列秋霜。好忠言劇諫奇，志列忠言皆舊人也陸機遊洛日文舉，為銜

時虎跡商山雪，雲痕岳廟碑。夫一作憑君將潦倒，一說向深知。

東西二林寺流水

水爾何如此，區區矻矻流。牆牆邊瀝瀝，砌砌下啾啾。味不早於乳，聲常占得秋。崩騰成大瀑，落托出深溝。遠歷神仙窟，高淋竹樹頭。數家春碓磴，幾處浴猿猴。共月穿峰罅，喧僧睡石樓。派通天宇，一作井潤雷入楚江。浮為潤，知何極。無邊始自由，好歸江海裏。長負濟川舟。

送王貞白重試東歸

心苦酬心了，東歸謝所知。可憐重試者，如折兩三枝。兩毒逢花少，山多愛馬遲。此行三可羨，正值倒戈時。

早秋即事寄馮使君

金脈火初微，開門竹杖隨。此身全是病，今日更嗔誰。落葉崢嶸處，諸峰爽拔時。唯思棠樹下，高論入圓伊。

贈景和尚院

貌古着如雪，看經二十霜。尋常對詩客，祇勸療心瘡。炭火邕湖滢，山晴紫竹涼。怡然無一事，流水自湯湯。

寄西山胡汾

待價欲要君，山前獨灌園。雖然不識面，要且已消魂。鹿睡紅霞影，泉淋白石門。伊余心更苦，何日共深論。



題師穎和尚院

師院清無敵師心智不知臘高眼細閑甚白雲早煮茗然楓耕泥牆札祖碑愛師終不及謾住許多時

遊雲頂山晚望

雲頂聊一望山靈草木奇黔南在何處堪笑復堪悲菊歌香未歇露繁蟬不飢明朝又西去錦水與峨眉

劉相公見訪

千騎擁朱輪香塵豈是塵如何補袞服來看衲衣人莊叟因先覺空王有宿因對花無俗態愛竹見天真歌枕松窗迴題牆道意新戒師慙匪什都講更勝詢桃熟多紅壘茶香有碧筋高宗多不寐終是夢中人

寄赤松舒道士二首

不見高人久空令鄙悵多遙思青嶂下無那白雲何子愛寒山子歌惟樂道歌會應陪太守一日到煙蘿余亦如君也詩魔不敢魔一餐兼午睡萬事不如他兩陣衝溪月蛛絲罥砌莎近知山果熟還擬寄來麼

鄂渚逢楊贊禹

流浪兵荒苦相思歲月闌理惟通至道人或謂無端燒猛湖煙赤窗空雪月寒知音不可見始為一吟看

別性空禪師

積翠迸一瀑紅霞碧霧開方尋此境去莫問幾時迴盪漿入檐石思詩聞早雷唯師心似我欲近不然灰

送胡處士

不名兼不利相遇海西濱白字未干髮清時錯愛雲頭巾多酒氣竹杖有苔文久積希顏意林中又送君

寄瀾公二首

小一頭應白孤高住歛城不知安樂否何以近無生師常供養十六羅漢羅漢梵語此云無生燒逼鴻行側風乾雪朕清途中逢此信珍重未精誠

荒亂拋深隱飄零遠寓居片雲無定所得力是逢渠沈洞山通人云吾生自往處處得逢渠瀑瀟羣公社江崩古帝墟終期再相見招

手復何如

寄樓一上人



花塹接滄洲陰雲閑楚丘雨聲雖到夜吟味不如秋古屋藏花鴿荒園聚亂流無機心便是何用話歸休

送僧之湖南

湘水萬餘里師遊芳草生登山乞食後無伴入雲行宿雨和花落春牛擁霧耕不知今夜月何處聽猿聲

秋末寄張侍郎

靜坐一作處黔城北離仁半歲彊霧中紅黍熟燒後白雲香多病如何好無心去始長寂寥還得句溪上寄三張

古塞曲三首

單于烽火動都護去天涯別賜黃金甲親臨白玉除一作塞垣須靜謐師旅審安危定遠條支寵如今勝古時  
方見將軍貴分明帶冕旒聖恩如遠被狂虜不難收臣節唯期死功勳敢望侯終辭脩里第從此出皇州  
百萬精兵動參差便渡遼如何好白日亦照此天驕遠樹深疑賊驚蓬迴似鷗凱歌何日唱磧路共天遙

古塞下曲七首

下營依遁甲分帥把河隍地使人心惡風吹旗燄荒搜山得一作探卒放火獵黃羊唯有南飛雁聲聲斷客腸  
歸去是何年山連邏迤川蒼黃曾戰地空濶養鵬天旗插蒸沙堡槍擔卓槩泉蕭條寒日落號令徹窮邊  
虜寇日相持如龍馬不肥突圍金甲破越賊鐵槍飛漢月堂堂上胡雲慘慘微黃河冰已合猶未送征衣  
南北惟堪恨東西實可嗟常飛侵夏雪何處有人家風刮陰山薄河推大岸斜祇應寒夜夢時見故園花  
不是將軍勇胡兵豈易當雨曾淋火陣箭又中金瘡鐵嶺全無土豺羣亦有狼因思無戰日天子是陶唐  
榆葉飄蕭盡關防烽寨重寒來知馬疾戰後覺人兇燒逐飛蓬死沙生毒霧濃誰能奏明主功業已堪封  
萬戰千征地蒼茫古塞門陰兵爲客祟惡酒發刀痕風落崑崙石河崩首宿根將軍更移帳日日近西蕃

古塞上曲七首

幽并兒百萬百戰未曾輸蕃界已深入將軍仍遠圖月明風拔帳磧暗鬼騎狐但有東歸日甘從筋力枯  
中軍殺白馬白日祭蒼蒼號變旗幡亂一作沙乾草木黃朔雲含凍雨枯骨放妖光故國今何處參差近鬼方  
白雁兼羌笛幾年垂淚聽陰風吹殺氣永日在青冥遠戍秋添將邊烽夜雜星嫖姚頭半白猶自看兵經  
久一作大雨始無塵邊聲四散聞浸河荒寨柱吹角白頭軍戰一作牛馬斃羶草烏鴛識陣雲征人心力盡枯骨更遭焚



帳幕侵奚界憑陵未可涯擒生行別路尋箭向平沙赤落蒲桃葉香微甘草花不堪登隴望白日又西斜  
地角天涯外人號鬼哭邊大河流敗卒寒日下蒼煙殺氣諸蕃動軍書一箭傳將軍莫惆悵高處是燕然  
山接胡奴水河連勃勃城數州今已伏此命豈堪輕磧吼旋頭落風乾刁斗清因嗟李陵苦祇得沒蕃名

古出塞曲三首

掃盡狂胡迹迴頭一作戈望故關相逢惟死關豈易得生還縱宴參胡樂收兵過雪山不封十萬戶此事亦應閑  
玉帳將軍意殷勤把酒論功高寧在我陣沒與招魂塞色干戈束軍容喜氣屯男兒今始是識出玉關門  
回首隴山頭連天草木秋聖君應入夢半路遣封侯水不擔陰雪柴令倒成樓歸來麟閣上春色滿皇州

聞赤松舒道士下世

東陽未亂前相別

地變賢人喪瘡痍不可觀一聞消息苦千種破除難陰隲那虛擲深山近始安玄關評兔角玉器琢雞冠傲野  
高難狎融怡美不殫冀迎新渥澤時太守方錄道集奏聞欲出遽逐逝波瀾蛟殼埋金隧飛精駕錦鸞傾摧千仞壁枯歌一株蘭  
一作難仙廟詩雖繼苔牆篆必艱師善大小篆嘗有詩題赤松子廟煙霞成片黯松桂著行乾影柱溪流咽堂高隙月寒寂寥遺藥犬縲  
緲想瓊竿伊昔相尋遠留連幾盡歡論詩花作席炙菌葉為盤彭伉心相似承禎趣一般琴彈溪月側碁次砌  
雲殘儻忽成千古飄零見百端荆襄春浩浩吳越浪漫漫已矣紅霞子空留白石壇無弦亦須絕回首一長歎

贈抱麻劉舍人

郡政今良吏門風古縉紳萬年唐社稷一箇哭麻人憤烈身先死數敷氣益貞一作真天乎資大寶泰矣見忠臣得  
罪鍾多故投荒豈是迤玉寒方重澀松古更青斂鵬鷗寧唯白龍多豈止荀道孤梳有雪恩重淚盈巾喻蜀須  
憑草成周必仗仁三峰宵旰切萬里渥恩新賦鵬言無累依劉德有鄰風期仁祖帽鼠訶史雲塵禪叟知何幸  
玄談有宿因雙溪逢陸海東陽見故浙西侍郎荆渚遇平津江陵見吏部相公落日愁聞笛何人為吐茵生徒希匠化寰海仰經綸疾  
愈蟬聲老時公在荊州開居夏疾方可年豐雨滴頻劉虬師弟子時喜一相親

夜寒寄盧給事二首

刻羽流商否霜風動地吹邇來唯自惜知合是誰知  
塹雪消難盡鄰僧睡太奇知音不可得始為一吟之



心苦味不苦世衰吾道微清如吞雪電誰把比珠璣作者相收拾常人任是非舊居滄海上歸去即應歸

送葉蒙赴舉

年年屈復屈惆悵曲江濱自古身榮者多非年少時空囊投刺遠大雪入關遲來歲還公道平人不用疑

聞王慥常侍卒三首

世亂君巡狩清賢又告亡星辰皆有角日月略無光金柱連天折瑤階被賊荒令人轉惆悵無路問蒼蒼

宗社運微衰山摧甘井枯不知千載後更有此人無政入龔黃甲詩輕沈宋徒受恩酬未得不覺祇長吁

儻在扶天步重興古國風還如齊晏子再見狄梁公棠樹梅溪北公為婺州大理梅溪發之亭名佳城舜廟東誰修循吏傳對此莫

息息

秋晚野步

藤屨兼閩竹吟行一水傍樹涼蟬不少溪斷路多荒燒岳陰風起田家濁酒香登高吟更苦微月出蒼茫

聞大願和尚順世三首

王室今如燬仍聞喪我師古容圖得否內院去無疑大師行高德廣必生彌勒內院岳鬼月中哭松龕雪次隳直須文五色始可立

高碑

鄴衛松杉外芝蘭季孟間盡希重詔出祇待六龍還不疾成千古令焚動四山感恩終有淚遙寄水潺潺

師稟盡名卿孤峰老稱情若遊三點外爭把七賢平苦霧埋空室啼猿有咽聲今朝益惆悵曾沐下牀迎吳常念法師

師見即下牀迎云吾不取以眾人相待也

聞葉蒙及第

憶昨送君詩平人不用疑吾徒若不得天道即應私塵土茫茫曉麟龍草草騎相思不可見又是落花時

送僧之靈夏

舊識為邊帥師遊勝事兼連天唯白草野餅有紅鹽蕃近風多教河渾磧半淹因知心似月處處有人瞻

書無相道人卷

造化太茫茫端居紫石房心遺無句句頂處有霜霜白鹿眠枯葉清泉灑毳囊寄言疑未決一作已須道雪溪旁



明進士北齋避暑

相訪多衝雨由來德有鄰卷簾繁暑退濕樹一蟬新道在誰為主吾衰自有因祇應江海上還作狎鷗人

晚春寄吳融于競二侍郎

白頭為遠客常憶白雲間祇覺老轉老不知閑是閑花含宜細雨室冷是深山唯有霜臺客依依是往還

喜不思上人來

沃州那不住一別許多時幾度懷君夜相逢出夢遲瓶擔千丈瀑偈是七言詩若向羅浮去伊余亦願隨

秋懷赤松道士

仙觀在雲端相思星斗寒一作常憐呼鶴易却恨見君難石罅青蛇濕風裡白菌乾終期花月下壇上聽君彈

送劉逖赴閩辟

離亂生涯盡依劉是見機從來吟太苦不得力還稀路入閩山熟江浮瘴雨肥何須折楊柳相送已依依

苦雨中作

通宵復連夕其狀祇如傾却遣思山者忽然嫌水聲好花飄草盡古壁欲雲生不柰天難問迢迢遠客情

送僧歸日本

焚香祝海靈開眼夢中行得達即便是無生可作輕流黃山火著碇石索雷鳴想到夷王禮還為上寺迎有僧遊日本云

彼祇有三寺上寺名兜率國王供養中寺名浮上極品宮人供養下寺名祇上寺風俗供養有德行即漸遷上也

贈信安鄭道人

貌古似蒼鶴心清如鼎湖仍聞得新義便欲註陰符一作點點化金一作點常有閑行影漸無香兮中便是應不食菖蒲

送吏部劉相公除東川

帝念梓州民年年戰伐頻山川無草木烽火沒煙塵政亂皆因亂安人必藉仁皇天開白日殷鼎輟誠臣一日離君側千官送渭濱酒傾紅琥珀馬控白騏驎渥香番降壺漿處處陳旌幢山色濕邛夔鳥啼新帝幕還名儉良醫始姓秦軍雄城似岳地變物含春白必侵雙鬢清應誠四鄰吾皇重命相更合是何人



送智光禪伯

萬事歸一袖曹溪初去尋從來相狎輩盡不是知音乞食林花落穿雲翠嶽深終希重一見示我祖師心

夜對雪寄杜使君

第十四句缺一字

片片含天意紛紛勢莫拘灑於諸瑞後時有柏樹再生甘露頻降憂恐一冬無鶴禁聲偏密風焦片益粗冷牽人夢轉清逼瘴根

徂掃徑僧傾笠為詩士棄爐橋高銀蟾蟻峰峻玉浮圖盈尺何須聞豐年已可 遙思郢中曲句句出冰壺

送王穀及第後歸江西

太宗羅俊彥桂玉比光輝難得終須得言歸始是歸風帆天際吼金鷄月中飛五府如交辟魚書莫便稀

送盧瞻罷廬陵幕歸閩鄉

文行成身事從知貴得仁歸來還寂寞何以慰交親芳草色似動胡桃花又新昌朝有知己好作諫垣臣

避寇白沙驛作

第五句缺三字

避亂無深淺蒼黃古驛東草枯牛尚斲霞濕燒微紅 時時 人愁處處同猶逢好時否孤坐雪濛濛

聞李頌員外卒

蒼蒼難可問問答亦難聞落葉平津岸愁人李使君文章應力竭茅土始天分又逐東風去迢迢隔嶺雲

江陵寄翰林韓偓學士

久住荆溪北禪關挂綠蘿風清閑客去睡美落花多萬事皆妨道孤峰謾憶他新詩舊知己始為味如何

閑居作

閑門微雪下慵惰計全成默坐便終日孤峰祇此清身心閑少夢杉竹冷多聲唯有西峰叟相逢眼最明

和韋相公見示閑臥

刻形求得相事事未嘗眠霖雨方為雨非煙豈是煙童收庭樹果風曳案頭牋仲虺專為諾何充雅愛禪靜嫌

山色遠病是酒杯偏蝸響初穿壁蘭芽半出甑堂懸金粟像相公常供養維摩居士門枕御溝泉旦沐雖頻握融帷孰敢褰德

高羣彥表善植幾生前脩補烏皮几深藏子敬瓊扶持千載聖瀟灑一聲蟬棊陣連殘月僧交似大顛韓吏部重

常知生似幻維重直如弦餅憶尊羹美茶思岳瀑煎祇聞溫樹譽堪鄙竹林賢脫穎三千士馨香四十年寬平



開義路淡汙潤清田哲后知如子空王夙有緣對歸香滿袖吟次月當川休說慙如捷堯天即梵天

寄山中伉禪師

舉世遭心使吾師獨使心萬緣冥目盡一句不言深野火燒禪石殘霞照栗林秋風溪上路終願一相尋

秋寄栖一

一別一公後相思時一吁眼中瘡校未般若偈持無公時有眼瘡因爲之念多心經卷句冰團大爐煙樞樞粗勸君君記取不用更

他圖

懷匡山山長二首

白石峰之半先生好在應捲簾當大瀑常恨不如他杉鱗龍涎溢潭坳石髮多吾皇搜草澤爭柰謝安何見說面前峰尋常醉亦登雨餘多菌出燒甚古崖崩覓句曾衝虎耕田半爲僧聞名多歲也常恨不飛騰

懷高真動二首

知爾今何處孤高獨不羣論詩唯許我窮易到無文貴酒兒穿雪尋僧月照雲何時再相見兵寇尚紛紛久別無消息今秋忽得書諸孤婚嫁苦求已世情疎亂甚無喬木溪多不釣魚祇應金一作岳色如爾復如余

秋末入匡山船行八首

楚國茱萸月吳吟梨栗船遠遊無定所高臥是何年浪卷紛紛葉檣衝澹澹煙去心還自喜廬岳倚青天蘆葦深花裏漁歌一曲長人心雖憶越帆態似浮湘石獺銜魚白汀茅浸浪黃等閑千萬里道在亦無妨島上離家化茅茨竹戶開黃桑雙鵲喜白日有誰來擔浪澆秋芋緣灘取淨苔回頭深自媿舊業本蒿萊匡阜層層翠修江疊疊波從來未曾到此去復如何水廟寒鴉集沙村夕照多誰如垂釣者孤坐鬢暗皓晚泊蒼茫浦風微浪亦粗估喧如亥合橋密似林枯地峻湖無潮寒蚌有珠東西無定所何用問前途第五句缺一字島香思賈島江碧憶清江囊橐誰相似饒慵世少雙鬢驚入窟月燒到繫船樁設有歸鄉夢前頭是楚邦南北雖無道東西亦似萍霞根生石片象跡壞沙汀莽莽蒹葭赤微微屋蛤腥因思范蠡輩未免亦飄零曉色千橋去長江八月時雨淙山骨出捍擗岸形卑野水畚田黑荒汀獨鳥癡如今是清世誰道出山遲

送僧歸華山



心枯柎亦枯歸岳揭空孟七貴留不住孤雲出更便孤燒灰猶湯足雪片似黏鬚他日如相覓還應道到吳

送友人之嶺外第七句  
缺一字

五嶺難為客君遊早晚回一囊秋課苦萬里瘴雲開金柱根應動風雷舶欲來明時好進莫滯長卿才

送盧舍人朝覲

羶行無為日垂衣帝道亨聖真千載聖明必萬年明重德須朝覲流年不可輕洪才傳出世清甲得高名罕玉藏無映嵇松畫不成起銜軒后勅醉別亞夫營燒潤荊州熱霞新峴首晴重重堯雨露去去漢公卿白髮應從白清貧但更清夢緣丹陛險春傍綠衣生既握鍾繇筆須調傳說羹倘因星使出一望問支鏗

上馮使君山水障子

憶山歸未得畫出亦堪憐崩岸全墮路荒村半有煙筆句岡勢轉墨槍燒痕顛遠浦深通海孤峰冷倚天柴棚坐逸士露茗煮紅泉繡輿蓮峰競威如劔閣牽石門關塵鹿氣候有神仙茅屋書窗小苔階滴瀑圓松根擎石朽桂葉蝕霜鮮畫出欺王墨擊將獻惠連新詩寧妄說舊隱實如然願似窗中列時聞大雅篇

送令狐煥赴闕

渚宮遙落日相送碧江渚陟也須為相天乎更贊誰風高樯力出霞熱鳥行遲此去多來客無忘慰所思

送吳融員外赴闕

漢文思賈傅賈傅遂生還今日又如此送君非等閑雲寒猶惜雪燒猛似烹山應笑無機者騰騰天地間

送姚洎拾遺自江陵幕赴京

捧詔動征輪分飛楚水濱由來真廟器多作伏蒲人捨魯知非願朝天不話貧沙頭千騎送島上一蟬新莫使身侵貴無矜貴逼身玉階凝正色蘭苑漲芳塵鑿路不離華車書漸似秦流年飄倏忽書札莫因循涼雨鳴紅葉非煙閉紫宸憑將西社意一說向荀陳

送僧入石霜註內缺  
五字

舉世祇堪吁空知與道俱論心齊至聖對鏡破凡夫業王如雲合頭低似箭駢牛頭大師云攝妄心起業業如雲俱合論云入地獄人頭向下也三清徒妄想千載亦須臾唯我流陽叟深雲領義徒畫騎香白象皆握月明珠寂寞排松榻爛斑半雪鬚苔侵長者論嵐



蝕祖師圖翠嶽金鐘曉香林寶月孤兢兢齊白趾赫赫共洪爐山色鋤難盡松根踏欲無難評傳的的須到不  
區區撥舍新羅瘦爐煙榻拙粗燒奮平虎窟分瀑入香厨師去情何切人間事莫拘穿林宿古塚踏葉揭空盂  
無事終無事令枯便合枯鳥窠和尚云無事無事為法道云學向上事不入即須知枯方好也他年相覓在亦不是生蘇

送僧歸南康

殼殼學得律還鄉見苦情遠思芳草盛不入楚山行帆入汀煙健經吟戌月清到鄉同學輩應到贛江迎

送陳秀才赴舉兼寄韓舍人

主聖臣賢日求名莫等閑直須詩似玉不用力如山草白兵初息年豐駕已還憑將安養意一說向曾顏昔西社

生安養安  
養西方也

送友人及第後歸台州

得桂為邊辟翩翩頗合宜嫖姚留不住畫錦已歸遲鳥側花藏虎湖心浪撼棊終期華頂下共禮漆身師天台石橋有白

道猷坐化  
身錄也

晚春寄張侍郎

遐想涪陵岸山花半已殘人心何以遣天步正艱難時昭宗在岐下鳥聽黃袍小黃袍禽也城臨白帝寒應知窗下夢日日到江干

寄景判官兼思州葉使君

獨住西峰半尋常欲下難石多桐屐聲香甚藥花乾荏苒新鶯老窮通亦自寬髯參與短簿始為一吟看

送盧秀才應舉

幾載阻兵荒一名終不忘還衝猛風雪如畫冷朝陽時名畫李白王昌齡常建冷朝陽冒風雪入京句好慵將出囊空却不忙明年公道日去

去必穿楊

聞新蟬寄桂雍

新蟬終夜叫嘒嘒隔溪瀆杜宇仍相雜故人聞不聞捲簾花動月冥目砌生雲終共謝時去西山鸞鶴羣

寄懷楚和尚二首

吾師師子兒而復貌瓌奇何得文明代不為王者師鐵盂湯雪早石炭煮茶遲謾有參尋意因循到亂時



跳躑諸峰險回翔萬里空爭將金鎖鎖那把玉龍籠印缺香崩火窗疎蝎喫風永懷今已矣吟坐雪濛濛

和韋相公話婺州陳事

昔事堪惆悵談玄愛白牛

法華經以白牛喻大乘

干場花下醉一片夢中遊耕避初平石燒殘沈約樓無因更重到且副濟川舟

遇五天僧入五臺五首

十萬里到此辛勤詎可論唯云吾上祖見買給孤園一月行沙磧三更到鐵門白頭鄉思在迴首一銷魂  
雪嶺頂危坐乾坤四顧低河橫于闐北日落月支西水石香多白猿猱老不啼空餘忍辱草相對色萋萋  
遠禮清涼寺尋真似善才身心無所得日月不將來白疊蓮圖象滄溟亦汎杯唐人亦何幸處處覺花開  
塗足油應盡乾陀帔半懸辟支迦狀貌剎利帝家兒結印魔應哭遊心聖不知深嗟頭已白不得遠相隨  
送迎經幾國多化帝王心雷激青蓮目環垂紫磨金眉根霜入細梵夾蠹難侵必似陀波利他年不可尋

經普化禪師影院

大一今何處登堂似昔時曾蒙金印印得異野干兒影東龍神在門茱桐竹衰誰云續僧史別位著吾師

秋寄李頻使君二首

為郎須塞詔當路亦驅驅貴不因人得清還似句無燒煙連野白山藥抄階枯想得徵黃詔如今已在途  
務簡趣難陪清吟共綠苔葉和秋蟻落僧帶野香一作風來留客朝嘗酒憂民夜畫灰終期冒風雪江上見宗雷

上東林和尚

讓紫歸青薛高名四海聞雖然無一事得不是要君道祇傳伊字詩多笑碧雲應憐門下客餘力亦為文

江邊道士

獨住大江濱不知何代人藥壚生紫氣肌肉似紅銀酒釀竹屋爛符收山鬼仁何妨將我去一看武陵春

送僧之湖外

去旨趣非常春風爾莫狂惟擎一鐵鉢舊亦講金剛午飯孤煙裏宵禪大石旁羨師終不及湘浪淥茫茫

懷謬獨一

全唐詩

卷三十

貫休七



常憶蘭陵子環奇敏渴才思還如我苦時不為伊來岳霞孫擲雪湖月浪翻杯未聞露寸祿此事亦堪哀

送廬山衲僧

飛錫下崆峒清高世少雙凍天方篩雪別我去何邦燒繞赤烏亥雲漫白蚌江路人爭得識空仰鬢蒼癯

寄西山胡汾吳樵

帶經鋤隴者何止手胼胝覓句句好慙予筋力衰雲堦臨案冷鹿隊過門遲相憶空回首江頭日暮時

休糧僧

不食更何憂一作求自由中一作終自由身輕嫌衲重天旱為民愁應一作供器誰將去生臺一作靈蟻不遊會須傳此術相共一作去

老山丘

送杜使君朝覲第十六句缺一字

借寇借不得清聲徹帝聰坐來千里泰歸去一囊空遺愛封疆敷板蕪草木同路遙山不少江靜思無窮花舸衝煙濕朱衣照浪紅援臺兩岸曉歌枕滿旗風道罕將人合心難與聖通從茲林下客應代天功

送人之嶺外

見說還南去迢迢有侶無時危須早轉親老莫他圖小店地羹黑空山象糞枯三閭遺廟在為我一嗚呼

題弘式和尚院兼呈杜使君

二雅兼二密惜惜祇自怡臘高雲屐朽貌古畫師疑壑蟻緣金錫鑪煙惹雪蒼仍聞有新作祇是寄相思一作丘遠

湖頭別墅三首

梨栗鳥啾啾高歌若自由人誰知此意舊業在湖頭飢鼠掀一作款菱殼新蟬避栗皺不知江海上戈甲幾時休

桑柘參桐竹陰陰一徑苔更無他事出祇有衲僧來壑蟻爭生食窗經卷燒灰可憐門外路日日起塵埃

南北如仙境東西似畫圖園飛青啄木簷挂白蜘蛛鄰叟教修廢牛童與納租寄言來往客不用問榮枯

三峽聞猿

歷歷數聲後寥寥渡白煙應栖多月樹況是下霜天萬里客危坐千山境悄然更深仍不住使我欲移船

聞知聞赴成都辟請



文翁還化蜀常幕列鷓鴣飲水臨人易燒山見士難錦機花正合校草火初乾知己相思否如何借羽翰

題淮南惠照寺律師院

儀冠凝寒玉端居似沃州學徒梧有鳳律藏目無牛茗滑香黏齒鐘清雪滴樓還須結西社來往悉諸侯

秋末長興寺作

荒寺古江濱莓苔地絕塵長廊飛亂葉寒雨更無人栗不和皺落僧多到骨貧行行未得孤坐更誰親

寄杭州靈隱寺宋震使君

罷郡歸侵夏仍聞靈隱居僧房謝眺語寺額葛洪書晉道士葛洪與靈隱寺書額了去至今在月樹猶猴睡山池菡萏疎吾皇愛清靜莫便

結吾廬

送人歸夏口

鴈鴈葉紛紛行人豈易聞千山與萬水何處更逢君貌不長如玉人生祇似雲倘經三祖寺一為禮龕墳

送新羅僧歸本國

忘身求至教求得却東歸離岸乘空去終年無所依月衝陰火出帆撈大鵬飛想得還鄉後多應著紫衣

避寇入銀山

草草穿銀峽崎嶇路未諳傍山為店戍永日繞溪潭燒地生芑蕨人家煮偽蠶翻如歸舊隱步步入煙嵐

聞友人駕前及第

見心知命好一別隔煙波世亂無全士君方掇大科早隨鑿輅轉莫戀蜀山多必貢安時策忠言柰爾何

避地毘陵上王愷使君

時黃賊陷東陽公避地於浙右

至理至昭昭心通即不遙聖威無遠近吾道太孤標辛苦蘇氓俗端貞荅盛朝氣高吞海岳貧甚似漁樵庾亮風流澹劉寬政事超清須遭貴遇隱已被誰招栗塢修禪寺仙香寄石橋風雷巡稼穡魚鳥合歌謠視事私終殺憂民態亦彫道高無不及恩甚固難消大寇山難隔孤城數合燒烽煙終日起湯沐用心燠勇義排千陣誅鋤擬一朝誓盟違日月時賊陷降盟書終背旌旆過寒潮古驛江雲入荒宮海雨飄仙松添瘦碧天驥減豐臆似在陳兼衛終為宋與姚已觀雲似鹿即報首皆梟盡願迴清鏡重希在此條應憐千萬戶禱祝向唐堯



送崔尚書朝覲

至理契穹昊方生甫與申一麾歌政正三相賀仁人叵似盧懷慎全如邵信臣澄渟消宿靈煦愛劇陽春對客  
煙花拆焚香渥澤新徵黃還有自令弟相公謫當公送避賢路也挽鄧住無因峽水全輸潔巫娥却訝神宋均頗未老劉寵骨應貧  
大醉辭王翦含香望紫宸三峰初有雪萬里正無塵伊昔林中社多招席上珍終期仙掌下香火一相親

寒夜有懷同志

永夜殊不寐懷君正寂寥疎鐘寒徧郭微雪靜鳴條南省鴈孤下西林鶴屢招終當謝時去與子住山椒

寄新定桂雍

獨自住烏龍應憐是衲僧句須人未道君此事偏能塢濕雲埋觀溪寒月照一作曾相思不可見江上立騰騰

贈靈鷲山道潤禪師院

常恨煙波隔聞名二十年結為清氣引來到法堂前薪拾紛紛葉茶烹滴滴泉莫嫌來又去天道本泠然

干霄亭晚望懷王榮侍郎

霜打汀島赤孤煙生池塘清吟倚大樹瑤草何馨香久別青雲士常思白石房誰能共歸去流水似鳴璫

海邊見羅鄴

清世詩聲出誰人得似君命通須有日天未喪斯文楚木寒連寺修江碧入雲相思喜相見庭葉正紛紛

送僧之東都

之子之東洛囊中有偈新紅塵誰不入獨鶴自難親定鼎門連岳黃河凍過春憑師將遠意說似社中人

送于兢補闕赴京

亂離吾道在不覺到清時得句下雪岳送君登玉墀冷驚蟬韻斷涼觸火雲曠倘遇南來使無忘問所之

送鄭準赴舉

兩河兵火後西笑見吾曹海靜三山出天空一鶚高賃居槐一作屋行卷雪埋袍他日如相覓栽桃近海濤

寄拄杖上王使君

拄杖鄰一作僧與殊常不可名一條豎玉重百兩紫金輕有乳盤春力無心合道情惟宜高處著將寄謝宣城



秋望寄王使君

靜躡紅蘭徑憑高曠望時無端求句苦永日經風吹大月生峰角殘霞在樹枝祇應劉越石清嘯正相宜

送緣有禪師與雷處士入武夷山

師與雷居士尋山道入閩應將熊耳印別授武夷君崖碑仙棺出江垠毒草分他年相覓在莫苦入深雲

送友生入越投知己

才大終難住東浮景漸暄知將別足恨去擊李膺門宿霧開花塢春潮入苧村預思秋薦後一鴉出乾坤

寄烏龍山賈秦處士

庭果色如丹相思夕照殘雲邊踏燒去月下把書看澗水仙居共窗風漆樹寒吾君方側席未可便懷安

題大安寺通禪師院

應行諸岳徧象屐半無網一法尋常說此機仍未忘窗閑藤影老衲厚瀑痕荒寄語迷津者來茲問不妨

春晚寄盧使君

滿郭春如畫空堂心自澄禪拋金鼎藥詩和玉壺冰白雨飄花盡晴霞向閣凝寂寥還得句因寄柳吳興

武昌縣與畫公兼寄邑宰

小一何人識騰騰天地間尋常如一鶴亦不愛青山鐵鉢年多赤麻衣帶毳斑祇聞尋五柳時到月中還

別東林僧

大士宅裏宿芙蓉龕畔遊芙蓉道人坐處自憐 在子莫苦相留燥葉飄山席孤雲傍茗甌喪回不能去房在好峰頭

避地寄高蟾

荒寺雨微微空堂獨掩扉高吟多件俗此貌若為飢旅夢遭鴻喚家山被賊圍空餘老萊子相見獨依依

懷武夷山禪師

萬疊仙山裏無緣見有緣紅心蕉繞屋白額虎同禪古木苔封菌深崖乳雜泉終期還此去世事祇如然

秋末閑居作

幽居山不別落葉與階平盡日吟詩坐無端箇病成徑苔因旱赤池水入冬清惟有東峰叟相尋月下



贈許徵君

畫公友秦奚來往踏溪雲如今又到我還愛許徵君落花鳥銜來永日香氤氳終期將爾曹歸去麋鹿羣

秋夜作因懷天台道者

萬事何須問良時即此時高秋半夜雨落葉滿前池靜怕龍神識貧從草木欺平生無限事祇有道人知

偶作因懷大同道友

蠻木葉不落微吟漳水濱二毛空有雪萬事不如人漸水平芳草山花落淨巾天童好真伴何日更相親

邊上行

黑松一作白榆林外路風角遠嗶嗶朔氣生荒堡秋塵滿病容豺掎沙底骨人上月邊烽休作西行計西行地漸寬

江西再逢周瓊

六七年不見相逢鬢已蒼交情終淡薄詩語更清狂未得丹霄便依前四壁荒但令吾道在晚達亦何妨

登鄱陽寺閣

寺樓閑縱望不覺到斜暉故園在何處多年未得歸寒江平楚外細雨一鴻飛終教於陵子吳山有綠薇

秋晚野居

僻居人不到吾道本來孤山色圍中有詩魔象外無霜禾連鳥赤煙草倚橋枯何必求深隱門前似畫圖

酬杜使君見寄

軋軋復軋軋更深門未關心疼無所得詩債若為還露灑一鶴睡鐘餘萬象閑慙將此時意明日寄東山

湖上作

我竟胡為者嘵嘵但愛吟身中多病在湖上住年深山雷穿苔壁風鐘度雲林近來心更苦誰復是知音

送僧歸天台寺

天台四絕寺歸去見師真莫折枸杞葉令一作拾他一作拾得嗔天空聞聖磬瀑細落花巾必若雲中老他時得一作德有鄰

天台國清寺有拾得花巾即波羅巾也



壽春節進一本注武成元年作

聖運關天紀龍飛古帝基振搖三蜀地聳發萬年枝出震同中古承乾動四夷恩頒新命廣淚向舊朝垂大寶

歸玄識殊祥出遠池時有黃龍見於嘉州之野法天深罔測體聖妙難知儉德為全德無思契十思丕圖非力致英武悉天資正

直方親切回邪豈敢窺將排頗與牧相得稷兼夔鹽出符真主鹽湧麟并野來合大規麒麟賡歌隨羽籥奕葉敷伊初寡

欲情雖泰憂民色未怡盛如唐創業宛勝晉朝儀肝食宮鶯轉宵衣禁漏遲多於湯土地還有禹胼胝視物如

傷日勝殘去殺時守文情的無逸戒孜孜軒頊風重振皇唐鼎創移始聞呈瑞石又報產靈芝瑞石放光雷之生野覆幬高

緣大包容妙在卑兄呼春赫日師指佛牟尼大梵天王帝釋以佛為師也今上皇帝亦然佳氣宸居合淳風樂府吹急賢彰帝業解網見天

慈粟赤千千窖軍雄萬萬兒八蠻須稽顙四海仰昌期玉輦嬪嬙擁宮花錦繡欵堯雲同變黷漢祖太驅馳氛

浸根株盡澆詭朕兆隳山河方有截野逸詔無遺境靜消鋒鏑田香熟稻糜夢中逢傳說殿上見辛毗金鏡懸

千古彤雲起四維盛行唐典法再觀舜雍熙祝壽乾文動郊天太一隨煌煌還宿衛壘壘叶聲詩飲醴和甘雨

非煙遶御帷銀輪隨寶馬玉沼見金龜金色龜杳杳聞韶濩重重降撫綏魏徵須却出葛亮更何之簡約逾前古昇

平美不疑觸邪羊吟吟鼓腹叟嘻嘻邁五方云大超三始見奇錦霞連紫極仙鳥下峨眉謝傅還為傅周師又

作師納隍為永任從諫契無為子子寰瀛主孫孫日月旗壽春嗟壽域萬國盡虔祈捧日三車子恭思八彩眉

願將七萬歲匍匐拜瑤墀拜當作遠

送僧之安南

安南千萬里師去趣何長鬢有炎一作沃州雪心為異國香退牙山象惡過海布帆荒早作歸吳計無忘父母鄉

送僧歸剡山

遠逃為亂處寺與石城連木落歸山路人初刈剡田荒林猴咬栗戰地鬼多年好去楞伽子精修莫偶然

送僧入幽州

高士高無敵騰騰話入燕無人知爾意向我道非禪粟逕穿蕃塚狼聲隔遠煙槃山多道侶應未有歸年

送僧遊五臺

羨師遊五頂乞食值年豐去去誰為侶栖栖力已充濁河高岸折衰草古城空必到華嚴寺憑師問辨公



送僧入五洩

五洩江山寺禪林境最奇九年喫菜粥此事少人知山響僧擔穀林香豹乳兒伊余頭已白不去更何之

題令宣和尚院

軒窗領嵐翠師得世情忘惟愛談諸祖曾經宿大荒泉聲淹臥榻雲片犯鑪香寄語題門者看經在上方

寄四明閻丘道士二首

淮海兵荒日分飛直至今知擔諸子出却入四明深衣必編仙草僧應共栗林秋風溪上路應得一相尋  
三千功未了大道本無程好共禪師好常將藥犬行石門紅蘚劍柘塢白雲生莫認無名是無名已是名

經士馬中作

偷兒成大寇處處起煙塵黃葉滿空宅青山見俗人妖星芒刺越鬼哭勢連秦惆悵還惆悵茫茫江海濱

士馬後見赤松舒道士

滿眼盡瘡痍相逢相對悲亂階猶未已一往若為支堰茗蒸紅棗看花似好時不知今日後吾道竟何之

題方公院寄夏侯明府

銀地有餘光方公道益芳誰分修藏力頂有剝頭霜經勘松風燥簷垂塢茗香終須結西社此縣似柴桑

與劉象正字

獨居三島上在觀中住花竹映柴關道廣羣仙惜名成萬事閑病多唯縱酒靜極不思山唯有逍遙子時時自往還

懷智體道人

栖碧思一作把筆吾友庭鶯百轉時唯應一處住方得不相思雲水淹門闌春雷在一作折樹枝平生無限事不獨白

雲知

贈晦公禪人

流陽為役者相訪葉紛紛有句雖如我無心未似君構林青及竹茆屋暖於雲何日相將去千山麋鹿羣

寄靜林別墅胡進士兄弟

見說山居好書樓被翠侵燒燦汀鳥境月色弟兄吟犬吠黃桿落牛蹄紅樹深仍聞多白菌應許一相尋



懷赤松故舒道士

可惜復可惜如今何所之信來堪大慟余復用生爲亂世今交鬪玄宮玉柱墜春風五陵道迴首不勝悲

偶作

無端爲五字字字鬚星星祇覺人情薄空餘鶴眼青砌莎藏墜果窗雪浸殘經祇有歸山計茫茫何所營

春日許徵君見訪

龍鍾多病後日望遇昇平遠念穿嵩雪前林轉早鶯廚香烹瓠葉道友扣門聲還似青溪上微吟踏葉行

經先主廟作

古廟積煙蘿威靈及物多因知曹孟德爭奈此公何樹古露痕剝碑荒篆畫訛今朝冥禱祝祇望息干戈

寄中條道者

柏梯杉影裏頭白藥山孫今古管不得是非爭可論虎鬚懸瀑滴禪衲帶苔痕常恨龍鍾也無因接話言

夏日晚望

登臨聊一望不覺意悵然陶侃寒溪寺如今何處邊汀沙生早霧山火照平川終事東歸去干戈滿許田

送僧歸山

第六句缺一字

眼青禪帔赤氣岸出塵埃霞外終須去人間作麼來崖香泉吐乳塢燥燒雷他日終相覓山門何處開

覽皎然渠南鄉集

學力不相敵清還彷彿同高于寶月月誰得射鵬弓至鑿封姚監良工過魯公如斯深可羨千古共清風

覽姚合極玄集

第四句缺一字

至覽如日月今時即古時髮如邊草白誰念射聲好鳥挨花落清風出院遲知音郭有道始爲一吟之

大駕西幸秋日聞雷

軍書日日催處處起塵埃黎庶何由泰鑿與早晚回夏租方減食秋日更聞雷莫道蒼蒼意蒼蒼眼甚開

詩紀事題

作言詩

經天緯地物動必計一作是仙才幾處覓不得有時還自來真風含素髮秋色入靈臺吟向霜蟾下終須神鬼哀



秋末江上望

莽莽古江濱紛紛墜葉頻煙霞誰是主丘隴自傷神吞併寧唯漢淒涼莫問陳盡隨流水去寂莫野花香

乞食僧

擊鉢貌清羸天寒出寺遲朱門當大路風雪立多時似月心常淨如麻事不知行人莫輕誚古佛盡如斯

寒望九峰作

九朵碧芙蓉王維圖未圖層層皆有瀑一一合吾居雨歇如爭出霜嚴不例枯世猶多事在為爾久躊躇

薊北寒月作

薊門寒到骨戰磧鴈相悲古屋不勝雪嚴風欲斷髭清吟得冷句遠念失佳期寂莫誰相問迢迢天一涯

新猿一作新蟬

尋常看不見花落樹多苔忽向高枝發又從何處來風清聲更揭月苦意一作思彌哀多少求名者年年被爾催

懷南岳隱士二首一作贈隱者

千峰映碧湘真隱此中藏餅不煮石喫者應似髮長風裡一作根支酒甕鶴一作誰落琴床雖一作誰數忘機者斯人尚未忘

見說祝融峰擎天勢似騰藏千尋瀑布出十八高僧古路無人跡新霞出石稜終期將爾叟一一月中登

追憶馮少常

盛德方清貴旋聞逐逝波令人翻不會積善合如何直道登朝晚分憂及物多至今新定郡猶咏袴襦歌

聞閔廷言周璉下第

前勝年年見高名日日聞常因不平事便欲見吾君兄弟居清島園林生白雲相思空悵望庭葉赤紛紛

寄景地判官

渚宮江上別倏忽十餘年舉世唯攻說多君即不然浦珠為履重園柳助詩玄勉力酬知己昌朝正急賢

讀賈區賈島集

區終不下島島亦不多區冷格俱無敵貧恨亦似愚青雲終歎命白閣久圍鑪今日成名者還堪為爾吁

送衲僧之江西



索索復索索無憑却有憑過溪遭惡雨乞食得乾菱祇有山相伴終無事可仍如逢梅嶺旦向道祇寧馨  
故林偶作

朗吟無一事孤坐澌江濱媚世非吾道良圖有白雲盡魚開卷落啄木隔花聞唯寄壺中客金丹許共分  
寄栖白大師二首

流浪江湖久攀緣歲月闌高名當世重好句逼人寒月苦蟬聲夏鐘清柿葉乾龍鍾千萬里擬欲訪師難  
蒼蒼龍關晚九陌雜香塵方外無他事僧中有近臣青門玉露滴紫閣錦霞新莫話三峰去澆風正蕩淳  
送人之渤海

國之東北角有國每朝天海力浸不盡夷風常宛然山藏羅刹宅水雜巨鼉涎好去吳鄉子歸來莫隔年  
寄李道士

常見高人說猶來不偶然致身同槁木話道出忘詮長嘯仙鐘外眠楂海月邊倘修陰姪姪一望寄余焉  
秋送夏郢歸錢塘

歸客指吳國風帆幾日程新詩陶雪字玄髮有霜莖微月生滄海殘濤傍石城從茲江鳥意應續子陵名  
送僧歸翠微

祇衲一箇衲翠微歸舊岑不知何歲月即得到師心運遶千峰細菴開亂木深倘然雲外老他日亦相尋  
經友生墳

多君墳在此令我過悲涼可惜爲人好剛須被數將白雲從塚出秋草爲誰荒不覺頻回首西風滿白楊  
懷洛下盧縉雲

一減三張價幽居少室前豈應貧似我不得信經年木落多詩藁山枯見墨煙何時深夜坐共話草堂禪  
送李劍赴舉

詩業務經綸新皆意外新因知登第榜不著不平人句得孤舟月心飛九陌塵明年相賀日應到曲江濱  
寶禪師見訪

山兄心似我岸谷亦難交不見還相憶來唯添寂寥茶煙粘衲葉雲水透蘅茆因話流年一作事斯須不可拋



觀碁

逸格格難及半先相遇稀落花方滿地一局到斜暉褚盾死不死將軍飛已飛今朝慙一行無以造玄微

題一上人經閣

鳥外何須去衣如薜亦從但能無一事即是住孤峰雨歇雲埋閣月明霜灑松師心多似我所以訪師重

和毛學士舍人早春

陋巷冬將盡東風細雜籃解牽窗夢遠先是澗梅語茶癖金鐺快舍人有茶譜松香玉露含書齋山帚撥盤饌藥花

雅得琴中妙舍人妙于七弦常按臉似酣雪消聞苦蟄氣候似宜蠶密勿須清甲朝歸遠碧潭丹心空拱北新作繼周南

竹杖無斑點紗巾不着簪大朝名益重後進力皆覃至理雖亡一臣時亦說三不知門下客誰上晏嬰驂

壽春進祝聖七首

千載降祥

九天宮上聖降世共昭回萬彙須亭毓羣仙送下來承乾當否極庶事盡康哉祇有義軒比其餘不可陪

文有武備

武宿與文星常如掌上擎孫吳機不動周邵事多行盱食爐煙細宵衣隙月明還聞夔進曲吹出泰階平

從諫如流

及雷龍鱗動君臣道義深萬年軒后鏡一片漢高心北狄皆輸欵南夷盡貢琛從茲千萬歲枝葉玉森森

搜揚草澤

俟時兼待價垂棘出塵埃仄席三旌切移山萬里來煙霞衣上落關闔雪中開壽酒今朝進無非出世才

守在四夷

天將興大蜀有道遂君臨四塞同諸子三邊共一心閨婆香似雪迴鶴馬如林曾讀前皇傳巍巍冠古今

大興三教

曠曠懸佛日天侯動雲韶縫掖諸生集麟洲羽客朝非煙生玉砌御柳吐金條擊壤翁知否吾皇即帝堯



山呼萬歲

聲教無爲日山呼萬歲聲隆隆如谷響合合似雷鳴翠拔爲天柱根盤倚鳳城恭唯千萬歲歲歲致昇平

早秋夜坐

微涼砧滿城林下石牀平髮豈無端白詩須出世清鄰僧同樹影砌月浸蛩聲獨自更深坐無人知此情

早起

夜坐還早起寂寥多病身神清尋夢在香極覺花新樹露繁於雨溪雲動似人又知何處客軋軋轉征輪

秋晚野步

閑步不覺遠蕭蕭不落初詩情拋闌闕江影動襟裾閣北鴻行出霞西雨脚疎金峰秋更好乞取又何如

晚望

曠望危橋上微吟落照前煙霞濃浸海川岳闊連天白鳥格不俗孤雲態可憐終期將爾輩歸去舊江邊

寄翰林陸學士

顏冉商參甲鸞鳳密多才簾垂仙鳥下吟次聖人來寶輦千官捧宮花九色開何時重一見爲我話蓬萊

贈造微禪師院

蒼筤氣雍雍門深聖澤重七絲奔小鱗五字逼雕龍藥轉紅金鼎茶開紫閣封圭峰爭去得卿相日憧憧

南海晚望

海上聊一望船帆天際飛狂蠻莫挂甲聖主正垂衣風惡巨魚出山昏羣獠歸無人知此意吟到月騰輝

寄廬山大願和尚

石上桂成叢師菴在桂中皆云習鑿齒未可扣真風雪洗香鑪碧霞藏瀑布紅何時甘露偈一寄剡山東

懷薛尚書兼呈東陽王使君

得力未得力高吟夏又殘二毛非自出萬事到詩難蟬見木葉落雷將雨氣寒何妨槌琢後更獻至公看

上馮使君水晶數珠

泠泠瀑滴清貫串有規程將諷觀空偈全勝照乘明龍神多共惜金玉比終輕願在玄暉手常資物外情



送明覺大師兼寄鄭山人

去去楞伽子春深道路長鳥啼青嶂險花落紫衣香此去非餘事還歸內道場憑師將老倒一向說滎陽  
廬山尋靈紀不遇

題曹溪祖師堂

久別稀相見深山道益孤葉全離大朴君尚在新吳鐘噯聲飄驛山頑氣噴湖雷詩如和得一望寄前途  
皎潔曹溪月嵯峨七竇林空傳智藥記豈見祖禪心信衣非苧麻白雲無知音大哉雙峰溪萬古青沈沈  
懷匡山道侶

懷盧延讓

常憶將吾友穿雲過瀑西有碑皆讀徹無處不相攜檉桂林株濕後猿箇箇啼等閑成遠別窗月又如珪  
冥搜忍飢凍嗟爾不能休幾歎不得力到頭還白頭姓名歸紫府妻子在滄洲又是蟬聲也如今何處遊  
春晚訪鏡湖方干

秋過相思寺

幽居湖北濱相訪值殘春路遠諸峰雨時多獨覽人蒸花初釀酒漁艇劣容身莫訝頻來此伊余亦隱淪  
見說相思寺今來似有期瘴鄉終有出天意固難欺晝雨先花鳥秋雲挂戍旗故人多在蜀不去更何之

蜀王入大慈寺聽講

玉節金珂響似雷水晶宮殿步裴回祇緣支遁談經妙所以許詢都講來帝釋鏡中遙仰止  
上動崔巍千重香擁龍鱗立五種風生錦繡開

埃一條紫氣隨高步九色仙花落古臺謝太傅須同八凱姚梁公可並三台登樓喜色未將熟望國誠明首不  
迴駕馭英雄如赤子雌黃賢哲貢瓊瑰六條消息心常苦一劔晶熒敵盡摧木鐸聲中天降福景星光裏地無  
災百千民擁聽經座始見重天社稷才

蜀王登福感寺塔三首

善法堂前有七寶鏡照四天下 魔軍殿



天資忠孝佐金輪香火空王有宿因此世喜登金骨塔前生應是育王身佛記育王塔四萬八千塔封疆歲暮笙歌合襦袴正初

錦繡新釋子沾恩無以報祇擊章句貢平津似聖悲增道不窮憂民憂國契堯聰兩髯有雪丹霄外萬里無塵一望中南照微明連莽蒼峨嵋擁秀接崆峒

林僧歲月知何幸還似支公見謝公步步層層孰可陪相輪邊日照三台喜歡丞庶皆相逐惆悵鑿與尚未迴金鐸撼風天樂近仙花含露瑞煙開

少監三首

一年一度常如此願見文翁百度來器琢仙珪美有餘席珍國寶比難如銜花乳燕看調瑟衣錦佳人侍讀書荀氏門風龍變化謝家庭樹玉扶疎

即期寰海隆平日歸佐吾皇侍玉除益友相隨益自強趨庭問禮日照彰袍新宮錦千人目馬駿桃花一巷香偏愛曾顏終必及或如韓白亦無妨

八龍三虎森如也萬古千秋瑞聖唐具體而微太少年鳳毛五色帶非煙倚天長劍看無敵遶樹號猿已應弦接士開襟清聖熟分題得句落花前

再到鍾陵作

即應出將傳家法聖澤恩波浩浩然六七年來到豫章舊遊知己半凋傷春風還有花千樹往事都如夢一場無限丘墟侵郭路幾多臺榭浸湖光

經弟妹墳第五句缺二字

祇應唯有西山色依舊崔魏上寺牆淚不曾垂此日垂山前弟妹塚離離年長於吾未得力家貧拋爾去多時鴻衝霜中斷蕙雜黃蒿塚上衰

到蜀與鄭中丞相遇

恩愛苦情拋未得不堪回首步遲遲深隱猶為未死灰遠尋知己過三台如何麋鹿群中出又見鸞鷲天上來劍閣霞粘殘雪在錦江香甚百花開



別馮使君

瓦礫文章豈有煤兩三年祇在金臺本師頭白須歸去太守門清願再來皓皓玉霜孤鴈遠蕭蕭松島片帆開  
從茲林下終無事唯祇焚香祝上台

上新定宋使君

禪坐吟行誰與同杉松共在寂寥中碧雲詩裏終難到白藕花經講始終水疊山層擎草疏砧清月苦立霜風  
十年勤苦今酬了得句桐江識謝公

和李判官見新榜爲兄下第

失意荆枝滴淚頻陟岡何翅不知春心中歧路平如砥天上文章妙入神休說宋風迴鷓首即看雷火燎龍鱗  
從茲相次紅霞裏留取方書與世人

送羅鄴赴許昌辟

方得論心又別離黯然江上步遲遲不堪迴首崎嶇路正是寒風皺錯時美似邨超終有日去依劉表更何疑  
前程不少南飛鴈聊寄新詩慰所思

酬韋相公見寄

鹽梅金鼎美調和詩寄空林問訊多秦客奕碁拋已久楞嚴禪髓更無過萬般如幻希先覺一丈臨山且奈何  
日到天心乃相公之日  
老僧日去山乃一丈耳空飄平津好珠玉不知更得及門麼

酬張相公見寄

周郎懷抱好知音常愛山僧物外心閉戶不知芳草歇無能唯擬住山深感通未合三生石騷雅歡擎九轉金  
但似前朝蕭飯與蔣繡老僧風雪亦相尋

酬王相公見贈

孤拙將來豈偶然不能爲漏滴青蓮一從麟筆題牆後常祇冥心古像前九德陶鎔空有跡六窗清淨始通禪  
今朝幸捧瓊瑤贈始見玄中更有玄

酬周相公見贈



三界無家是出家豈宜拊鳳觀新麻幸生白髮逢今聖曾夢青蓮映玉沙境陟名山烹錦水睡忘東白洞平茶  
喜擎繡段攀金鼎謝眺餘霞始是霞

道情傷三首

崆峒老人專一一黃梅真叟却無無獨坐松根石頭上四溟無限月輪孤  
非色非空非不空空中真色不玲瓏可憐盧大擔柴者拾得驪珠橐籥中  
優鉢羅花萬劫春頻犁田地絕纖塵道吾道者相招好不是香林採葉人

馬上作

柳岍花堤夕照紅風清襟袖響瓊瓏行人莫訝頻迴首家在凝嵐一點中

道中逢乞食老僧

赤椶櫚笠着毫垂拄柳栗杖行遲遲時人祇施孟中飯心似白蓮那得知

秋末寄武昌一公

見說武昌江上住柏枯槐朽戰時風知師詩癖難醫也霜灑蘆花明月中

陋巷

墜葉如花欲滿溝破籬荒井一蟬幽亦知希驥無希者作麼令人強轉頭

終南僧

聲利掀天竟不聞草衣木食度朝昏遙思山雪深一丈時有仙人來打門

聽僧彈琴

家近吳王古戰城海風終日打牆聲今朝鄉思渾堆積琴上聞師大解行

漁者

風惡波狂身似閑滿頭霜雪背青山相逢略問家何在回指

一作觀蘆花滿舍  
一作茶間

大蜀皇帝潛龍日述聖德詩五首

嶽瀆殊祥日月精入堯金鏡佐休明衣嚴黼黻皇恩重劔折芙蓉紫氣橫玉焚金湯山岳峻花藏臺榭管弦清



已聞圖上凌煙閣寵渥穹窿王不名

扶持社稷似齊桓百萬雄師貴可觀神智發中真莫測貢輸天下學應難風清鼙角

肅神龍草木寒

堪羨蜀民恒有福太平時節一般般第五句缺三字第六句缺一字

珠履三千侍玉除一作宮花飄錦早鶯初雖然周孔心相似其奈龔黃政不如浩浩歌謠聞禁掖重重襦袴滿

樵漁若論朝野艱難日第一之功美有餘

紫髯青眼代天才韓白孫吳稍可陪祇見赤心堯日下豈知真氣楚天來聽經瑞雪時時落登塔天花步步開

盡祝莊椿同壽考人間歲月豈能催

丈夫勛業正乾坤麟鳳龜龍盡在門西伯最憐耕讓畔曹參空愛酒盈樽心慈為受金仙囑髮白緣酬玉砌恩

從此于門轉高大可憐子子與孫孫

陳情獻蜀皇帝

河北江東一作處處災唯聞全蜀勿一作少塵埃一餅一鉢垂垂老干水千山得得來柰苑一作秦苑幽棲多勝景巴歛陳貢

壽春節進大蜀皇帝五首

上玄大帝降坤維箕尾為臣副聖期豈比赤光盈室日全同白象下天時文經武緯包三古日角龍顏過四夷

今日降神天上會願將大福比須彌

異香滴露降紛紛紫電環樞照禁門先冠百王臨億兆後稱十號震乾坤義軒之道方為道草木沾恩始是恩

今以謏才歌睿德猶如飲海妙難論

茂祉遐宣勝事并薰風微入舜弦清四洲不必歸王化一統那能計聖情合合鼓鐘膏雨滴峩峩宮闕瑞煙橫

西逾昆岳東連海誰不梯山賀聖明

遠人玉帛盡來歸及物天慈物物肥春力遍時皆甲拆王言聞者盡光輝家家錦繡香醪熟處處笙歌乳燕飛

為報蜀皇勤禱祝聖明天子古今稀

積劫修來似煉金為皇為帝萬靈欽能當濁世為清世始見君心是佛心九野黎民耕浩浩百蠻朝騎日駸駸



今朝獻壽將何比願似莊椿一萬尋

對雪寄新定馮使君二首

仙堂空思歸未能焚香冥目對殘燈豈知瑞雪千山合空覺春寒半夜增  
翳月素雲埋粉堞堆巢孤鶴下金繩  
因思太守憂民切吟對瓊枝喜不勝  
政化由來通上靈豐年祥瑞滿窗明  
氣嚴坐久燈凝燄片大更深屋作聲  
飄掩煙霞何處去欹斜杉竹向簾傾  
雪林中客雖無事還有新詩半夜成

送劉相公朝覲二首

九苞仙瑞曜垂衣一品高標百辟師  
魏相十思常自切曹溪一句幾生知  
公深入禪理久交玉帳雖難別須佐金輪去  
已遲唯杜荊州最惆悵柳門迴首落花時  
急徵祇是再登庸生意人心萬國同變理  
久徵殷傳說譚真欲過李玄通程穿峴首  
春光老馬速商於曙色紅  
從此龍顏又應瘦寰瀛俱荷代天功

避寇遊成福山院

成福僧留不擬歸猶猴菌嫩豆苗肌  
那堪蠶月偏多雨况復衝城未解圍  
時孫端國逼衛城數月翠擁檀籬泉亂入雲開花鳥  
雉雙飛堪嗟大似悠悠者祇向詩中話息機

別李常侍

楚水和煙海浪通又擎杯錫去山東  
道情雖擬攀孤鶴詩業那堪至遠公  
夢入深雲香雨滴吟搜殘雪石林空  
朱門再到知何日一片征帆萬里風

送鄭閣赴闕辟

便便書腹德無鄰健筆從知又入闕  
鸚鵡才須歸紫禁真珠履不稱清貧  
武夷山夾仙霞薄螺女潭通海樹春  
從此應多好消息莫忘江上一閑人

寄信州張使君

水壇裡殿地含煙領鶴行吟積翠間  
數閣涼颺終日去滿懷明月上方還  
時來自有鸚鵡識道在從如草木開  
唯



羨靈溪賢太守一麾清坐似深山

春末寄周遊

暮角含風雨氣曛寂寥莓翠上衣巾道情不向鶯花薄詩意自如天地春夢入亂峰仍履雪吟看芳草祇思人手  
中孤桂月中在來聽泉聲莫厭頻

讀吳越春秋

猶來吳越盡須慙背德違盟又信讒宰嚭一言終殺伍大夫七事祇須三功成獻壽歌飄雪誰愛扁舟水似藍  
今日雄圖又何在野花香徑鳥喃喃

春遊靈泉寺

水蹴危梁翠擁沙鐘聲微徑入深花嘴紅澗鳥啼芳草頭白山僧自打一作茶松色摧殘遭賊火水聲幽咽落人  
家寺因泉得名自靈沙  
汰其泉落在人家因尋古跡空惆悵滿袖香風白日斜

歸東陽臨岐上杜使君七首

小謝清高大謝才聖君令泰此方來一從到後常無事鈴閣公庭滿綠苔  
紅錦帳中歌白雪烏皮几畔撫青英不知何物為心地賽却澄江徹底清

誰報田中有黑蟲一家齊戒滅仙容分憂若也皆如此天下家家有剝春

憂民心切出衝炎禾稼如雲喜氣兼林下閑人亦何幸也隨旌旆到銀尖銀尖去郭  
二十里

方恐獄中桃樹出忽聞枯木却生煙時有枯  
木再生褚祥為郡曾如此却恐當時是偶然

枯骨縱橫過水渚盡收為塚碧參差分明為報精靈輩好送旌旗到鳳池

捨魯依劉一片雲好風吹去遠纖塵猶期明月清風夜來作西園第八人

春

自來自去動洪鐘無象無私無處無迴應不多消氣力染花應最費工夫溟濛便恨豪家惜濃暖深為政筆駢  
莫訝相逢只添睡伊余心不在榮枯



聞迎真身

四海無波入表臣恭聞今歲禮真身七重鑲未開金鑰五色光先入紫宸丹鳳樓臺飄瑞雪岐陽草木亞香塵  
可憐優鉢羅花樹三十年來一度春

灞陵戰叟

劍利秋水鬢梳霜迴首胡天與恨長官竟不封右校尉曾生挾左賢王尋班超傳空垂淚讀李陵書更斷腸今  
日灞陵陵畔見春風花霧共茫茫

遇道者

鶴骨松筋風貌殊不言名姓絕榮枯尋常藜杖九衢裏莫是商山一皓無身帶煙霞游汗漫藥兼神鬼在葫蘆只  
應張果支公輩時復相逢醉海隅

贈鍾陵陳處士

否極方生社稷才唯譚帝道鄙梯媒高吟千首精怪動長嘯一聲天地開湖上獨居多草木山前頻醉過風雷吾  
皇仄席求賢久莫待徵書兩度來

懷鄰叟

常思東溪癯者翁是非不解兩頰紅桔槔打水聲嗶嗶紫芋白薤肥濛濛鷓鴣靜遊深竹裏兒孫多在好花中千  
門萬戶皆車馬誰愛如斯太古風

贈軒轅先生

曾親文景上金鑾語共容城語一般久向紅霞居不出若非清世見應難滿鑪藥熟分仙盡幾局碁終看海乾略  
問先生真甲子只言弟子是劉安

偶作因懷山中道侶

是是非非竟不真桃花流水送青春姓劉姓項今何在爭利爭名愁殺人必竟輸他常寂默只應贏得苦沈淪深  
雲道者相思否歸去來兮湘水濱

送新羅人及第歸



捧桂香和紫禁煙遠鄉程微巨鼈邊莫言挂席飛連夜見說無風即數年衣上日光真是火鳥旁魚骨大於船到鄉必遇來王使與作唐書寄一篇

送新羅衲僧

扶桑枝西真氣奇古人呼爲師子兒六環金錫輕擺撼萬仞雪嶠空參差枕上已無鄉國夢囊中猶挈石頭碑南岳石頭六師刻  
珂郎中作碑文也多慙不便隨高步正是風清無事時

春晚桐江上開望作

江上車聲落日催紛紛擾擾起紅埃更無人望青山立空有帆衝夜色來沙鳥似雲鐘外去汀花如火雨中開可憐瀟灑鴟夷子散髮扁舟去不迴

商山道者

五千言外得玄音石屋寒栖隔一作得雪林多傍松風梳綠髮只燒崖藥點黃金澄潭龍氣來縈砌月冷星精下聽琴曾夢先生非此處碧桃溪上紫煙深

聞許棠及第因寄桂雍

時清道合出塵埃清苦爲詩不仗媒今日桂枝平折得幾年春色併將來勢扶九萬風初極名到三山花正開更有平人居蟄屋還應爲作一聲雷

澁江秋居作

無事相關性目據庭前拾葉等閑書青山萬里竟不足好竹數竿涼有餘近看老經加澹泊欲歸少室復何如面前小沼清如鏡終養琴高赤鯉魚

上縉雲段使君

清畏人知人盡知縉雲三載得宣尼活民刀尺雖無象出世文章豈有師木氣芝香粘麤榼雲痕翠點滿旌旗今朝暫到金臺上頗覺心如太古時

春末蘭谿道中作

山花零落紅與緋汀煙漾茸江水肥人擔犁鋤細雨歇路入桑柘斜陽微深喜東州云寇去時夢通洞人出  
燒劫處州却上不知西狩



幾時歸清平時節何時是轉覺人心與道違

野居偶作

高淡清虛即是家何須須占好煙霞無心於道道自得有意向人人轉賒風觸好花文錦落砌橫流水玉琴斜  
但令如此還如此誰羨前程未可涯

再遊東林寺作五首

臺殿參差聳瑞煙桂花飄雪水潺潺莫疑遠去無消息七萬餘年始半年傳記云安遠持美三車盡生梵宇天人間四千年後天一遺夜亦三十日為一月十二月為一年壽四千歲  
桓玄舊輦殘雲濕耶舍孤墳落照遲首桓玄入山禮遠公送拾登至今在遠公堂下有箇山僧倚松睡恐人來取白猿兒

玉像珠龕香陣橫錦霞多傍石牆生辟蛇行者今何在花裏唯聞鳩一作鳥聲

愛陶長官醉兀兀送陸道士行遲遲買酒過溪皆破戒斯何人斯師如斯遠公高節食後不飲蜜水而將詩博慈願與陶潛別人不得又送客不以貴賤不過虎溪而送陸靜修道士過

虎溪數百步今寺門前有道士岡送道士至此止也

白蔞葡萄花露滴滴紅一作碧苾芻草香一作雨濛濛田地更無塵一點是何人合住其中

題蘭江言上人院二首

時王臨先草兩詩一首題其院因和題之

一生只著一麻衣道業還欺習彥威手把新詩說山夢石橋天柱雪霏霏  
只是危吟坐翠層門前岐路自崩騰青雲名士時相訪茶煮西峰瀑布冰

中秋十五夜月

嘆雪噴霜滿碧虛王孫公子翫相呼從來天匠為輪足自是人心此夜餘靜入萬家危露滴清埋眾象叫鴻孤  
坐來惟覺情無極何況三湘與五湖

驚鷺有懷 前東陽王隨使君 卷一驚鷺名理花

粉魄霜華為爾枯鴛鴦相伴更堪圖愛來沙島遺銀屋終作金籠養雪鷄栖宿必多清瀨夢品流還次白猿徒  
今朝不覺頻回首曾伴瑤花近玉壺

東陽罹亂後懷王隨使君五首

第三句 缺一字

昨來祇對漢諸侯勝事消磨不自由裂地鼓鼙軍 急連天烽火陣雲秋砍毛淬劍雖無數歎血為盟不到頭



誰爲今朝奉明主使君司戶在隋州時黃巢在許公點土勇救萬壽押于款五連西而渠魁詐降却將連城爲盟連約遂於成地當不與德睦抗守同殿中也

只報精兵過大河東西南北殺人多可憐白日渾如此來似蝗蟲爭奈何天意豈應容版亂人心都改太凋訛不勝惆悵還惆悵一曲東風月勝歌

爲郡無如王使君一家清冷似雲根貨財不入崔洪口俎豆嘗聞夫子言鬚髮生成三載雪黎氓空負二天恩不堪西望西風起縱火崑崙誰爲論

魄攝魂飛骨亦銷此魄此魂亦難招黃金白玉家家盡繡闥雕甍處處燒驚動乾坤常黯慘深藏山岳亦傾搖恭聞國有英雄將擬把何心答聖朝

不是龔黃覆育才即須清苦遠塵埃無人與奏吾皇去致亂唯因酷吏來剝生靈爲事業巧通豪譜作梯媒令人轉憶王夫子一片真風去不迴

秋夜懷嵩少因寄洛中舊知

鎰藝旃檀不稱貧霏霏玉露濕禪巾紫金地上三更月紅藕香中一病身少室少年偏入夢多時多事去無因如今憔悴頭成雪空想嵯峨羨故人

避地毘陵寒月上孫徽使君兼寄東陽王使君三首

一到毘陵心更勞冷吟閑步擁雲袍豈緣思妙塵埃少自是風清物態高野色疎黃連楚甸故山奇碧隔河橋終須愚谷中安致不是人間好羽毛

常憶雙溪八詠前講詩論道接清賢文欺白鳳真難及藥撚紅蕖豈偶然花濕瑞煙粘玉磬簾垂幽鳥啄苔錢自憐不是悠悠者吟嚼真風二十年

露車雨滴階聲寂寞焚香獨閉高錦繡文章無路達袴襦歌詠隔牆聽松聲冷浸茶軒碧苔點狂吞納線青唯有孤高江太守不忘病客在禪靈首句缺一字

秋末寄上桐江馮使君

山東山色勝諸山謝守清高不可攀薄俗盡于言下泰苦心唯到醉中閑香凝錦帳抄書後月轉棠陰送客還野客霑恩歸未得蕭蕭霜葉滿柴關



禪師

擊鼓求亡益是非木中生火更何為吾師別是醍醐味不是知心人不知

道士

花鳥相逢滿袖雲藉花論道過金巾騰騰又入仙山去只恐是青城丈人

風琴

至境心為造化功一枝青竹四弦風寥寥雙耳更深後如在縵山明月中

庭橘

蟻踏金苞四五株洞庭山上味何殊不緣松樹稱君子肯便甘人喚木奴

落花

蝶醉蜂癡一簇香繡葩紅蒂隨殘芳因嗟好德人難得公子王孫盡斷腸

孤雲

將比鷺鷥還恐屈始思殘雪不如多清風相引去更遠皎潔孤高奈爾何

苦吟

河薄星疎雪月孤松枝清氣入肌膚因知好句勝金玉心極神勞特地無

古戰處

鬼氣蒼黃棘葉紅昔時人血此時風相憐極目無疆地曾落將軍一陣中

偶然作

蟬聲引出石中蛩寂寞門扃葉數重誰道思山心不切等閑盡出一作兩三峰

招友人宿

銀地無塵金菊開紫梨紅棗墮莓苔一泓秋水一輪月今夜故人來不來

山居詩二十四首

并序

貫休十一



愚咸通四五年中於鍾陵作山居詩二十四章放筆藁被人將去厥後或有散書于屋壁或吟咏於人口一  
首兩首時時聞之皆多字句舛錯洎乾符辛丑歲避寇於山寺偶全獲其本風調野俗格力低濁豈可聞於  
大雅君子一日抽毫改之或留之除之修之補之却成二十四首亦斐然也蝕木也槩山謳之例也或作者  
氣合始為一朗吟之可也

休話誼譁事事難山翁只合住深山數聲清磬是非外一個閑人天地間綠圃空階雲冉冉異禽靈草水潺潺無  
人與向羣儒說一作為向岩桂枝高亦一作好板

難一作是言休即便休清吟孤坐碧溪頭三間茆屋無人到十里松陰一作獨自遊明月清風宗炳社夕陽秋色庾公  
樓修心未到無心地萬種千般逐水流

好鳥聲長睡眠開好茶擎乳坐莓苔不聞榮辱成番盡只見熊羆作隊來詩裏從前欺白雪道情終遣似嬰孩由  
來此事知音少不是真風去不迴

萬境忘機是道華碧芙蓉裏日空斜幽深有徑通仙窟寂寞無人落異花掣電浮雲真好喻如龍似鳳不須誇君  
看江上英雄塚只有松根與柏槎

鞭後從他素髮兼湧清奔碧冷侵簾高奇章句無人愛澹泊身心舉世嫌白石橋高吟不足紅霞影暖臥無厭  
居山別有非山意莫錯將子比宋纖

鳥外塵中四十秋亦曾高挹漢諸侯如斯標致雖清拙大丈夫兒合自由紫木黃菁苗蕝蕝錦囊香麝語啾啾  
終須心到曹溪叟千歲楷根雪滿頭

慵甚嵇康竟不迴何妨方寸似寒灰山精日作兒童出仙者時將玉器來筠帚掃花驚睡鹿地爐燒樹帶枯苔  
不行朝市多時也許史金張安在哉

心心不住希夷石屋一作巉巖鬚一作髮垂養一作竹不除當路筍愛松留得礙人枝焚香開卷霞一作生砌捲箔冥  
心月在池多少一作故人頭盡白不知今日一作又何之

龍藏琅函遍九垓霜鐘金鼓振瓊臺堪嗟一句無人得遂使吾師特地來無角鐵牛眠少室生兒石女老黃梅  
今人轉憶龐居士天上人間不可陪



五嶽煙霞運不絕三山洞穴去應通石窗欹枕疎疎雨水碓無人浩浩風童子念經深竹裏彌猴拾蠅夕陽中因思往事拋心力六七年來楚水東

塵埃中更有埃塵時復雙眉十為顰賴有年光飛似箭是何心地亦稱人回賢參孝時時說蜂蠆狼貪日日新天意剛容此徒在不堪惆悵不堪陳

翠寶煙巖一作畫不成桂華瀑沫雜芳馨撥霞掃雪和雲母掘石移松得茯苓好一作鳥傍花窺玉磬嫩苔和一作水沒及金餅從他人說從他笑地覆天翻也只寧

騰騰兀兀步遲遲兆朕消磨只自知龍猛金膏雖未作孫登土窟且相宜薛蘿山被偏能繙橡栗年糧亦且支已得真人好消息人間天上更無疑

嵐嫩風輕似碧紗雪樓金像隔煙霞葛苞玉粉生香壠菌簇銀釘滿淨植舉世只知嗟逝水無人微解悟空花可憐擾擾塵埃裏雙鬢如銀一作事似麻

千嶽萬壑路傾欹杉檜濛濛獨掩扉斷藥童穿溪磳去採花蜂冒曉煙歸閑行放意尋流水靜坐支頤到落暉長憶南泉好言語如斯癡鈍者還稀南泉大師云學道之人癡鈍者難得

一菴冥目在穹冥菌枕松牀薛陣青乳鹿暗行徑徑雪瀑泉微濺石樓經閣行不覺過天井長嘯深能動岳靈應恐無人知此意非凡非聖獨醒醒

慵刻芙蓉傳永漏休誇麗藻鄙湯休且為小園盛紅粟別有珍禽勝白鷗拾栗遠尋深澗底弄猿多在小峯頭不能更出塵中也百煉剛為繞指柔

業薪心火日燒煎浪死虛生自古然陸氏稱龍終妄矣漢家得鹿更空焉白衣居士深深說青眼胡僧遠遠傳剛地無人知此意不堪惆悵落花前

露滴紅蘭玉滿畦閑拖象屐到峯西但令心似蓮花潔何必身將槁木齊古壑細煙紅樹老半岩殘雪白猿啼雖然不是桃源洞春至桃花亦滿蹊

自休自己一作自安排常願居山事偶諧僧採樹衣臨絕壑金華山出樹衣僧多採為蔬菜味極美也狄爭山果落空階閑擔茶器綠青障靜衲禪袍坐綠崖虛作新詩反招隱出來多與此心乖



石鑪金鼎紅葉嫩香閣茶棚綠燼齊塢燒崩騰奔澗鼠岩花狼籍關山雞業莊環外知音少阮籍途窮肯趣低應  
有世人來覓我水重山疊幾層迷

自古浮華能幾幾一作朝逝波終日去滔滔漢王廢苑生秋草吳主荒宮入夜濤滿屋黃金機不息一頭白髮氣猶高

豈知知足一作物外金仙子霞外一作甘露天香滿一作滴毳袍

如愚何止直如弦只合深藏碧嶂前但見山中常有雪不知世上是何年野人愛向菴前笑赤獮頻來袖畔眠只  
有逍遙好知己何須更問洞中天

支公放鶴情相似范泰論交趣不同有念盡爲煩惱相無私方稱水晶宮香焚蒼菊諸峯曉珠指金剛萬境一作衆空  
若買山資言不及恒河沙劫用無窮

再逢虛中道士三首

天目西峯古壞壇壇邊相別雪漫漫如今四十餘年也還共當時恰一般

囊裏靈龜小似錢道伊年與我同年壺中長挈天相逐何處昇天更有天

吾道將君道且殊君鬚全似老君鬚尋常有語爭堪信愛說蟠桃似瓊麤

上盧使君二首

一領彤弓下赤墀惟將清淨作藩籬馬卿山岳金相似張緒風情柳不如當作心染煙霞新句出筆驅奸蠹宿根

隳鄱陽黎庶還堪羨頭有重天足有甃

司馬遷文亞聖人三頭九陌碾香塵盡傳棣萼麟兼鳳終作昌朝甫與申樓聳嬌歌疎雨過風含和氣滿城春

因知寰海昇平去又見高宗夢裏人

陪馮使君遊六首

登千霄亭

擁翠捫蘿山屐輕飄飄紅旆在青冥仙科朱紱言非貴溪鳥林泉癖愛聽古桂林邊碁局濕白雲堆裏茗煙青

因思廬岳彌天客手把金書倚石屏

遊靈泉院



珂珮喧喧滿路岐，亂泉聲裏扣禪扉。  
對花語合希夷境，坐石苔黏繡黻衣。  
鳥啄古杉雲冉冉，風吹清磬露霏霏。  
惠巖亦有孤峯在，只戀縑經未得歸。

過相思嶺

譽自馨香道自怡，相思嶺上却無機。  
荒渠葉覆深霞在，片石人吟一鳥飛。  
何處風砧傳古曲，誰家塚樹挂斜暉。  
因思往事真堪笑，鶴背漁竿未是歸。

錦沙墩

臨水登山興自奇，錦沙墩上最多時。  
雖云髮白孤峯好，其奈名清聖主知。  
草媚蓮塘資逸步，雲生松壑有新詩。  
翛然別是神仙趣，豈羨東山妓樂隨。

釣罾潭

境靜江清無事時，紅旌畫鷁動漁磯。  
心期只是行春去，日暮還應待鶴歸。  
風破綺霞山寺出，人歌白雪島花飛。  
自憐亦在僊舟上，玉浪翻翻濺草衣。

迎仙閣

澗香霞影遠樓臺，捲箔凭闌耳目開。  
况從旌旗近鸞鳳，可憐談笑出塵埃。  
火雲不入長松徑，靈茗何須白玉杯。  
誰道迎仙仙不至，今朝還有謝公來。

賀雨上王使君二首

一片丹心合萬靈，應時甘雨帶龍腥。  
驅塵熬煉燒連窮，雷衝霓滿宵冥處處已知倉廩溢家家皆歌管弦聽

應須蚤勒南山石，黃霸清風滿內庭。第三句第四句各缺一字

由來天贊德唯馨，朋禱心期事盡行。  
玄妙久聞談佛母，公久與東村大願和尚談般若般若者佛母也感通今日見神明。  
破除秋熱飄蕭盡，還似春時散漫傾。  
他日為霖亦如此，諸生無不沐經營。

感懷寄盧給事二首

絲絲遠念近來多，喜鵲隨函到綠蘿。  
雖匪二賢曾入洛，忽驚六義減沈疴。  
童扳鄰杏墮牆瓦，燕啄花泥落砌莎。  
好更因人寄消息，沃州歸去已蹉跎。



常憶團圓繡像前東歸經亂獨生全孤峯已住六七處萬事無成三十年每想苑牆危逼路更思鉢塔曉凌煙  
如今憔悴荆枝盡一詠來書一愴然

賀鄭使君

三衢蜂蠶陷城池八詠龍韜整武貔纒論危亡書半幅便思父母淚雙垂  
投仁境汗浹魂飄拜虎旗死地再生知德重精兵連譏覺山移人和美叶禎祥出陣善深為典教推仗信輸誠  
方始是執俘折讖欲何為清威嚴令無纖益長路深山不拾遺七邑思波歌浩渺一方雲物自鮮奇天文仰視  
同諸掌劔術無前更數誰戰馬闕眠汀草遠秋聲乾揭岳霞隳義為土地精靈伏仁作金湯鐵石卑龔遂劉寬  
同煦嫗張飛關羽太驅馳笙歌席上偏憐客刀劔林中亦念詩穀渚美為長飲水金山高作受降碑時猶草草  
秋方盡陳是堂堂孰敢窺寵渥豈唯分節鉞勲庸須勒上鍾彝神資天贊誰堪比名遂功成自不知捲箔倚闌  
雲欲雪擁爐傾榼酒如飴扶竟社稷常憂老到郭汾陽亦未遲釋子沾恩無以報只將葑菲賀階墀

送鄭使君

刺婺廉閩動帝臺唯將清淨作梯媒綠沈槍卓妖星落白玉壺澄苦霧開仁愛久懸溪上月恩光又發嶺頭梅  
天資劉邵龔黃筆神助韓彭衛霍才古驛劔江分掩映畫旗花舫下喧喧鳳麟帝幕芙蓉坼洞壑消威霹靂來  
禮樂封疆添禮樂塵埃時節勿塵埃荔支花下驅千騎蒼蒲林中禮萬迴時八安大師在回院也視事蠻奴磨玉硯邀賓海月  
射金杯謳歌合合千門樂擊角雄雄一閣雷君父恩深頭早白子孫榮襲日難陪東陽緇素如何好空向生祠  
祝上台

贈楊公杜之舅

分盡君憂一不遺風書徵入萬民悲風雲終日如相逐雨露前程即可知畫舸還盛江草石秋山又看謝安棊  
談諧盡是經邦術頭角由來出世姿天地事須歸素籥文章誰得到果息扣舷傍島清吟健問俗看漁晚泊遲  
霞影滿江搖枕簟鳥行和月下漣漪周秦漢魏書書在麟鳳龜龍步步隨金殿恩波將浩浩圭峯意緒謾孜孜  
郡中條今春常在境外詞謠美更奇道者藥壺留要妙林僧禪偈寄相思玉楊盧駱真何者房杜蕭張更是誰  
應念衝民千萬戶家家皆道一生祠



遊金華山禪院

茲地曾棲菩薩僧，旃檀樓殿瀑崩騰。因知境勝終難到，問著人來悉不曾。斜谷暗藏千載雪，薄嵐常翳一龕燈。多慙不及當時海，又下嵯峨一萬層。

寄鄭道士二首

常憶蘇耽好羽儀，信安山觀住多時。不知玉質雙樓處，兩箇仙人是阿誰。誰帶金輪髻裏珠，何妨相逐去清都。舊山大有閑田地，五色香茆有子無。

送少年禪師二首

秀眉青目樹花衣，一鉢隨緣智不知。佛與輪王嫌不作，世間剛有箇癡兒。萬水千山一鶴飛，豈愁遊子暮何之。古今此著無人會，王積新輪更不疑。

古劍池

秋水蓮花三四枝，我來慷慨步遲遲。不決浮雲斬邪佞，真成龍去擬何爲。

曹娥碑

高碑說爾孝，應難彈指端。思白浪間堪歎，行人不迴首。前山應是苧蘿山。

比干傳

昏王亡國豈堪陳，只見明誠不見身。想得先生也知自，欲將留與後來人。

送人遊茆山

鳥啼花笑暖紛紛，路入青雲白石門。君到前頭好看嬾，老僧或恐是茆君。

一作茅君舊宅基猶在，樂處苔深土尚殷。君見道人憑與問，大還還字若爲還。

聞杜宇

咽雨哀風更不停，春光於爾豈無情。且須喚得謝豹出，方始年年無此聲。

聽曉角

三會單于滿閣風，五行無忒月朦朧。如何十萬家休戚，只在嗚嗚咽咽中。

宿赤松山觀題道人水閣兼寄郡守



珠殿香輶倚翠稜寒樓吾道寄孫登豈應肘後終無分見說仙中亦有僧雲斂石泉飛險實月明山鼠下枯藤  
還如華頂清談夜因有新詩寄鄭弘

春遊涼泉寺

一到涼泉未擬歸進珠噴玉落階除幾多僧祇因泉在無限松如潑墨為雲壑含香啼鳥細茗甌擎乳落花遲  
青山看著不可上多病多慵爭柰伊

經吳宮

夫差昏暗霸圖傾千古淒涼地不靈妖艷恩餘宮露濁忠臣心苦海山青蕭條陵隴侵寒水彷彿樓臺出杳冥  
此是前車况非遠六朝何更不惺惺

送薛侍郎貶峽州司馬

得罪唯驚思未酬夷陵山水稱閑遊人如八凱須當國援到三聲不用愁花落扁舟香冉冉草侵公署雨脩脩  
因人好寄新詩好不獨江東有沃州

將入匡山宿韓判官宅

一宿蘭堂接上才白雲歸去幾裴回黛青峯朵孤吟後雪白援兒必寄來簾卷茶煙紫墮葉月明碁子落深苔  
明朝江上空迴首始覺清風不可陪

送鄭侍郎騫赴關

文章國器盡琅玕朝騎駸駸歲欲殘彩筆祇宜天上用繡衣偏稱雪中看休驚斷鴈離三楚漸入祥煙下七槃  
翰苑舊知憑與說紫金輪畔寄書難

上盧使君

一別旌旗已一年二林真子勸安禪常思雙戟華堂裏還似孤峯峭壁前步出林泉多吉夢帆侵分野入祥煙  
自憐酷似隨陽鴈霜打風飄到日邊

寄匡山大願和尚

一聽玄音下竹亭却思窗雪與囊螢祇將清淨酬恩德敢信文章有性靈夢歷山林聞鶴語吟思海月上沙汀



不堪迴首滄江上萬仞廬峯在杳冥

別盧使君歸東陽二首

兩氣濛濛草滿庭式微吟劇更誰聽詩逢匠化唯貪住日覺恩深不易銘心苦祇應消鬢黑夢遊頻入倚天青  
從茲還似歸回首唯祝台星與福星  
家在嚴陵釣渚旁細連嘉樹拂窗涼難醫林藪煙霞癖又出芝蘭父母鄉孤帆好風千里煖深花黃鳥一聲長  
終期金鼎調羹日再近尼丘日月光

溪寺水閣閑眺因寄宋使君

溪木蕭條一凭闌玉霜飛後浪花寒釣魚船上風煙暝古木林中砧杵乾至竟道心方始是空眺山色亦無端  
誰如太守分憂外時把西經盡日看

春送趙文觀送故合州座主神櫬歸洛

喜繼于悲錦水東還鄉仙騎却尋嵩再燒良玉堯雲動方報深恩絳帳空遠道靈輿春欲盡亂山羸馬恨無窮  
他年必立吾君側好把書紳答至公

警光大師草書歌

穹壓千峯橫枕上窮困雖多還激壯看師逸蹟兩相宜高適歌行李白詩海上驚驅山猛燒一作海上風吹斷狂煙  
著沙草江樓曾見落星石幾回試發將軍砲別有寒雕掠絕壁提上玄猿更生力又見吳中磨角來舞槩盤刀  
初觸擊好文天子揮宸翰御製本多推玉案晨開水殿教題壁題罷紫衣親寵錫僧家愛詩自拘束僧家愛畫  
亦局促唯師草聖藝偏高一掬山泉心便足

題成都玉局觀孫位畫龍

位東越人唐宗南巡  
隨入蜀後改名遇

我見蘇州崑山佛殿中金城柱上有二龍老僧相傳道是僧繇手尋常入海共龍鬪又聞蜀國玉局觀有孫遇  
蹟蟠屈身長八十尺遊人爭看不敢近頭觀寒泉萬丈碧

觀地獄圖

峨峨非一作水劍閣有樹不堪攀佛手遮不得人心似等閑周王應未雪白起作何顏盡日空彈指茫茫塵世間



贈雷卿張明府

任官征戰後度日寄閑身封卷還高密飛書問野人廢田教種穀生路遣尋薪若起柴桑興無先漉酒巾

獻錢尚父

錢鏐自稱吳越國王休以詩投之銀鑰改為四十州乃可相見休曰州亦難添詩亦難改爾雲孤鶴何天不可飛遂入蜀

貴逼人

一作身

來不自由龍驤鳳翥勢難收

一作幾年勤苦踏林丘

滿堂花醉三千客一劔霜寒十四州鼓角揭天嘉氣冷風濤動

地海山秋東南永作金天柱

一作某子衣裳宮錦穿謝公篇詠詩靈着他年名上凌煙閣

誰一作豈羨當時萬戶侯

繡州張相公見訪

德符唐德瑞通天曾叱讒諛玉座前千襲彩衣宮錦薄數牀御札主恩偏出師暫放張良箸得罪惟撐范蠡船未報君恩終必報不妨金地禮青蓮

題某公宅

宅成天下借圖看始笑平生眼力慳地占百灣多是水樓無一面不當山荷深似入苔溪路石怪疑行馬蕩間只恐中原方鼎沸天心未遣主人閑

海覺禪師山院

人言海覺老宗師隱絕層巖世莫知青草不生行道跡白雲常護坐禪扉六環金錫飛來後一派銀河瀉落時借問大心能濟物龍門風電捲天池

悼張道古

昭宗時道古官拾遺以直諫貶蜀中死

清河逝水大悠悠東觀無人失至公天上君恩三載隔鑑中鸞影一時空墳生苦霧蒼茫外門掩寒雲寂寞中惆悵斯人又如此一聲蠻笛滿江風

月夕

霜月

一作殘

夜裏回樓中羌笛

一作管

催曉風吹不盡江上落殘梅

夜雨

夜雨山草濕爽籟雜枯木閑吟竺仙偈清絕過于玉

晚望



落日碧江靜，蓮唱清且閑。更尋花發處，借月過前灣。

早霜寄蔡大

昨夜楚鐘鳴，飛霜下楚城。定知遷客鬢，先向鏡中生。

一作某郊昨夜雪霜馬又須行四顧無人逐鐘鳴第一聲

贈寫經僧楚雲

剔皮刺血誠何苦，為寫靈山九會文。十指漉乾終七軸，後來求法更無君。

寄題詮律師院

以下見統纂

錦溪光裏聳樓臺，師院高凌積翠開。深竹杪聞殘磬盡，一茶中見數帆來。焚香只是看新律，幽步猶疑損綠苔。莫訝題詩又東去，石房清冷在天台。

寄天台葉道士

負局高風不可陪，玉霄峯北置樓臺。注參同契未將出，尋柳栗僧多宿來。颺撼松風山棗落，開關溪鳥木花開。終須肘後相傳好，莫便乘鸞去不迴。

送道友歸天台

鮮濃苔濕冷層層，珍重先生獨去登。氣養三田傳未得，藥非八石許還曾。雲根應狎玉斧子，月運多尋銀地僧。太守苦留終不住，可憐江上去騰騰。

陶種柑橙令山童買之

高步南山南，高歌北山北。數載買柑橙，山資近又足。

春送僧

以下見復古關毛氏本

蜀魄關關花雨深，送師衝雨到江濤。不能更折江頭柳，自有青青松柏心。

律師

蒼苔花紅徑草青，雪膚冰骨步輕輕。今朝暫到焚香處，只恐林前有發聲。

書石壁禪居屋壁

赤旃禮塔六七級，白菡萏花三四枝。禪客相逢只彈指，此心能有幾人知。



句

今日再三難更識，識辭唯道待錢來。

周寶莊丹陽州人，有事經待錢來，後果以錢代之，此上錢句也。

鴈蕩經行雲漠漠，龍湫宴坐雨濛濛。

屬蕩山，今有經行臺。

宴坐，皆以休得名。

刻成筆柱，鴈相挨。

黃昏風雨黑如磐，別我不知何處去。

俠客見。

郭尚父休誇塞北，裘中令莫說。

淮西野客

萬計交人買華軒，保惜深。

牡丹吟。

如何忠為主，至竟不封侯。

即邊。

但看千騎去，知有幾人歸。

一生不蓄買田錢，華屋何心亦偶然。

客至多逢僧在坐，釣歸惟許鶴隨船。

錦繡鳥。

家為買琴添舊價，廚因養

鶴減晨炊。

上合。

粘粉為題，棲鳳竹帶香。因洗落花泉。

上合。

齊已

齊已名得生，姓胡氏。潭之益陽人，出家大滙山同慶寺。復棲衡嶽東林，後欲入蜀，經江陵，高從誨留為僧正。居

之龍興寺，自號衡嶽沙門。白蓮集十卷，外編一卷。今編詩十卷。

夏日草堂作

沙泉帶草堂，紙帳卷空牀。靜是真消息，吟非俗肺腸。園林坐清影，梅杏嚼紅香。誰住原西寺，鐘聲送夕陽。

寄鏡湖方干處士

一作寄方干處士，鏡湖舊居。

賀監舊山川，空來近百年。聞君與琴鶴，終日在漁船。島露深秋石，湖澄半夜天。雲門幾迴去，題徧好林泉。

送人歸吳

第三聯，缺六字。

比說歸耕釣，迢迢向海涯。春寒游子路，村晚主人家。

山綠過茶重，尋舊鄰里菱藕正開花。

贈仰上人

一本題缺，只一仰字。

避地依真境，安閑似舊溪。干戈百里外，泉石亂峰西。草瑞香難歇，松靈蓋盡低。尋應報休馬，瓶錫向南攜。

夜坐

百蟲聲裏坐，夜色共冥冥。遠憶諸峰頂，曾栖此性靈。月華澄有象，詩思在無形。微曙都忘寢，虛牕日照經。

新栽松

野僧教種法，冉冉出蓬蒿。百歲催人老，千年待爾高。靜宜兼竹石，幽合近猿猱。他日成陰後，秋風吹海濤。



期友人

早晚逐一作茲來閉門日為開亂蛩鳴白草殘菊藉蒼苔困臥誰驚起閑行自欲迴何時此攜手吾子本多才

和鄭谷郎中看棋

箇是仙家事何人合用心幾時終一局萬木老千本有路如飛出無機似陸沈樵夫可能解也此廢光陰

寄錢塘羅給事

憤憤嘔讒書無人誦子虛傷心天祐末搔首懿宗初海樹青叢短湖山翠點疎秋濤看足否羅刹石邊居

戊辰歲湘中寄鄭谷郎中

白髮久慵簪常聞病亦吟瘦應成鶴骨閑想似禪心上國楊花亂滄洲荻笋深不堪思翠嶽一作西望獨沾襟

寓言

造化安能保山川鑿欲翻精華銷地底珠玉聚侯門始作驕奢本終為禍亂根亡家與亡國云一作此更何言

寄王振拾遺戊辰歲第三聯缺九字

折檻意何如平安信不虛近來焚諫草深去覓山居

餘分明知在處難寄亂離書

經賈島舊居

先生居處所野燒幾為灰若有吟魂在應隨夜魄迴地寧銷志氣天忍罪清才古木霜風晚江禽共宿來

送人游塞

槐柳野橋邊行塵暗馬前秋風來漢地客路入胡天鴈聚河流濁羊羣積草臙那堪隴頭宿鄉夢逐潺湲

桃花

千株含露態何處照人紅風暖仙源裏春和水國中流鶯應見落舞蝶未知空擬欲求圖畫枝枝帶竹叢

聞鴈

何處人驚起飛來過草堂丹心勞避弋萬里念隨陽影斷風天月聲孤荻岸霜明年起春去江上別鴛鴦

送人遊南

南國多山水君遊興可知船中江上景晚泊早行時子美遺魂地藏真舊墨池經過幾銷日荒草裏尋碑



送益公歸舊居

舊隱終牽夢，春殘結束歸。溪山無伴過，風雨有花飛。片石留題字，孤潭照浣衣。鄰僧喜相接，掃逕與開扉。

不睡

永夜不欲睡，虛堂開復開。却離燈影去，待得月光來。落葉逢巢住，飛螢值我迴。天明拂經案，一炷白檀灰。

新秋雨後

夜雨洗河漢，詩懷覺有靈。籬聲新蟋蟀，草影老蜻蜓。靜引閑機發，涼吹遠思醒。逍遙向誰說，時注漆園經。

送劉蛻秀才赴舉

首聯缺  
五字

百發百中

年丹枝如計，分一箭的無偏。文物兵銷國，關河雪霽天。都人看春榜，韓字在誰前。

留題仰山大師塔院

嵐光疊香冥，曉翠濕窗明。欲起遊方去，重來繞塔行。亂雲開鳥道，羣木發秋聲。曾約諸徒弟，香燈盡此生。

亂中聞鄭谷吳延保下世

小諫纔埋玉，星郎亦逝川。國由一作多聚盜，天似不容賢。兵火焚詩草，江流漲墓田。長安已塗炭，追想更凄然。

送東林寺睦公往吳國

八月江行好，風帆日夜飄。煙霞經北固，禾黍過南朝。社客無宗炳，詩家有鮑昭。莫因賢相請，不返舊山椒。

除夜

夜久誰同坐，爐寒鼎亦澄。亂松飄雨雪，一室掩香燈。白髮添新歲，清吟減舊朋。明朝待晴旭，池上看春冰。

送秘上人

誰喜老閑身，春山起送君。欲憑蓮社信，轉入洞庭雲。道路長無阻，干戈漸不聞。秋來向何處，相憶鴈成羣。

寓居嶽麓謝進士沈彬再訪

去歲來尋我，留題在蘚痕。又因風雪夜，重宿古松門。玉有疑休泣，詩無主且言。明朝此相送，披褐入桃源。

對雪

松門堆復積，埋石亦埋莎。為瑞還難得，居貧莫厭多。聽憐終夜落，吟惜一年過。誰在江樓望，漫漫墮綠波。



和岷公送李評事往宜春

兵火銷鄰境龍沙有去人江潭牽輿遠風物入題新雪湛將殘臘霞明向早春郡侯開宴處桃李照歌塵

送僧一本題款

老憶遊方日天涯錫獨搖凌晨從北固衝雪向南朝鬢髮泉邊剃香燈樹下燒雙峰諸道友夏滿有書招

過荆門

路出荆門遠行行日欲西草枯蠻塚亂山斷漢江低野店叢蒿短煙村簇樹齊翻思故林去在處有猿啼

山中答人

謾道詩名出何曾著苦吟忽來還有意已過即無心夏月山長往霜天寺獨尋故人憐拙朴時復寄空林

贈盧明府閑居

鬢霜垂七十江國久辭官滿篋新風雅何人舊歲寒閑居當野水幽鳥宿漁竿終欲相尋去兵戈時轉難

幽庭

不放生纖草從教徧綠苔還防長者至未著牡丹栽蛺蝶空飛過鶴鴿時下來南鄰折芳子到此寂寥迴

送休師歸長沙寧觀

吾子此歸寧風煙是舊經無窮芳草色何處故山青偶泊鳴蟬島難眠好月汀殷勤問安外湘岸採詩靈

將遊嵩華行次荆渚

蓮峰映數水嵩嶽壓伊河兩處思歸久前賢隱去多閑身應絕跡在世幸無他會向紅霞嶠僧龕對薜蘿

遠思

遠思極何處南樓煙水長秋風過鴻鴈遊子在瀟湘海面雲生白天涯墮晚光徘徊古堤上曾此贈垂楊

寄勉二三子第三聯缺七字

不見二三子悠然吳楚間盡應生白髮幾箇在青山  
莫放閑君聞國風否千載詠關關

渚宮江亭寓目

津亭雖極望未稱本心閑白有三江水青無一點山新鴻喧夕浦遠櫂聚空灣終遂歸佳社孤帆即此還



蝴蝶

何處背繁紅，迷芳到檻重。分飛還獨出，成隊偶相逢。遠害終防雀，爭先不避蜂。桃蹊牽往復，蘭徑引相從。翠裏丹心冷，香凝粉翅濃。可尋穿樹影，難覓宿花蹤。日晚來仍急，春殘舞未慵。西風舊池館，猶得採芙蓉。

送劉秀才往東洛

羨子去東周，行行非旅遊。煙霄有兄弟，事業盡曹劉。洛水清奔夏，嵩雲白入秋。來年遂鵬化，一舉上瀛洲。

移竹

舊溪千萬竿，風雨夜珊珊。白首來江國，黃金買歲寒。乍移傷粉節，終遠著朱欄。會得承春力，新抽錦籜看。

雉

角角類關關，春晴錦羽乾。文呈五色異，瑞入九苞難。暮宿紅蘭暖，朝飛綠野寒。山梁從行者，錯解仲尼歎。

懷軒轅先生

不得先生信，空懷汗漫秋。月華雜鶴背，日影上螯頭。欲學孤雲去，其如重骨留。槎程在何處，人世屢荒丘。

永夜感懷寄鄭谷郎中

展轉復展轉，所思安可論。夜涼難就枕，月好重開門。霜殺百草盡，蛩歸四壁根。生來苦章句，早遇至公言。

賣松者

未得凌雲價，何慙所買真。自知桃李世，有愛歲寒人。瑟瑟初離澗，青青未識塵。寧同買花者，貴逐片時春。

丙寅歲寄潘歸仁

九土盡荒墟，干戈殺害餘。更須憂去國，未可守貧居。康泰終來在，編聯莫破除。他年遇知己，無恥報權綸。

嘗茶

石屋晚煙生，松窗鐵碾聲。因留來客試，共說寄僧名。未擊詩魔亂，香搜睡思輕。春風雪川上，憶傍綠叢行。

楊花

暖景照悠悠，遮空勢漸稠。乍如飛雪遠，未似落花休。萬帶都門外，千株渭水頭。紛紜知近夏，銷歇恐成秋。軟著朝簪去，狂隨別騎遊。旆衝離館驛，鶯撲繞宮樓。江國晴愁對，池塘晚見浮。虛窗紫筆雅，深院藉苔幽。靜墮王孫



酒繁黏客子裘詠吟何潔白根本屬風流向日運輕舉因風更自由不堪思汴岸千里到揚州

詠影

萬物患有象不能逃大明始隨殘魄滅又逐曉光生曲直寧相隱洪纖必自呈還如至公世洞鑿是非情

南歸舟中二首

南歸乘客權道路免崎嶇江上經時節船中聽鷓鴣春容含衆岫雨氣泛平蕪落日停舟望王維未有圖  
長江春氣寒客況權聲閑夜泊諸村雨程迴數郡山桑根垂斷岸浪沫聚空灣已去鄰園近隨綠是暫還

送遷客

天涯即愛州謫去莫多愁若似承恩好一作龍何如傍一作傍主休瘴昏銅柱黑草赤火山秋應想堯陰一作堯下當時解豸頭

題中上人院

高房占境幽講退即冥搜欠鶴同支遁多詩似惠休餅澄孤井浪案白小窗秋莫道歸山字朝賢日獻酬

逢鄉友

無況來江島逢君話滯留生緣同一國相識共他州竹影斜青蘚茶香在白甌猶憐心道合多事亦冥搜

自勉

試算平生事中年欠五年知非未落後讀易尚加前分受詩魔役寧容俗態牽閑吟見秋水數隻釣魚船

寄詩友

天地有萬物盡應輸苦心他人雖欲解此道奈何深返朴遺時態關門度歲陰相思去秋少共對冷燈吟

居道林寺書懷

花落水喧喧端居信晝昏誰來看山寺自要埽松門是事皆能諱唯詩未嬾言傳聞好時世亦欲背啼猿

經吳平觀

中元齋醮後殘燼滿空壇老鶴心何待尊師鬢已乾幡燈古殿夜霜霰大椿寒誰見長生路人間事萬端

劍客

拔劍遠殘樽歌終便出門西風滿天雪何處報人恩勇死尋常事輕讐不足論翻嫌易水上細碎動離魂



白髮

莫染亦莫鑷任從伊滿頭白雖無耐藥黑也不禁秋靜枕聽蟬臥閑垂看水流浮生未達此多爲爾爲愁

秋興寄肩一作公

風聲吹竹徒涼氣著身輕誰有關心去江邊看水行村邊紅樹遠野闊白煙平試裂芭蕉片題詩問竺卿

野步

城裏無閑處却尋城外行田園經雨水鄉國憶桑耕傍澗蕨薇老隔村岡隴橫何窮此心興時復鷓鴣聲

殘春

三月看無也芳時此可嗟園林欲向夕風雨更吹花影亂衝人曉聲繁遠塹蛙那堪傍楊柳飛絮滿鄰家

酬尚顏

取盡風騷妙名高身倍閑久離王者關欲向祖師山幕府秋招去溪鄰日望還伊余豈酬敵來往踏苔斑

苦熱

雲勢峻於峰金流斷竹風萬方應望雨片景欲焚空毒害芙蓉死煩蒸瀑布紅恩多是團扇出入畫屏中

送歐陽秀才赴舉

莫疑空手去無援取高科直是文章好爭如德行多煙霄心一寸霜雪路千坡稱意東歸後交親那喜何

放鷺鷥

潔白雖堪愛腥膻不那何到頭從所欲還汝舊滄波

謝王秀才見示詩卷

誰見少年心低摧向苦吟後須離影響得必洞精深道院春苔徑僧樓夏竹林天如愛才子何慮未知音

送徐秀才之吳

吳都霸道昌才子去觀光望闕雲天近朝宗水路長海門收片雨建業泊殘陽欲問淮王信仙都即帝鄉

獨院偶作

風篁清一院坐臥潤肌膚此境終拋去鄰房肯信無身非王者役門是祖師徒畢竟伊雲鳥從來我友于



酬元員外見寄

僻巷誰相訪風籬翠蔓牽易中通性命貧裏過流年且有吟情撓都無俗事煎時聞得新意多是此忘緣

寄文秀大師

皎然靈一時還有屈於詩世豈無英主天何惜大師道終歸正始心莫問多岐覽卷堪驚立貞風喜未衰

夏雨

靈竈蔽穹蒼冥濛自一方當時消酷暑隨處有清涼著物聲雖暴滋農潤即長乍紅紫急電微白露殘陽應禱尤難得經旬甚不妨吟聽喧竹樹立見漲池塘衆類聲休出羣峰色盡藏頽池來洞壑汗漫入瀟湘下叶黎毗望高祛早暘光幽齋飄臥簟極浦灑歸檣薛在堦從濕花衰苑任傷閑思濟時力詎詠發哀腸

謝興公上人寄山水簇子

半幅古潺顏看來心意閑何須尋鳥道即此出人間嶽暮疑啼狖松深認掩關知君遠相惠免我憶歸山

酬微上人

古律皆深妙新吟復造微搜難窮月窟琢苦盡天機晚檜清蟬咽寒江白鳥飛他年舊山去爲子遠攜歸

同光歲送人及第東歸

西笑道何光新朝舊桂堂春官如白傅內試似文皇變化龍三十升騰鳳一行還家幾多興滿袖月中香

寄江居耿處士

野癖雖相似生涯即不同紅霞禪石上明月釣船中醉倒蘆花白吟綠蓼岸紅相思何以寄吾道本空空

病起二首

一臥四十日起來秋氣深已甘長逝魄還見舊交心撐拄筇猶重枝梧力未任終將此形陋歸死故丘林  
秋風已傷骨更帶竹聲吹抱疾關門久扶羸傍砌時無生即不可有死必相隨除却歸真覺何由擬免之

送中觀進公歸巴陵

一論破雙空持行大國中不知從此去何處挫邪宗晝雨懸帆黑殘陽泊島紅應游到滬岸相憶遠茶叢



寄鄭谷郎中一作住襄州  
高名喧省闥雅頌出吾唐壘嶽供秋望無雲到夕陽自封修藥院別掃著僧林幾夢中朝事依依一作久鷓鴣行

歸鴈

塞門春已一作亦暖連影起蘋風雲夢千行去瀟湘一夜空江人休一作空舉網虜將又虛弓莫失南來伴衡陽樹即紅

登大林寺觀白太傅題版

九疊蒼崖裏禪家鑿翠開清時誰夢到白傅獨尋來怪石和僧定閑雲共鶴迴任茲休去者心是不然灰

贈曹松先輩

今歲赴春闈達如夫子稀山中把卷去榜下注官歸楚月吟前落江禽酒外飛閑遊向諸寺却看白麻衣

夏日江寺寄無上人

講終齋磬罷何處稱真心古寺高杉下炎天獨院深鶯和江鳥語牆奪暮花陰大府多才子閑過在竹林

夏日梅雨中寄睦公

梅月來林寺冥冥各閉門已應雙履跡全沒亂雲根琢句心無味看經眼亦昏何時見清霽招我憑巖軒

傷鄭谷郎中

鍾陵千首作筆絕亦身終知落干戈裏誰家煨燼中吟齋春長蕨釣渚夜鳴鴻惆悵秋江月曾招我看同

臨行題友生壁

山衲宜何處經行避暑深峰西多古寺日午亂松陰鶴默堪分靜蟬涼解助吟慙慙題壁去秋早此相尋

別東林後迴寄修睦

昨夜從香社辭君出薜蘿晚來巾鳥上已覺俗塵多遠路繁芳草遙空共白波南朝在天末此去重經過

古松

雷電不敢伐鱗皴勢萬端蠹依枯節死虵入朽根盤影浸僧禪濕聲吹鶴夢寒尋常風雨夜應一作疑有鬼神看

夏日西霞寺書懷寄張逸人

人中林下現名自有閑忙建業紅塵熱栖霞白石涼倚身裡几穩灑面瀑流香不似高齋裏花連竹影長



訪自牧上人<sub>一</sub>不遇

然諾竟如何諸侯見重多高房度江雨經月長寒莎道本同騷雅書曾到薜蘿相尋未相見危閣望滄波

題東林白蓮

大士生兜率空池滿白蓮秋風明月下齋日影堂前色後羣芳折香殊百和燃誰知不染性一片好心田

寄懷江西微岷二律師

亂後江邊寺堪懷二律師幾番新弟子一樣舊威儀院影連春竹窗聲接雨池共綠山水癖久別共題詩

東林作寄金陵知己

十八賢真在時來拂榻<sub>一作</sub>看已知前事遠更結後人難泉滴勝清磬松香掩白檀憑君聽朝貴誰欲厭簪冠

山寺喜道者至

閏年春過後山寺始花開還有無心者閑尋此境來鳥幽聲忽斷茶好味重迴知住南巖久冥心坐綠<sub>一作</sub>石苔

再遊佳山

紫霄兼<sub>二</sub>老相對倚空寒久別成衰病重來更上難徑危雲母滑崖旱瀑流乾目斷嵐煙際神仙有石壇

贈浙西李推官

他皆<sub>一作</sub>恃勲貴君獨愛詩玄終日秋光裏無人竹影邊東樓生倚月北固積吟煙聞說駕行裏多才復少年

題終南山隱者室

終南山北面直下是長安自掃青苔室閑敲白石看<sub>一作</sub>風吹窗樹老日曬竇雲乾時向圭峰宿僧房瀑布寒

禪庭蘆竹十二韻呈鄭谷郎中

錯錯在禪庭高宜與竹名健添秋雨響乾助夜風清雀靜知枯折僧閑見笋生對吟殊灑落負氣甚孤貞密謝

編欄固齊由灌溉平松姿真可敵柳態薄難并映帶兼苔石參差近畫楹雪霜消後色蟲鳥默時聲遠憶滄洲岸寒連暮角城幽根狂亂迸勁葉動相撐避暑須臨坐逃眠必遠行未逢仙手詠俗眼見猶輕

送孫鳳秀才赴舉

九重方側席四海仰文明好把孤吟去便隨公道行梁園浮雪氣汴水漲春聲此日登仙衆君應最後生



落花

朝開幕亦衰雨打復風吹古屋無人處殘陽滿地時靜依青蘚片閑綴綠莎枝繁艷根枝在明年向此期

秋苔

獨憐蒼翠文長與寂寥存鶴靜窺秋片僧閑踏冷痕月明疎竹徑雨歇敗莎根別有深宮裏兼花鎖斷魂

老將

破虜與平戎曾居第一功明時不用武白首向秋風馬病霜飛草弓閑鴈過空兒孫已成立膽氣亦英雄

城中示友人

久與寒灰合人中亦覺閑重城不鎖夢每夜自歸山雨破冥鴻出桐枯井月還唯君道心在來往寂寥間

送友人遊湘中

懷才難自住此去亦如僧何處西風夜孤吟旅舍燈路沿湘樹疊山入楚雲層若有東來札歸鴻亦可憑

經費徵君舊居

高眠當聖代雲鳥未爲孤天子徵不起閑人親得無猿猱狂欲墜水石怪難圖寂寞荒齋外松杉相倚枯

嚴陵釣臺

夫子垂竿處空江照古臺無人更如此白浪自成堆鶴靜尋僧去魚狂入海迴登臨秋值晚樹石盡多苔

原上晚望

倚杖聊攄望寒原遠近分夜來何處火燒出古人墳野勢盤空澤江流合暮雲殘陽催百鳥各自著一作看栖羣

送惠空上人歸

塵中名利熱鳥外水雲閑吾子多高趣秋風獨自遠空囊隨客櫂幾宿泊湖山應有吟僧在鄰居樹影間

酬章水知已

新吟忽有寄千里到荆門落日雲初碧殘年眼正昏已爲難敵手誰更入深論後信多相寄吾生重此言

閑居

漸覺春光媚塵銷作土膏微寒放楊柳纖草入風騷睡少全無病身輕乍去袍前溪汎紅片何處落金桃



次韻酬鄭谷郎中

林下高眠起相招得句時開門流水入靜話鷺鷥知每許題成晚多嫌雪阻期西齋坐來久風竹撼疎籬  
思遊峨嵋寄林下諸友

送劉秀才南遊

南去謁諸侯名山亦得遊便應尋瀑布乘興上岫巉高鳥隨雲起寒星向地流相思應北望天晚石橋頭  
示諸姪

莫問年將朽加餐已不多形容渾瘦削行止強牽拖死也何憂惱生而有詠歌侯門終謝去却掃舊松蘿  
荆渚病中因思匡廬遂成三百字寄梁先輩

生老病死早聞天竺書相隨幾汨沒不了堪欷歔自理自可適他人誰與祛應當入寂滅乃得長銷除前月  
已骨立今朝還貌舒披衣試步履倚策聊躊躇江月青眸冷秋風白髮疎新題憶刻碑舊約懷匡廬張野久絕  
跡樂夫曾卜居空龕掩薜荔瀑布歎蟾蜍古檜鳴玄鶴涼泉躍錦魚狂吟樹陰映縱踏花萼菸脣舌既已閑心  
脾亦散摠松窗有偃息石徑無趨趨夢冷通仙闕神融合太虛千峰杳靄際萬壑明清初長往期非晚半生閑  
有餘依劉未是詠訪戴寧忘諸稽古堪求已觀時好笑渠埋頭逐小利沒脚拖長裾道種將閑養情田把藥鉏  
幽香發蘭蕙穢莽推丘墟敢謂囊盈物那言庾滿儲微煙動晨爨細雨滋園蔬薛亂珍禽羽門稀長者車冥機  
坐兀兀著履行徐徐每許親朱履多憐奉隼旟簪嫌紅玳瑁社念金芙蓉海內競鐵馬篋中藏紙驢常言謝時  
去此意將何如

竟陵遇晝公

高跡何來此遊方漸老身欲投蓮岳夏初過竟陵春錫影離雲遠衣痕拂蘚新無言即相別此處不迷津

聞貫休下世

吾師詩匠者真箇碧雲流爭得梁太子重爲文選樓錦江新塚樹婺女舊山秋欲去焚香禮帝後峽阻修

金山寺



山帶金名遠樓臺壓翠層魚龍光照像風浪影搖燈檻外揚州樹船通建業僧塵埃何所到青石坐如冰

早秋雨後晚望

暑氣時將薄蟲聲夜轉稠江湖經一雨日月換新秋有景堪援筆何人未上樓欲承涼冷興西向碧嵩遊

過西塞山

空江平野流風鳥葦颺颺殘日銜西塞孤帆向北洲邊鴻渡漢口楚樹出吳頭終入高雲裏身依片石休

溪齋二首

豈敢言招隱歸休喜自安一溪雲臥穩四海路行難瑞獸藏頭角幽禽惜羽翰子猷何處在老盡碧琅玕

杉竹映溪關修修共歲寒幽人眠日晏花雨落春殘道妙言何強詩玄論甚難閑居有親一作新賦搔首憶潘安

新秋

始驚三伏盡又遇立秋時露彩朝還冷雲峰晚更奇蠟香禾半熟原迥草微衰幸好清光裏安仁謾起悲

寄上荆渚因夢廬岳乃圖壁賦詩

夢繞襄義裏神疎骨亦寒覺來誰共說壁上自圖看古翠松藏寺春紅杏濕壇歸心幾時遂日向漸衰殘

已卯歲值凍阻歸有作

河水連地凍朔氣壓春寒開戶思歸遠出門移步難湖雲黏鴈重廟樹刮風乾坐看孤燈焰微微向曉殘

送盧說亂後投知己

兵寇殘江野生涯盡蕩除事堪煎桂玉時莫倚詩書暮狄啼空半春山列雨餘舟中有新作迴寄示慵疎

讀峴山碑

三載羊公政千年峴首碑何人更墮淚此道亦殊時兵火燒文缺江雲觸蘚滋那堪望黎庶匝地是瘡痍

過鹿門作

鹿門埋孟子峴首載羊公萬古千秋裏青山明月中政從襄沔絕詩過洞庭空塵路誰迴眼松聲兩處風

題玉泉寺大師影堂

大化終華頂靈蹤示玉泉由來負高尚合向好山川洞壑藏諸怪杉松列瘦煙千秋空樹影猶似覆長禪



秋日錢塘作

秋光明水國遊子倚長亭海浸一作浸全吳白山澄百越青英雄貴黎庶封土絕精靈白踐魂如在應懸一作懸戰血腥

送人赴舉

分有爭忘得時來須出山白雲終許在清世莫空還驛樹秋聲健行衣兩點斑明年從月裏滿握度春關

友人寒夜所寄

通宵亦孤坐但念舊峰雲白日還如此清關本共君二毛凋一半百歲去三分早晚尋流水同歸麋鹿羣

酬洞庭陳秀才

何必要識面見詩驚苦心此門從自古難學至如今青草湖雲開黃陵廟木深精搜當好景得即動知音

題鶴鳴泉八韻

嘹唳遺蹤去澄明物掩難噴開山面碧飛落寺門寒汲引隨餅滿分流逐處安幽蟲乘葉過渴狄擁條看上有危峰疊旁宜怪石盤冷吞雙樹影甘潤百毛端異早聞鑪玉靈終別建壇瀟湘在何處終日自波瀾

登金山寺

四面白波聲中流翠嶠橫望來堪日斷上徹始心平鳥向天涯去雲連水國生重來與誰約題罷自吟行

寄吳都沈員外彬

歸休興若何朱紱盡還他自有園林閑誰爭山水多村煙晴莽蒼僧磬晚差我野醉題招隱相思可寄麼

寄明月山僧

山稱明月好月出徧山明要上諸峰去無妨半夜行白猿真雪色幽鳥古琴聲吾子居來久應忘我在城

寄哭西川壇長廣濟大師

千萬僧中寶三朝帝寵身還源未化火舉國葬全真文集編金在碑銘刻玉新有誰於異代彈指禮遺塵

酬西川楚巒上人卷

玉壘峨眉秀一作岷江錦水清古人搜不盡吾子得何精可信由前習堪聞正後生東西五千里多謝寄無成

覽延栖上人卷

齊已二



今體雕鏤妙古風研考精何人忘律韻爲子辨詩聲賈島苦兼此孟郊清獨行荆門見編集媿我老無成

寄洛下王彛訓先輩二首

賈島存正始王維留格言千篇千古在一詠一驚魂離別無他寄相思共此門陽春堪永恨郢路轉塵昏  
北極新英主高科舊少年風流傳貴達談笑取榮遷洛水秋空底嵩峰曉翠巔尋常誰竝馬橋上戲成篇

酬岳陽李主簿卷

把卷思高興瀟湘闊浸門無雲生翠浪有月動清魂倚檻應窮底凝情合到源爲君吟所寄難甚至忘筌

寄懷江西僧達禪翁

長憶舊山日與君同聚沙未能精貝葉便學詠楊花苦甚傷心骨清還切齒牙何妨繼餘習前世是詩家

送吳守明先輩遊蜀

憑君遊蜀去細爲話幽奇喪亂嘉陵驛塵埃賈島詩未應過錦府且合上峨嵋既逐高科後東西任所之

寄普明大師可準

蓮嶽三徵者論詩舊與君相留曾幾歲酬唱有新文翠竇容閑憩嵐峰許共分當年若同訪合得伴吟雲

還黃平素秀才卷

求已甚忘筌得之經渾然僻能離詭差清不尚妖妍冷澹聞姚監精奇見浪仙如君好風格自可繼前賢

與張先輩話別

首句缺三字第  
五句缺二字

爲者各自話離心及第還全蜀遊方歸二林巴江漲楚野入吳深他日傳消息東西不易尋

寄朱拾遺

一聞歸闕下幾番熟金桃滄海期仍晚清資路漸高研冰濡諫筆賦雪擁朝袍豈念空林下冥心坐石勞

荆門送興禪師

灑落南宗子遊方跡似雲青山尋處處赤葉路一作紛紛虎共松巖宿猿和石溜聞何峰一迴首憶我在人羣

過西山施肩吾舊居

大志終難起西峰臥翠堆牀前倒秋壑枕上過春雷鶴見丹成去僧聞粟熟來荒齋松竹老鸞鶴自裴回



喜夏雨

四郊雲影合千里雨聲來盡洗紅埃去併將清氣迴潺湲浮楚甸蕭散露荆臺欲賦隨車瑞濡毫渴謏才

酬元員外見寄八韻

舊隱夢牽仍歸心只似蒸遠青憐島峭輕白愛雲騰艷冶叢翻蝶腥臚地聚蠅兩聲連灑竹詩興繼填膺訪戴情彌切依劉力不勝衆人忘苦苦獨自媿兢兢處世無他望流年有病僧時慙大雅客遺韻許相承

浣口泊舟曉望天柱峰

根盤潛岳半頂逼日輪邊冷碧無雲點危稜有瀑懸秀輕毛女下名與鼎湖偏誰見扶持力峩峩出後天

寄楚萍上人

北面香爐秀南邊瀑布寒自來還獨去夏滿又秋殘日影松杉亂雲容洞壑寬何峰是鄰側片石許相安

竹裏作六韻

我一作來深處坐剝覺有吟思忽似瀟湘岸欲生風雨時冷煙濛古屋乾籜墮秋墀徑熟因頻入身閑得徧歌踏多鞭節損題亂粉痕隳猶見前山疊微茫隔短籬

寄江西幕中孫鮐員外

簪履爲官興芙蓉結社緣應思陶令醉時訪遠公禪茶影中殘月松聲裏落泉此門曾共說知未遂終焉

盆池

盆沼陷一作花邊孤明似玉泉涵虛心不淺待月底長圓平穩承天澤依微泛曙煙何須照菱鏡即此鑿姪妍

喜乾畫上人遠相訪

彼此垂七十相逢意若何聖明殊未至離亂更應多澹泊門難到從容日易過餘生消息外只合聽詩魔

過陳陶處士舊居

一室貯琴尊詩皆大雅言夜過秋竹寺醉打老僧門遠燒來籬下寒蔬簇石根閑庭除鶴跡半是杖頭痕

寄敬亭清越



敬亭山色古廟與寺松連住此修行過春風四十年鼎嘗天柱茗詩磔剡溪戩冥目應思著終南北關前

湘江漁父

湘潭春水滿岸遠草青青有客釣煙月無人論醉醒門前蛟蜃氣蓑上蕙蘭馨曾受蒙莊子逍遙一卷經

書古寺僧房

綠樹深深處長明焰焰燈春時遊寺客花落閉門僧萬法心中寂孤泉石上澄勞生莫相問喧默不相應

湖西逸人

老隱洞庭西漁樵共一溪琴前孤鶴影石上遠僧題橘柚園林熟蒹葭徑路迷君能許鄰並分藥斲春畦

瀟湘二十韻

二水遠難論從離向坎奔冷穿千嶂脈清過幾州門闕去都疑白傍來盡帶渾經游聞舜禹表裏見乾坤浦靜魚閑釣灣涼鴈自屯月來分夜底雲度見秋痕暮氣藏鄰寺寒清聒近村離騷傳永恨鼓瑟奏遺魂霧擁魚龍窟槎欹島嶼根秋風帆上下落日樹沈昏柳少沙洲缺苔多古岸存禽巢依橘柚獺逕入蘭蓀色自江南絕名聞海內尊吳頭雄莫過漢口壯堪吞寥次晴方映馮夷信忽翻渡遙峰翠疊汀小荻花繁勢接湖煙漲聲和瘴雨歎急搖吟客舫狂濺野人樽疏鑿誰窮本澄鮮自有源對茲傷九曲含濁出崑崙

江行早發

舟子相呼起長江未五更幾看一作程星月在猶帶一作戴夢魂行鳥亂村林迴人喧水柵橫蒼茫平野外漸認一作漸曉遠峰名

宜陽道中作

宜陽南面路下嶽又經過楓葉紅遮店芒花白滿坡後無山漸薄鴈衆水還多日落猶前去諸村牧豎歌

落日

晚照背高臺殘鐘殘角催能銷幾度落已是半生來吹葉陰風發漫空暝色迴因思古人事更變盡塵埃

春興

柳暖鶯多語花明草盡長風流在詩句牽率遠池塘叫切禽名字飛忙燒姓莊時來真可惜自勉採蘭芳

遠山



天際雲根破寒山列翠迴幽人當立久白鳥背飛來瀑濺何州地僧尋幾壻苔終須拂巾履獨去謝塵埃  
和鄭谷郎中幽棲之什

誰知閑退跡門逕入寒汀靜倚雲僧杖孤看野燒星墨霑吟石黑苔染釣船青相對唯溪寺初宵聞念經  
勉道林謙光鴻蘊二姪

舊林諸姪在還住本師房共埽焚修地同聞水石香莫將閑世界擬敵好時光須看南山下無名塚滿岡  
者宮自勉二首

晨午殊豐足伊何撓肺腸形容侵老病山水憶韜藏必謝金臺去還攜鐵錫將東林露壇畔舊對白蓮房  
畢竟擬何求隨緣去住休天涯遊勝境海上宿仙洲夢好尋無跡詩成旋不留從他笑輕事獨自憶莊周

謝澠湖茶

澠湖唯上貢何以惠尋常還是詩心苦堪消蠟面香碾聲通一室烹色帶殘陽若有新春者西來信勿忘

寄歸州馬判官

郡帶女顏名民康境亦寧晏梳秋鬢白閑坐暮山青贈客椒初熟尋僧酒半醒應懷舊居處歌管隔牆聽

倦客

閉眼即開門人間事倦聞如何迎好客不似看閑雲少欲資三要多言讓十分疎慵本吾性任笑早離羣

送靈誓上人遊五臺

此去清涼頂期瞻大聖容便應過洛水即未上嵩峰殘照催行影幽林惜駐蹤想登金閣望東北極兵鋒

靜坐

坐臥與行住入禪還出吟也應長日月消得箇身心默論相如少黃梅付囑深門前古松徑時起步清陰

謝虛中上人寄示題天策閣詩

天策二首作境幽搜亦玄閣橫三楚上題挂九霄邊寺額因標勝詩人合遇賢他時誰倚檻吟此豈忘筌

荆門寄懷章供奉兼呈幕中知己

紫衣居貴上青衲老關中事佛門相似朝天路不同神疑無惡夢詩澹老真風聞道知音在官高信莫通



江令石

思量江令意愛石甚悠悠貪向深宮去死同亡國休兩株荒草裏千古暮江頭若似黃金貴隋軍也不留

月下作

良夜如清晝幽人在小庭滿空垂列宿那箇是文星世界歸誰是心魂向自寧何當見堯舜重爲造生靈

遊道林寺四絕亭觀宋杜詩版

宋杜詩題在風騷到此真獨來終日看一爲拂秋塵古石生寒仞春松說老鱗高僧眼根靜應見客吟神一作

勉詩僧

莫把毛生刺低徊謁李膺須防知佛者解笑愛名僧道性宜如水詩情合似冰還同蓮社客聯唱遠香燈

謝人墨

珍重歲寒煙攜來路幾千只應真典誥消得苦磨研正色浮端硯精光動蜀牋因君強濡染捨此即忘筌

送人遊玉泉寺

西峰大雪開萬壑向空堆客貴猶尋去僧高肯不來潭澄猿覩月竇冷鹿眠苔公子將才子聯題興未迴

寄鄭谷郎中

詩心何以傳所證自同禪覓句如探虎逢知似得仙神清太古在字好雅風全曾沐星郎許終慙是斐然

春雨

欲布如膏勢先聞動地雷雲龍相得起風電一時來霖霖農桑野冥濛楊柳臺何人待晴暖庭有牡丹開

明月峰

明月峰頭石曾聞學月明別舒長夜彩高照一村耕頗亂無私理徒驚鄙俗情傳云遭鑿後頑白在崢嶸

謝人惠紫栗拄杖

仙掌峰前得何當此見遺百年衰朽骨六尺歲寒姿雪外兼松凭泉邊待月欹他時出山去猶謝見相隨

送人遊湘湖

君遊南園去旅夢若爲寧一路隨鴻鴈千峰遠洞庭林明楓盡落野黑燒初經有興尋僧否湘西寺最靈



小松

發地纔過膝一作蟠根已有靈嚴霜百草白深院一林青後夜蕭騷動空階蟋蟀聽誰於千歲外吟遠一作老龍形

金江寓居

考槃應未永聊此養閑疎野趣今何似詩題舊不如春篔簹盡改藕折花初終要秋雲是從風恣卷舒

晚夏金江寓居答友生

日日衝殘熱相尋入亂蒿閑中滋味遠詩裏是非高碧葦新生竹紅垂半熟桃時難未可出且欲滓豪曹

寄李洞秀才

到處聽時論知君屈最深秋風幾西笑抱玉但傷心野水翻紅藕滄江老白禽相思未相識聞在蜀中吟

過商山

疊疊風寒紅塵翠裏盤前程有名利此路莫艱難雲水一作木侵天老輪蹄到月殘何能尋四皓過盡見長安

蟬八韻

咽咽復啾啾多來自早秋園林涼正好風雨思相收在處聲無別何人淚欲流冷憐天露滴傷共野禽遊靜息深依竹鶯移警過樓分明晴渡口淒切暮關頭時節推應定飛鳴即未休年年聞爾苦遠憶所居幽

鷺鷥二首

日日滄江去時時得意歸自能終潔白何處恨翻飛晚立銀塘闊秋栖玉露微殘陽葦花畔雙下釣魚磯雪裏曾迷我籠中舊養君忽從紅蓼岸飛出白鷗羣影照翹灘浪翎濡宿島雲鷺鴻解相憶天上列紛紛

送僧歸南岳

濁世住終難孤峰念永安逆風眉磔磔衝雪錫珊珊石室關霞嫩松枝拂蘚乾巖猿應認得連臂下句欄

夏日林下作

煩暑莫相煎森森在眼前暫來還盡日獨坐只聞蟬草媚終難死花飛卒未蕩秋風捨此去滿篋貯新篇

村居寄懷

風雨如堯代何心欲退藏諸侯行教化下國自耕桑道挫時機盡禪留話路長前溪久不過忽覺早禾香



酬王秀才

相於分倍親靜論到吟真王澤曾無外風騷甚少人鴻隨秋過盡雪向臘飛頻何處多幽勝期君作近鄰  
贈無本上人

寄華山司空圖

往年吟月社因亂散揚州未免無端事何妨出世流洞庭禪過臘衡岳坐經秋終說將衣鉢天台老去休  
天下艱難際全家入華山幾勞丹詔問空見使臣還瀑布寒吹夢蓮峰翠濕關兵戈阻相訪身老瘴雲間

題真州精舍

波心精舍好那岸是繁華礙目一作無高樹當門即遠沙晨齋來海客夜磬到漁家石鼎秋濤靜禪回有岳茶

懷道林寺因寄仁用二上人

名山知不遠長憶寺門松昨晚登樓見前年過夏峰雨餘雲脚樹風外日西鐘莫更來東岸紅塵沒馬蹤

尋陽道中作

秋聲連岳樹草色徧汀洲多事時爲客無人處上樓雲疎片雨歇野闊九江流欲向南朝去詩僧有惠休

東林雨後望香爐峰

翠濕僧窗裏寒堆鳥道邊靜思尋去路急遠落來泉暮雨開青壁朝陽照紫煙二林多長老誰憶上頭禪

寄雙泉大師師兄

清泉流眼底白道倚巖稜後夜禪初入前溪樹折冰南涼來的的北魏去騰騰敢把吾師意密傳門外僧

送人潤州尋兄弟

君話南徐去迢迢過建康弟兄新得信鴻鴈久離行木落空林浪秋殘漸雪霜閑遊登北固東望海蒼蒼

貽張生

日日見入寺未曾含酒容閑聽老僧語坐到夕陽鐘竹裏行多影花邊偶過蹤猶言謝生計隨我去孤峰

送人遊雍京

君來乞詩別聊與愴前程九野未無事少年何遠行商雲盤翠險秦甸下煙平應見周南化如今在雍京



春草

處處碧萋萋平原帶日西堪隨遊子路遠入鷓鴣啼金谷園應沒夫差國已迷欲尋蘭蕙徑荒穢滿汀畦

懷華頂道人

華頂星邊出真宜上士家無人觸林榻滿屋貯煙霞坐臥臨天井晴明見海涯禪餘石橋去屐齒印松花

寄自牧上人

五老迴無計三峰去不成何言謝雲鳥此地識公卿夢魂將僧說心嫌觸類生南朝古山寺曾憶共尋行

靜坐

日日只騰騰心機何以興詩魔苦不利禪寂頗相應碗滿塵埃點衣多坐卧稜如斯自消息合是箇閑僧

送人遊衡岳

荆楚臘將殘江湖蒼莽間孤舟載高興千里向名山雪浪來無定風帆去是閑石橋僧問我應寄岳茶還

荅知己自關下寄書

故人勞札翰千里寄荆臺知戀文明在來尋江漢來羣機喧白晝陸海漲黃埃得路應相笑無成守死灰

新筍

亂迸苔錢破參差出小欄層層離錦籜節節露琅玕直上心終勁四垂煙漸寬欲知含古律試剪鳳簫看

寄唐洙處士

行僧去湘水歸鴈度荆門彼此亡家國東西役夢魂多慵如長傲久住不生根曾問興亡事丁寧寄勿言

謝人惠竹蠅拂

妙刮筠篁製纖柔玉柄同拂蠅聲滿室指月影搖空敢捨經行外常將宴坐中揮談一無取千萬媿生公

新燕

燕燕知何事年年應候來却綠華屋在長得好時催花外銜泥去空中接食迴不同黃雀意迷逐網羅媒

謝王先輩寄瓊

深謝高科客名瓊寄惠重靜思生朔漠和雪長蒙茸摺坐資禪悅鋪眠減病容他年從破碎擔去臥孤峰



寄還闕下高輦先輩卷

去歲逢京使因還所寄詩難留天上作曾換月中枝  
極極僧迷旨功深鬼不知仍聞得名後特地更忘疲  
和孫支使惠示院中庭竹之什

憶就江僧乞和煙得一莖剪黃憎舊本科綠惜新生  
護噪蟬身穩資吟客眼明星郎有佳詠雅合此君聲  
苦熱中江上懷爐峰舊居

舊寄爐峰下杉松遠石房年年五六月江上憶清涼  
久別應荒廢終歸隔渺茫何當便搖落披衲玩秋光  
送僧遊龍門香山寺

君到香山寺探幽莫損神且尋風雅主細看樂天真

江上值春雨

江臯正月雨平陸亦波瀾半是峨眉雪重爲澤國寒  
農田淹寔盡客權往來難愁殺騷人路滄浪正渺漫  
七十作

七十去百歲都來三十春縱饒生得到終免死無因  
密理方通理栖真始見真沃洲佳臯客幾劫不迷人  
謝虛中寄新詩

舊友一千里新詩五十篇此文經大匠不見已多年  
趣極同無迹精深合自然相思把行坐南望隔塵煙  
送彬座主赴龍安請講

兩論久研精龍安受請行春城雨雪霽古寺殿堂明  
白髮老僧聽金毛師子聲同流有誰共別著國風清  
夏日荆渚書懷

嵩岳去值亂佳廬迴阻兵中途息瓶錫十載依公卿  
不那援鳥性但懷林泉聲何時遂情興吟遶杉松行  
春日西湖作

一水遶孤島閑門掩春草曾無長者轍枉此問衰老

謝中上人寄茶

春山穀雨前併手摘芳煙綠嫩難盈籠清和易晚天  
且招鄰院客試煮落花泉地遠勞相寄無來又隔年



送節大德歸闕

西京曾入內東洛又朝天聖上方虛席僧中正  
賢晨光金殿裏紫氣玉簾前知祝唐堯化新恩異往年  
覽清尚卷

李洞僻相似得詩先示師鬼神迷去處風日背吟時格已搜清竭名還着紫甲從容味高作翻爲古人疑  
荆門送畫公歸彭澤舊居

彭澤舊居在佳廬翠疊前因思從楚寺便附入吳船岸遶春殘樹江浮曉霽天應過虎溪社仲立想諸賢



209758

全居言

卷三



中華民國玖拾捌年柒月廿玖日贈送







國家圖書館



003871628

